

АБДУЛЛА ҚАҲҲОР

ПОРТРЕТЛАР

ФЕЛЬЕТОНЛАР

ПОРТРЕТЛАР

ФАНИШЕР

Сўз Фанишерга

— Тилимни қичитма, жўжахўрор! Айтмадимми, кузда қийқиллаб столнинг тагига кириб кетасан, деб... Эҳ-э, сенинг хўрор бўлишингга ҳали ўн тўрт процент бор. Ҳавони қара, шов этиб ёмғир ёғса нима қиласан, ўн тўрт процент пахтангни лунжингга шўр пахта қилиб боғлайсанми?. Келаси йил менинг бригадамга ўта қол. Биронта эски кетмонга даста қилиб қўяман!..

Баҳорда кариллаб ҳеч кимга сўз бермаган эдинг, мана энди колхозни орқага тортиб ўтирибсан. Одамим кам эмиш! Э-э, одаминг кам бўлса, нега қимирлаган жонни битта қўймай ишга солмайсан? Участкангда пахтага чиқмайдиган отинчалар озми: бироннинг хотини чиқмайди. Бироннинг қизи чиқмайди... Бўйи ғўза билан тенг болалар 40—50 кило қўсак терсин, бизга қарашгани шундан-шунга Тошкентдан одам келсину, биз кап-катта бўлиб, шу ерда туриб пахтага чиқмайлик... Уҳ-ӯ, буларни оналари қизил гулнинг тагига туққани?! Шунаقا оталару шунаقا эрларни мажлисга солиб роса туймайсанми? Қудогидан кўтариб ҳалойикка қўрсатмайсанми? Кимдан, нимадан тап тортасан?

Одам кам дейсан, мана мену сенга қарашгани Тошкентдан ҳам одам келди. Не-не йигитлар, не-не қизлар... Лекин ёрдамидан тўлиқ фойдаландингми?— Йўқ, ошнам, йўқ! Батъзи бригадаларимизнинг билиб олгани — табель, табельни кўради-ю, «ёрдамчининг маъзаси йўқ, кам теради, булардан ёруғлик чиқмайди...» деб идорага югуради. Идора нима қилиб беради. Пилигини кўтариб қўярмиди?

Нариги бригадага ҳам ёрдамчи келди. Бригада биринчи куни қараса, ёрдамчилар ўрта ҳисоб билан 1 28 килодан қўсак теришган эмиш. Булардан биттаси 9 кило терибди. Бригадир шу одамнинг шундан-шунга 9 кило тергани келганига сира-сира ишонмабди, бир гап бор, дебди. Мана бу бригадирга қойилман! Эрта-сига ўша участкага бориб, ўша одамни топибди. Нозик-

кина бир жувон экан. Бригадир қўсак терган киши бўлиб, унинг ишига разм солибди. Қараса, аввали шуки, қўсакка худди тилла қўнғиз ушлаётгандай қўл узатар эмиш, ундан кейин, битта қўсакни икки-уч марта тортар эмиш, қўсак бир қанча чўп билан чиқар экан-да, кейин, чўпни синдириб ташлармиш, бундан ташқари, ерга қараб турган қўсакларни кўрмай қолдириб кетаётгани эмиш. Бригадир секин унинг олдига бориб: «Синглим, бунақада уриниб қоласиз,— дебди,— қўсакни тўғри тортманг, ёнбошлиб силтанг. Шундай қилсангиз ҳам бўғинидан дарров узилади, ҳам ғўза силкиниб, ерга қараб турган қўсаклар кўринади». Шу гапни айтибди кетаверибди. Шу хотин, хоҳ ишону хоҳ ишонма, уч кундан кейин 78 кило терди, ўз қўзим билан кўрдим. Йиши мана бундоқ бўбди! Ёрдамидан тўлиқ фойдаланиш деб мана буни айтади. Билмаганга ўргат, бўшашганини ғайратга сол, уйқун-қирогини уялтири, кечқурунлари ётоғига бориб «ҳорманглар» деб қўй, меҳрибон ҳангамалаш... Колхозчилар ниҳоятда миннатдор эканликларини, жуда катта иш қилаётгандиларини сезиб туришсин...

Менга, кеккайма, дегандай шама қилдинг-а! Мен битта бригадамнинг плани тўлганига кеккайдиган йигитмасман! План тўлдиришини энди кўраётганим йўқ, ошнам. Икки медаль, бир «Хурмат белгиси», бир «Қизил байроқ», бир Ленин ордени олган йигитман. Мен Андижоннинг Бўтақорасидан Мирзачўлга кеккайгани келганим йўқ. Мирзачўлни Мирзагулбон қилгани келган йигитларданман. Марҳум оқсоқолимиз Йўлдош Охунбобоевга шундоқ ваъда берганман. Ушандা у киши мажлис қилдилар, Мирзачўл бурун қандоқ бўлганлиги, у ерда ҳозир нима ишлар қилинаётганилиги, бундан кейин қандоқ бўлиши кераклиги тўғрисида гапирдилар. «Дарактларга қўмилсин, ўтлоқларида қўй-қўзи маърасин, ариқларида шилдираб сувлар оқсин, боғ-бўстонларида булбуллар сайрасин. Одамлар яйрасин, юртимизнинг бойлигига бойлик қўшсин»,— дедилар. Бизнинг муродимиз мана шу. Бригадамнинг планини тўлдирсам ана шу тупроққа битта данак тикдим деб суюнман. Суюниш — кеккайиш эмас, ошнам!

Партиямиз бўлади деган иш бўлмай қолган эмас, ҳукуматимиз қиласиз деган иш қилинмай қолгани йўқ, олимларимиз ўсимликни раъйимизга солиб берәтибди. Машиналаримиз битта бармоғимизни филга тенг қилиб қўйди. Мен келганда мана шу ерларнинг ҳар гек-

тари ниҳояти 8 центнердан пахта берар эди. Бу йил 36 гектар ернинг ҳар гектаридан 35 центнердан ҳосил оламан!

Биз жуда катта ишлар қилаётимиз, ошнам, бахшиларнинг достонига, қўшиқларига тушадиган ишлар қиляпмиз. Фўрадан баҳор ҳиди келгандай колхозимизда бўлаётган ҳар ишдан ўша Мирзагулбоғнинг ҳиди 'келиб туради. Менинг бригадамдаги Тўтихонни билсан-а? Ўн олти яшар қиз, звено бошлиги. Муштдай боши билан 9,5 гектар ернинг ҳар гектаридан ҳозирнинг ўзидаёқ 32 центнердан ҳосил олди. Звеносида бирорта эркак йўқ. Терим вақтида Тўтихоннинг ўзи ҳар куни 100—150 килодан пахта терди. Мана шундан ҳам ўша Мирзагулбоғ ҳиди келмайдими? Бу қизда бунчалик файрат қаёқдан пайдо бўлди? Биз бу ерда жуда катта иш қилаётганимизни катта-кичик, эркак-аёл ҳамма билади. Ҳамма кўриб туради. Тўтихон ҳам, унинг звеносидаги хотин-қизлар ҳам билишади. Бизларга филнинг кучини, чумолининг файратини берган нарса мана шу.

Ҳа, ошнам, буқчайиб қолдинг, жўжахўroz деганимга хафа бўлдингми? Хафа бўлма. Жўжахўroz бўлсанг ҳам хўroz бўлиб туғилгансан, хўroz бўлиб кетасан. Кўтар қоматингни. Лекин, ошнам, маҳкам бўл, пахтанг сушилкага тушгудек бўлмасин.

Ана, кўрдингми, булат юиртилди, эртага ҳаво яхши бўлади...

3/XII—48 йил

ДЎРМОН ЛОЧИНИ

Тошкентга келиб Янги Дўрмон — «Қизил Ўзбекистон» колхозини кўролмай қайтган киши армонда кетади. Ҳеч бўлмаса нарироққа бориб Оржоникидзе район марказининг чиқаверишидаги тепаликда ёки колхоз раислари тайёрлайдиган мактабнинг катта йўл бўйидаги шийпонидан Дўрмонга бир қаралса, кўнгилдаги ҳар қандай губор бир зумда тарқайди кетади!

Этагини кўз илғамайдиган ранг-баранг, ийрик-ийрик ер карталари; боғлар, чорбоглардаги, хиёбон, кўча ва йўллардаги садарайхондай қулф уриб, намозшомгулдай тарвақайлаб, гулихайридек бўйга зеб бериб ўсган дараҳтлар; булат устидан бўй чўзиб турган мирзатераклар; дараҳтлар остидан, орасидан мўралаб турган оқ, пушти, сарғиш, кўкимтири деворлар, қизил ва яшил томлар... Шундай манзарани расмда кўрган киши «расом жуда ошириб юборди» дейди.

Дўрмонни боғ десангиз минг-минг тонна пахтаси бор, пилласи бор; оқ олтинга кон десангиз, ширин-шакар меваси бор, қўю қўзи, сигир-бузоқ, парранда-ю, йилқиси бор.

Олачипор Қурама ва Чимён тоғлари, оч ўсмаранг пасти баланд адирлари, қирлари Дўрмоннинг тенги йўқ ҳуснига хусн қўшгани, уни ясатгани, безатгани атайин яратилгандай туюлади.

Қуналай кўзга тортилган сурма киприкларда оқиш кўриниб қадри кетгандай, Дўрмонда кечалари ойдину, ойнинг қадри қолган эмас: кўча ва ҳовлилардаги ёруғ электр чироғларидан кўз қамашади. Деразаларда ранг-баранг шуъла ёнади: буларнинг аксидан ариқларда сув эмас, ўйноқи нур оқади. Кундузи кекса, не-не замонларни, маконларни кўрган қуёш, дўрмонни кеча кўриб тўймагандай яна кўргани шошилиб мўлжалдан эртароқ чиққандай, унинг устида кўпроқ тўхтаб, шодликдан чақнаб, ота ғамхўрлиги, она меҳри ва ошиқ муҳаббати ҳароратидан шундай қишлоқлар яратган рес-

публикага, унинг азим пойтахтига нурдан табрик ва саломлар юбораётгандай туюлади.

Республикамизнинг бўй гўзал парчаси юртимизга меҳмон бўлиб келган румин деҳқонларининг ҳавасини, ҳинд санъатчиларининг шавқ-завқини, Бразилия, Аргентина, Венгрия, Миср шоирлари, адилларининг илҳомини келтирди; Хитой олимлари, демократик Германия, Япония, Норвегия хўжалик ва маданият ходимлари ва Англия, Йндонезия, Эрон, Афғон, Бирма давлат араббларининг таҳсинига сазовор бўлди; бошқа кўп мамлакатлардан келган кишиларнинг ҳам ҳавасини, баъзан ҳасад туйғусини қўзғатди.

Кишлоқларимизни мана шу хилда обод, деҳқонларимизни йўқчилик ғам-ғуссасидан ҳалос қилган колхоз тузуми, шу билан бирга, колхоз ишлаб чиқариши командирлари — фаросатли, дидли, ғайратли, ишнинг кўзини биладиган, эл-юрт деганда ўт кешишга, сув кечишга тайёр бўлган раҳбар кадрлар ҳам етиштириди.

Мана шу кадрлардан бири «Қизил Узбекистон» колхозига қарийб йигирма йилдан бери раҳбарлик қилиб келаётган донгдор раис Абдужамил Матқобиловдир.

Ёши анчага бориб қолган бўлса ҳам, йигитлик тахи бузилмаган, шопдай мўйлови баланд қадига хўп ярашган бу одам кўпроқ боғда, этаги кўринмайдиган ток хиёбонининг кираверишидаги каттакон сада остига қўйилган сўрида темир панжара — дарвозадан катта кўчага қараб ўтиради. Ҳамиша очиқ ҳавода юрганлигидан қип-қизил ва ажинга сўз бермаган юзидан табассум аримаган бу одамни дабдурустдан кўрган киши унинг бошида бир минг бир юз хўжаликдан иборат, беш ярим минг жон кўз тиккан катта рўзгорнинг ташвиши бор деб ўйламаслиги ҳам мумкин. Шовқин йўқ, югуриш йўқ, ҳовлиқиши йўқ. Аксинча, бу саданинг тагида ҳовлиққаннинг ҳоври босилади. Бу ерда гўё бутун колхоз, унинг ҳар бир бригадаси-ю, звеноси, ҳар бир колхозчи-ю, унинг уйичи баралла кўриниб, ҳар бир товуш аниқ эшитилиб туради. Шунинг учун одамлар, «раисда лочиннинг кўзи-ю, кийикнинг қулоги бор» дейишади.

Унинг пахтачилик, пиллачилик, чорвачиликдаги тажрибаси, боғдорчиллик, сабзвотчиликдаги ҳунари устига хўжаликни олиб боришдаги маҳорати колхозчиларнинг завқини келтиради:

— Раисимиз ҳисобини топса, сигирнинг маърашидан ҳам фойдаланади!

— Даромадни теша билан чопиб олсан, раисимиз қирғич билан қириб сарф қиласди!

Бу аломат ташкилотчининг саргузашти билан ҳозирги Дўрмон тарихи орасида, нечукдир, бир муносабат бор.

Эски Дўрмон қалдирғочнинг уясига ўхшаган кесак деворлар, пачақ, қийшиқ уйлар, тўнтариб қўйилган лайлак уяга ўхшаган томлар, булар орасида қабристондаги даҳма сингари қаққайиб турган қизил тунука томли икки иморат—икки бойнинг ҳовлиси, бир мачит ва суви қуртлаб, қон тусига кирган бир ҳовуздан иборат бўлган вақтларда Матқобилов бойларнинг эшигига қарол, дурадгорга шогирд бўлиб юрган эди. Қизил тунука томли икки бинонинг бири мактаб, бири «Қизил қўшчи»га идора бўлгандан кейин эса Матқобилов ўз ерини экиб, нимжон бўлса ҳам, ўз хўжалигига эга бўлди; савод чиқарди, сельсовет атрофидаги активлардан бири бўлиб қолди. Икки юз йигирма хўжалик бирлашиб колхоз бўлганда Матқобилов аввал кетмончи, колхоз бир оз мустаҳкамлангандан кейин эса пахтачилик бригадасининг бошлиги бўлди. Колхоз катта-катта қадамлар ташлаб олға босган сайин Матқобилов кўзга яқолроқ кўрина борди: ғайратли, омилкор бригада сифатида обрўси ошиди, сельсовет очган курсда ўқиб, билимини ошириди; гап билди, сўз билди, мажлисларда гапирадиган, унча-мунча одамга сўз бермайдиган бўлди; ниҳоят, колхозга раис қилиб сайданди. Саккиз йилда саккизта раис кўрган колхозда Матқобилов раис бўлиб қарор топди.

Матқобилов раислигига колхоз ташкилий-хўжалик томондан мустаҳкамлана борди: колхозчилар ниҳоятда аҳил бўлди, колхозга муҳаббати ва меҳнатга рагбати ошиди. Кечагина ўз ери, ўз уловидан кўзини ололмаган, ўзидан бошқани ўйламайдиган кишилар энди колхоз тўғрисидагина эмас, ҳатто республика тўғрисида ўйлайдиган бўлиб қолиши; Шимолий Тошкент, Мирзачўлдаги Киров номли каналларда, Оҳангарон темир йўли, Фарҳод гидростанцияси қурилишларида жон куйдириб ишлаб, «Қизил Узбекистон» колхози номига шон-шараф келтириди.

Уруш бошланган вақтда колхоз ўзини батамом тутиб олган, мамлакатимиздаги мингларча колхозлар

қатори қўшинларимизнинг мустаҳкам орқа таянчига айланган эди. Бу вақтда пахта ҳосили ҳар гектар ердан ўн икки ўрнига йигирма уч центнерга кўтарилиган эди, уруш даврида асосий куч бўлиб қолган аёллар, қарияларнинг ҳиммати, ғайрати ва ташабbusи соясида колхоз шу ҳосилни қўлдан бермади, бунинг устига, хўжалик тармоқларини кўпайтирди, кенгайтирди.

Урушда майин халқимишнинг моддий эҳтиёжини саноатимишнинг хом ашёга бўлган талабини тўлароқ қондириш учун қишлоқ хўжалигини яна ҳам ривожлантириш мақсадида Партия ва Ҳукуматимиз жорий қилган талай тадбирлар колхоз хўжалигини ҳар томонлама ва тез суръат билан тараққий қилдиришга катта йўл очиб берди.

«Қизил Ўзбекистон»да меҳнатнинг оғирини, ишнинг кўпини машина, қилади. Колхозларни йириклиштириш, янги суғориш системасига ўтиш, пахтани янги, прогрессив методлар билан экиш ва бошқалар техниканинг бутун имкониятидан фойдаланишга, унинг бутун кучини сиқиб олишга катта имконият яратиб берди. Бунинг натижасида колхоз 1956 йилда 1250 гектар пахта майдонининг ҳар гектаридан 42 центнер ҳосил олди, бир гектар пахтани беш-олти меҳнат кунинга тушириди.

— Хўжаликни комплекс равишда ривожлантирмасдан туриб колхозчиларнинг даромадини йилдан-йилга ошириш қийин,— дейди Матқобилов.

Колхозчиларнинг даромади йилдан-йилга ошиб бораётган «Қизил Ўзбекистон» колхози, ҳақиқатан, кўп тармоқли хўжаликдир. Колхозда олтига чорвачилик фермаси бўлиб, буларда 900 бош қорамол (300 таси сигир), 4000 бош қўй, 300 бош йилқи, 250 бош чўчқа (25 таси она чўчқа), 150 яшик асалари, бир неча минг бош парранда бор. Бутун куч пахта ва пилладан юқори ҳосил олишга қаратилиши билан бирга чорвачилик маҳсулдорлигини оширишга ҳам катта диққаг ва эътибор қилинади. 300 сигирга янги типда солинган қишлоқ ва ёзлик, механизациялашган «шоҳона» оғил, икки миллион сўмдан ортиқ пул сарф қилиб қурилган икки минг тоннаялик силос чуқури ва башняси, тахминан икки миллион сўмга тушадиган паррандачилик комбинати қуриш мўлжалланганлиги ва бошқа кўп ишлар бунинг далилидир.

Колхоз, хўжалик ютуқлари билан, Бутуниттифоқ Қишлоқ хўжалиги виставкасининг ҳам зийнати бўлди.

«Қизил Ўзбекистон» 1953 йилдан бери Виставка қатнашчиси бўлиб, иккита биринчи даражали, тўртта иккинчи даражали диплом, бешта енгил ва юк машинаси билан мукофотланди. Матқобиловнинг ўзи икки олтин медаль, учта кумуш медаль ва битта «Победа» машинаси мукофот олди.

Колхоз боғдорчилик ва сабзавотчиликдан ҳам тўрт миллион сўмга яқин даромад олади. «Қизил Ўзбекистон»нинг чойнакдай-чойнакдай анори, карсиллайдиган олмалари, ҳар боши бир патнис келадиган шириншарбат узумлари, пичоқ тегмасдан тарсиллаб кетадиган қовун-тарвузлари, қишида ҳам барра бодринги, помидори, кашничу кўк пиёзи Тошкент ва Чирчиқ бозорларининг кўркидир.

Ҳамма тармоқлардан чиқадиган маҳсулотни Матқобилов қўл ҳам тегизмай, чумчуқа ҳам егизмай колхоз ва колхозчilar бойлигига жамлайди. Томатома кўл бўлур деганлар. Тармоқлардан томадиган томчилар, ҳақиқатан колхозчиларнинг даромадини йилдан-йилга ошириди, колхозни бақувват, ҳар ишга қодир қилди.

«Қизил Ўзбекистон»нинг қудратини қурилиш иши, бунинг миқёси ва суръатидан қиёс қилса бўлади.

Янги суғориш системасига ўтиладиган вақтда анчагина ерни қуроқ-лаҳтак қилиб турган беш юз хонадённи бетўхтов, пландаги муддатдан бурунроқ кўчириш зарур бўлиб қолди. Беш юз хонадон — бутун бир бошли қишлоқ деган сўз! Шундай бўлишига қарамай, колхоз кучига ишониб, пасқамликларнинг қатига, эгри-буғри кўчаларнинг қаърига тиқиб қўйилган бурунги Дўрмондан сўнгги нишона бўлиб қолган пачоқ, қоронғи кулбаларга бульдозер солиб юборди. Салвақт ўтмай бу хонадонлар катта йўл бўйига солинган баланд, «уй мана бунақа бўлади» деб ҳавога, қуёшга кўкрак кериб турган боғу боғчалик, кўп хоналик янги уйларга кириб олишди.

Колхоз кейинги беш-олти йил ичida бир талай уйжойдан ташқари, йигирма етти хоналик идора биноси, ўттиз етти хоналик дам олиш уйи, суткасига беш юз-киши чўмиладиган ҳаммом, ўн олти ўринлик меҳмонхона, уч юз болага бешта боғча биноси, бутун ёхолини ва хўжалик обьектларини сув билан таъминлайдиган ўн етти километрлик водопровод, пахта тозалайдиган завод, суткасига ўн минг дона пишиқ фишт чиқарадиган фишт заводи ва бошқа нареалар қурди;

саккиз километрлик йўл колхозга мол тушириш ва колхоздан маҳсулот чиқаришни осонлаштирадиган бир юзу йигирма метрлик темир йўл шохобчаси солиб олди. Ҳозир яна бирмунча уй-жой, тўрт юз болага мўлжалланган интернат биноси, қирқ номерли телефон станцияси солинаётиди.

Одамларнинг меҳнат ва муҳаббатидан яшнаган колхоз, ўз навбатида, колхозчининг оғирини енгил, қийин ишини осон, турмушини фаровон ва чиройли қиласиган жуда кўп илм ва техника мўъжизаларини қишлоққа олиб келди, қишлоқда саводсиз одамни сифдирмайдиган, ёшу қари ҳамма илм-маърифатга, техникага, инсон ақли яратган ҳамма моддий ва маънавий чеъматларидан фойдаланишга ҳаракат қиласиган шароит вужудга келтирди. Бунинг натижасида колхоз интеллигенцияси пайдо бўлди, булар: врач ва ўқитувчилар, ветеринар ва агрономлар, тракторчи ва химизаторлар, шофер ва механиклар, идора хизматчилари ва савдо ходимлари... «Қизил Ўзбекистон» тупроғида ҳозир йигирма ўринлик касалхона, ўн иккни ўринли тургуҳона, аптека, лаборатория, кинотеатр, радиоузел, уч магазин, битта ўн йиллик ва бешта етти йиллик ҳамда битта бошланғич мактаб бор. Бу мактаблардаги ўқитувчиларнинг етмиш проценти дўрмонлик бўлиб, Тошкент, Самарқанд, Фарғонада таҳсил кўрган кишилар. Қишлоқдан ҳозиргacha 14 врач, 15 инженер, 14 агроном, 3 артист, 2 шоир чиқсан. Байрам кунлари галстукни қисиб боғлаган, шимининг қирраси билан қовун сўйса бўладиган йигитларни, пошнаси ингичка туфлиларда дикиллаб, ҳарир этакларини учириб юрган қизларни кўрсангиз... ким билади, буларнинг қайси бири ўқитувчи-ю, қайси бири хизматчи-ю, қайси бири оддий колхозчи!

Колхозга Матқобиловнинг жуда кўп меҳнати синган, бунинг учун бутун колхоз ва ҳар бир колхозчи ундан миннатдор; лекин шу билан бирга, Матқобилов бутун ҳаётини хаёлидан кечирап экан, бутун колхоз ва ҳар бир колхозчи олдида қўл қовуштириб, улар билан бирликда жонажон Партиямизга, Ҳукуматимизга миннатдорлик туйғусини, меҳру муҳаббат ва чексиз садоқат туйғусини изҳор қиласди.

1957 йил

ЮРИНГ, ОШНА, ЧУЛ ҚУВЛАЙМИЗ!

Ассалому алайкум, жондан азиз, шакардан лазиз Москвам!

Мана, биз ҳам келдик. Қилган меҳнатимизни тақдирлаб берган мукофотингни олиб қуллуқ қилгани қардош-қариндош паҳтакорлар, ғаллакорлар, чорвардорларнинг ютуғини олқишлиб чапак чалгани, яхши ишларидан ибрат олгани келдик...

Езинг, яхши қиз, каттароқ дафтaringизга ёза қолинг, кўпчиликмиз, кичигига сифмаймиз! Бирламчи: Анжаннинг Бўтақорасида туғилган, бир кам қирқинчи йилда Мирзачўлга кўчиб келган ва бугунги кунда Гулистон районидаги колхозда яшаб-яшнаб турувчи Юнусов Фанишер! Бригадир! Эллик бир яшар...

Қани, юринг, ошна, пича вақт бор экан. Кремльни бирпас айланайлик... Республикамиз паҳта планини бажаролмаган йиллари ерга қарай бериб димиқсан, заҳлаб, занглаб кетган кўкракларга шабада тегсин! Кремль шабадаси тегсин!

Биз ўша йиллари ҳам бажарган эдик, лекин бари бир, ерга қараганмиз, ошна! Биз бажарган билан республика бажармаса... битта мих билан иморат солиб бўлмайди деган гап ҳам гап! Бурун бригадамизни битта мих деган одамлардан хафа бўлиб чакка қилинган эканмиз. Ҳом сут эмган одам боласи, баъзан дўланани кўриб тоғни эсидан чиқариб қўядиган маврилар ҳам бўлар экан-да!

Оламда битта ўзини, жуда нари боргандা, болачақасинигина ўйлайдиган, ҳалқни кўргани, юрга қарағани бўйи етмайдиган одамлар бор! Биз, колхоз ионимизни бутун қилди, бизга ёруғ уй, қўлимизга китоб берди деймизу, лекин булардан ҳам каттароқ, булардан ҳам чиройлироқ бир нарсани кўпинча пайқамаймиз: колхоз бўйимизга бўй қўшиб, ҳалқни кўрадиган, юрга қараайдиган қилди. Мен сизга айтсан, ошнам, ҳалқни кўргани, юрга қарагани бўйи етмайдиган

одамчанинг офтобшувоқда қорини иялаб, орқа оёғи билан бўйини қашлаб ётган мушук боладан фарқи йўқ!

Бурунги замоннинг йўриғи бошқа эди. У замонда меҳнат оғир юк, бу юк меҳнаткаш одамни ерга қўшишириб юборган, меҳнаткаш одам қўшнисини кўргани, атрофга қарагани бошини кўтаролмас эди. Мана, менинг ўзимдан қиёс: колхоз бўлмасдан бурун, Тўйчи эшоннинг эшигига қарол бўлиб юрган йилларим, ўзимдан бошқани ўйлагани, қишлоққа кўз ташлагани фурсатим бўлиптими? У вақтларда тунларим бирпас ором олгани, кунларим бир бурда нон топгани аранг етар эди. У вақтларда меҳнаткаш одам, агар куни ортгудай бўлса, ўзини ўлимга заготовка қиласр эди — намоз ўқир эди.

Биз киндик қонимиз тўкилган қишлоқларни, кўз очиб кўрган колхозларимизни ташлаб Мирзачўлга ўйл олганимизда бу гаплар тилимизга чиқмаган бўлса ҳам дилимизда қўр олиб ётар эди. Мана менинг ўзимни олинг. «Файрат» колхозида ярим газли кетмонни зўфатасигача ботириб уриб юрганимда, Карл Марксномидаги колхозда бригадирликни дўндириб, Анжан областининг манман деган йигитлари билан беллашиб, ҳеч кимга сўз бермай, кариллаб юрган кунларимда кимдан кам эдиму, нимам кам эди! Ўшанда Мирзачўл дейишганда яхши турмушим ҳам, бригадамнинг ютуқлари ҳам кўзимга кўрингани йўқ, ошна, ўша вақтларда комсомоллар айтмоқчи, «унумли Мирзачўл ерларини босиб ётган қамиш-қиёқ, шўр» кўринган эди.

Бир менми? Биз саксон уч хўжалик эдик. Партия ва Ҳукуматимиз Мирзачўлнинг пешанасига битган шўрни ювиб ташлаш керак деганда, саксон уч хўжалик баравар кўрпамизни кўтарганимиз!

Биз келганда Мирзачўлни кўрган ҳар қандай одамнинг ҳам юраги орқасига тортиб кетар эди. Ўшанда мен чўчиганим йўқ десам, бутунлай ёлғон гапирган бўламан, ошнам! Кўрпамни қўйиб атрофга шундай қарасам...вой-вуй, Мирзачўл шунақами ҳали, деб юборибман! Аллақандай бесўнақай шўр гиёхлар, полукли қамиш, қиёқ, ердан қайнаб чиққан, очилган оҳакдай оппоқ шўр... Онда-сонда кўриниб одамнинг кўнглиға пича ёруғлик солиб турган экин-текинни кўрсангиз... Фўзанинг бўйи бир қарич, ҳаммаёқ қашқа, ола — бамисоли куя еган пўстак дейсиз. Қамиш капа, қамиш бостирма, қамишга лой чаплаб тикланган уйлар...

Ўшанда колхознинг тўрт хонали идораси ҳам қамишга лой чаплаб солинган «иморат» эди.

Ўша куни кечқурун идоранинг рўпарасидаги янги қазилган зовур бўйида мажлис бўлди. Шу мажлисда рапором секретари айтган гап ҳеч қулоғимдан кетмайди:

— Чўчиманглар, азаматлар,— деди у киши.— Бутун республиканинг кўзи бизда!

Ўша пайт дилимизга қувват бўлган бу гап нечоғлик ҳақиқат эканини мана, ўн етти-ўн саккиз йилдан бери ҳар куни, ҳар соат ўз кўзимиз билан кўриб келаётмиз.

Мирзачўл Узбекистоннинг бино қўйган фарзандларидан бири бўлиб қолди. Республика катта ниятлар, зўр-зўр орзу-ҳаваслар кўриш умидида ўстираётган бу фарзандига нон еганда юмшогини, ош еганда илигини бериб келаёттипи. Мана шу ғамхўрлик орқасида ғайратли, лабзи ҳалол йигитларимиз, қизларимиз, ёшқари ҳамма ватанпарвар азаматлар Искандар замонасидан бери одамлар уриниб уdda қилолмаган ишларни бажаришга, ҳалқнинг хаёлида ҳам рўёбга чиқмаган орзусини ушатишга эришаётиди; чўлни ҳайдаб, қувлаб бораётиди. Ҳозир Мирзачўлнинг Узбекистонга қарашли қисмидаги олтига район, ўн иккита МТС, етмиш иккита колхоз, бир қанча пахтачилик ва бошқа хил совхозлар бор. Ўтган йил «Дружба», Фарҳод номли иккита совхоз, бир қанча колхоз ташкил қилинди.

Бизнинг Гулистон районида чўлдан нишона ҳам қолган эмас. Менинг бригадам ўтган йил қирқ гектар ернинг ҳар гектаридан қирқ олти центнердан пахта олди. Бунаقا юқори ҳосилни фақат ўтган йил олганимиз йўқ да. Мана бу орденларни кўрсангизми, ярмини тақиб келганман, ҳаммаси битта костюмга сифмайди!

Бунаقا юқори ҳосилни фақат бизнинг бригада етиштиргани йўқ. Исмоилов, Анорқулов, Мамараҳимов, Қодиров, Муҳитдинов, Йўлдошевларнинг бригадалари етиштирган ҳосилни ҳам республикада кўп бригадалар орзу қилса керак.

Бизнинг Мирзачўл фақат пахта, ғалла, пилла кони, чорва, парранда маконигина эмас, ошна! Боғларимизда етишган хилма-хил узумлар тилни ёради, анжирларимиз иситма чиқариб юборади; полизларимизда битган асалпалак қовунларимизнинг биттаси саккиз кишидан ортиб қолади...

Утгак йил Партия ва Ҳукуматимиз Мирзачўл тўғрисида жуда катта қарор чиқарди. Биладиган одамларнинг айтишига қараганда, шу қарор бўйича бешетти йил ичида қилинадиган иш 1917 йилдан бери қирқ йил мобайнида қилинган ишлардан икки бара-вар кўп, иш суръати ўттиз баравар ортиқ эмиш. Партия ва Ҳукуматимизнинг бу қарори, шу қарор юзасидан бошланиб кетган ишлар, кўрилаётган тадбирлар бизга қанот берди. Биз чўлни юриб-югуриб эмас, эндиликда учиб қувлаймиз. Чўл ўринини пахтазорларга, боғларга, боғ-қишлоқлар, боғ-шаҳарларга бўшатиб қочаётиди, орқасига қарамай қочаётиди!

Юринг, ошина, юринг биз томонларга, чўл қувлаймиз!

1957 йил

ГУЛИСТОНДА БИР БУСТОН

Қирқ биринчи йилнинг январи. Кечки пайт. Лайлакқор ташлаб турибди. Ҳеч кутилмаган бир вақтда Тепақўргон қишлоқ Советидаги колхоз идорасига Узбекистон ССР Олий Совети Президиумининг Раиси Йўлдош ота Охунбобоев келди ва тўғри бориб раис билан сўрашди-ю, бўш курсилардан бирига ўтириди. Колхоз раиси Соҳибжон Назаров Йўлдош ота билан гаплашмаган бўлса ҳам, лекин у кишини жуда кўп кўрган эди, бироқ бу ҳол шунчалик кутилмаган эдикি, қаршисида ўтирган киши президент эканини анчадан кейин билди ва сапчиб туриб қайтадан сўрашди. Йўлдош ота ҳол-аҳвол сўрашганидан кейин дабдурустдан:

— Сизни яхши ташкилотчи деб эшийтдим. Деҳқонбой Нурматов ҳам шунаقا деяпти, ростми?— деди.

Соҳибжон Назаров хижолат бўлиб, нима дейишини билмай қолди.

— Ишлаб турибмиз... билмадим...

— Қанақа ташкилотчи эканингизни билмайсизми? Мен ҳам билмайман,— деди Йўлдош ота кулиб.— Нима қиласмиш, бир синааб кўрамизми? Бир синааб кўрайлик, қанақа ташкилотчи эканингиз ўзингизга ҳам аён бўлади, бизга ҳам... Хўпми?

Йўлдош ота ундан жавоб кутмай Мирзачўлдан сўз очди ва бу биёбонни ўзлаштириш тарихини, революциядан бурунги уринишлар, ҳозирги дамгача қилинган ишлар тўғрисида гапириб берди; кейин, Биринчи Жаҳон уруши, чет эл интервенцияси ва гражданлар уруши туғдирган жуда катта қийинчиликларга қарамай, Владимир Ильич Ленин 1918 йилда Туркистондаги сугориш ишларига 50 миллион сўм ажратиш ва шу ишларни ташкил этиш тўғрисидаги декретга қўл қўй-

ганини, бу декрет Мирзачўлни суғориш ва ўзлаштиришда янги давр очганлигини айтди.

— Агар хўп десангиз,— деди Йўлдош ота хиёл жилмайиб,— қанақа ташкилотчи эканингизни Мирзачўлда синаб кўрайлик. Нима дедингиз?

Бир томондан чўл, янги колхоз, синашта бўлмаган одамлар, деган андиша Назаровни чўчитса, иккинчи томондан, оқсоқолнинг атайлаб келгани, унинг кулимсираб: «Синаб кўрайлик» деган сўзи замирида ётган ишонч, ҳамда Тошбулоқ қишлоқ Советидаги «Деҳқонобод» колхозида раис бўлиб орттирган тажрибаси унга далда берар эди.

Соҳибжон Назаров Мирзачўлга кўчиб кетишга роzi бўлди, орадан кўп ўтмай Йўлдош отадан шундай мазмунда қоғоз олди:

«Мирзачўл район ижроия қўмитасининг раисига.

Мирзачўл районидаги колхозларни мустаҳкамлаш ва Мирзачўл ерларини ўзлаштириш вазифаларининг бажарилишини тезлатиш мақсадида Наманган обlastiga командировкага келган вақтимда Ер ишлари Халқ Комиссарлигининг орденли тажрибакор устаси Деҳқонбой Нурматов билан бирликда партия аъзоси Соҳибжон Назаровни Мирзачўл районига ишга юборишини маъқул кўрдик. Ўртоқ Назаровни ихтиёргизга юбориб, уни районингиздаги бирон колхозга ишга юборишингизни ва ишлаш учун шароит туғдирб беришингизни сўрайман.

Ўзбекистон ССР Олий Совети Президиумининг раиси Охунбобоев».

Мирзачўл район ижроия қўмитаси Соҳибжон Назаровни Октябрь қишлоқ Советига юборди. Назаров бу ерда аввал собиқ «Учинчи беш йиллик» колхозида, бир йилдан кейин у ердаги йирик колхозда раис бўлиб ишлай бошлади.

Мирзачўлдан сўз очилганда Назаров бошда чўл, янги колхоз, синашта бўлмаган одамлар—буларнинг ҳар бири ишда бир қийинчилик туғдирди деган андишага борган бўлса, уч-тўрт ой ишлагандан кейин, бу андишаси ўринсиз бўлиб чиқди: Мирзачўлнинг ўзлаштирилган обод жойларини кўргани ва бу жойларни обод қилган, қилаётган кишилардан ёр-жўралар орттирганидан кейин «чўл» деган сўз унинг учун эски маъносини йўқотди, ҳар чоқ ва ҳар ишда район, область, республиканинг мададкор қўли сезилиб тургандан кейин колхознинг янгилиги ҳам ортиқча ваҳи-

мага туширадиган бир нарса бўлмай қолди: синашта бўлмаган одамлар эса ўзи сингари обод жойларини ташлаб чўлни обод қилгани келган ва шундан шавқ-завқ оладиган ташабускорлар бўлиб чиқди.

Ҳақиқий қийинчиликни уруш туғдирди. Уруш Мирзачўлга завқ-шавқ билан келган, билагидан куч томчилаш, файратидан олов ёниб турган навқирон йигитларни, биёбонга ҳужум қилишда ва биёбондан юлиб олинган ерларни кўпроқ ҳосил беришга мажбур қилишда одамнинг узун қўли бўлган техникани дамига тортди. Бундан ташқари колхоз ва колхозчи топга битта ионини армия билан бўлиб ейиши керак бўлиб қолди.

Ташкилотчилик қобилиятини Мирзачўлда синаб кўргани келган Назаров бу синовдан уруш туғдирган оғир шароитда ўтиши керак эди. Қолхозда асосий куч— хотин-халаж, қариялар, болалар. Машҳур бригадир, Социалистик Меҳнат Қаҳрамони Фанишер Юнусов: «Менинг бригадамда одам кам демайман, майда-чўйда болалар билан ҳам ишлай бераман— менга товуши чиқиб турса бас», деб ўшанда айтган эди. Урушга кетган йигитларнинг кетмонини қўлидан олган, оғир қийинчилик шароитида матонат, меҳнатда ўрнак кўрсатган, қалбининг қуввати билан аёлларга мадад бериб, болаларнинг бошини силаб ишга солган Эргаш ака, Ҳамро бобо, Ҳусайн ота, Саидаҳмад бобо сингари қарияларнинг номи ҳеч қачон ўчмайди. Ўша йиллари мактабидан қайтиб, далада, дала шийпонида катталарага қарашган, ғўза ичиди боши аранг кўриниб пахта терган, партуқ орқалаган, юмалаб-юмалаб қоп судраган, уйида онасига қарашиб унинг бағрини тўлдирган Халилшер, Оминахон, Турсуной, Халимача сингари ўнлаб болалар, қизларнинг номи ҳам одамларнинг кўкрагида меҳр қўзғатади.

Мана шу оғир кунларда Соҳибжон Назаров кичикка бош, каттага йўлдош бўлиб ўзининг зўр ташкилотчилик қобилиятини, темир иродасини, эл-юргта бўлган муҳаббатини кўрсатди.

Назаров ўша кунларни эслайди:

— Бир тонна буғдой бўлса ишни яшнатиб юборар эдик, деган пайтларимиз кўп бўлган. Уруш давридаги қийинчиликларни енгишда белимизга қувват бўлган нарса, урушда енгиб чиқишимизга жуда қаттиқ ишонганилигимиз бўлди. Йигит-қизларнинг, қарияларнинг дилида душманга бунчалик газаб, ғалабага шун-

чалик ишонч бўлган. Ватан деганда кўнрагида шунча меҳр-муҳаббат, ғайрат, билагида шунчалик куч пайдо бўладиган халқ қўллаган аскар ҳеч қаочон, ҳеч қаерда енгилмайди.

Республиканинг ишчи кучи, бойлиги, техникиси урушга сафарбар бўлган, Сталинград фронтида немис-фашист босқинчиларига қарши ҳаёт-мамот жанглари бораётган кунларда халқ Фарҳоддек улкан қурилишни бошлаб, Сирдарёни ўз иродасига бўйсундирган ва урушдан кейин мамлакатга нур, Мирзачўлга сув беришини кўзлаган экан, ўша шароитда колхоз, колхозчилар урушдан кейинги равнақ учун замин тайёрлаган, урушдан кейинги икки-уч йил ичидан, дарҳақиқат, барқ уриб ўсган бўлса не ажаб?

— Қийинчилик ақлнинг ҷархи-ю, ғайратнинг қайроғи бўлар экан,— дейди Назаров,— ўша йиллари хумонсиз ғишт пишириш йўлини топган эдик. Ғиштсиз, гувалаксиз иморат солиш йўлини кўзлаган эдик... Шундоқ қилган эдик ҳам...

Колхоз урушдан кейинги икки-уч йил ичидан пахта ҳосилини қирқинчи йилдагига қараганда қарийб икки баравар оширди. Ҳар гектар ердан етмиш-саксон центнер пахта ҳосили оладиган бригадалар пайдо бўлди. Ҳўжалик тармоқлари орта бошлади. 187 от, 193 қорамол, 3220 қўй, парранда, сабзавот...

Ҳозир уруш йиллари тортилган қийинчиликлар бир тушдай бўлиб қолди, лекин тўкилган тер баракали самарасини бераётиди. Уша йиллари тикилган данакдан бино бўлган 25 гектар боғда республиканинг қайси райони қандай мева билан ном чиқарган бўлса, ўша меванинг бир неча хилини кўриш мумкин. Республикада мавжуд бўлган олтита мевачилик иммий муассасаларининг тажрибалари, кўчватзорлари, дидлик, ҳафсалалик боғбонларнинг назаридан четда қолган эмас. Колхоз шу боғдан 1954 йилда 210 минг сўм даромад қилган бўлса, ўтган йил 720 минг сўмга етди.

Колхоз ҳўжалигининг бошқа тармоқлари ҳам мана шундай тез ва яхши тараққий қилаётиди. Чунончи ҷорва 1954 йилда 480 минг сўм даромад берган бўлса, ўтган йил 1 миллион 600 минг сўм даромад берди. 464 гектарга экилган дон, 300 гектар беда, сабзавот ҳам кам даромад бермайди. Бироқ колхознинг асосий даромадини, албатта, пахта беради. Колхоз ўтган йил

1300 гектарга экилган пахтадан 34 центнердан ҳосил бўлиб, 14 миллион сўм даромад қилди.

Колхознинг умумий даромади сўнгги уч йил ичидан тўрт миллион сўм ошди.

Катта даромад колхоз ҳўжалигини яна кенгайтириш, мустаҳкамлаш учун кўп ишлар қилишга ва шу билан бирга колхозчиларнинг моддий ва маънавий эҳтиёжларини кўпроқ қондиришга имконият берди.

Колхоз урушдан кейин 12 хоналик идора, 40 ўринли меҳмонхона, 8 ўринлик туғруқхона, 15 ўринлик қасалхона, 13 хоналик ясли, юз болага боғча, аптека, амбулатория, беш юз кишилик клуб, суткасига 500 киши чўмиладиган ҳаммом, юз точкалик коммутатор, минг точкалик радиоузел, тўртта янги типдаги молхона, юз отга отхона, йигирма машинага гараж солиб, буларга ўттиз беш миллион сўмдан ортиқча пул сарф қилди. Бундан ташқари, 350 хонадон катта ўйларга солинган икки-уч хоналик баҳаво, ёруғ уйларга кўчиб кирди. Дидли, завқли кишилар одамнинг суқи кирадиган чиройли ҳовлилар қилиб олишган: гулзор, ток, ёш қора толлар соя солиб турган сўри, ҳовуз... Токнинг нариги томони боғча: резавор, анор, анжир, гилос...

Бу йил колхоз уйларида, кўчаларида боғ ва чорбоғларида Фарҳодгэс шуъла сочади.

КПСС Марказий Комитети ва СССР Министрлар Советининг 1956 йил августида «Пахта етиштиришини кўпайтириш учун Ўзбекистон ССР ва Қозоғистон ССРдаги Мирзачўлнинг қўриқ ерларини сугориш ва ўзлаштириш тўғрисида» деб чиқарган тарихий қарори Мирзачўлни ўзлаштириш тарихида янги давр очди.

Қўриқ ерлар бағрида яшириниб ётган туман бойликни юзага чиқариш учун чўлга ёппасига ҳужум бошланди.

Партия ва Ҳукуматимизнинг ҷақириғига лаббай деб бош кўтарган, мана шу ҳужумда қатнашишни истаган азаматлар ҳозир, Мирзачўлга биринчи бўлиб Келган кишилардек зовур қазимайди. Мирзачўлда шу йирик колхоз сингари обод, бардам колхозлар, совхозлар бор. Мирзачўлда техника бор, илм бор; Соҳибжон Назаров сингари чўл ғолиблари, буларнинг қаноти остида етишган ва етишаётган Фанишер Юнусов, Қурбонали Исмоилов, Сақлаболди Норқулов, Мамараҳи-

ФЕЛЬЕТОНЛАР

мов, Қодиров, Муҳиддинов, Йўлдошев сингари юқора ҳосил усталари бор, буларнинг чўлни ўзлаштиришда, юқори ҳосилни етиштиришда орттирган тажрибаси бор.

Партия ва Ҳукуматимиз чақириғи билан бошланган бу ҳужум натижасида Мирзачўл пахта, пилла, дон, анвойи хил мевалар кони бўлган кичик Узбекистонга, гулистон республикамизда бир бўстонга айланди.

1957 йил

САМАРҚАНДДА МАКТАБГА ҚУМАК ҲАФТАСИ

(Бир иона берувчи тилидан)

Мактаба қўмак дебон чиқди товуш вағир-вүгур,
Тегди қулоғима, ёмон қочдим ўзим тасур-тусур.
Борибон ўз дўконима ўлтуриб эрдим бир замон,
Келди етиб комиссия иона деб ғадир-будир.
Ултурғон эрди бир неча ошноларим қақиллашиб,
Ахир, улар зўрлаб мени бер дедилар қақур-қуқур.
Ионани бериб дедим: оғайнилар, хуш келдингиз!
Кетларидан ичим ёниб бўлди тишим газир-гузур.
Чунки саховату карам учраса эрди гар менга,
Ит каби муштлашиб уни тишлар эдим ғажир-ғужур.
Қорин эзур мени пирим, йўли эзур мени йўлим,
Чорлосо эрди ёниға, сўзлашайин чағир-чуғур.
Яъни саховату карам қўймади менга юргали,
Ер тагига ниҳон бўлиб эл кўзидин апур-шупур.

Ниш

«Мұштум», 1923 йил, декабрь, 19-сон

ОИ ҚУИГАНДА

Етти кетмон эгри бўлиб,
Ўнта қозон синди во ёв!

Чиқди шаҳардан бала-бом,
Турли-туман нағоралар;
Уч минг кетмон эгри бўлиб,
Мингта қозон синди во ёв!

Ҳар кўчада доду фифон,
Томга чиқиб айтиб аzon,
Товуқларга келди қирон,
Тамошолар бўлди во ёв!

Қишинаганлар байталу той,
Дуо ўқир Абдуллабой,
Ой ҳам куйиб бўлди тамом,
Қоронгулар бўлди во ёв!

Шунда эшоним дедилар:
Тавба қилсун муслималар,
Дунё тамом! Нишона шул,
Охир замон бўлди во ёв!

Ҳар томонда «ҳу-ҳуву... ҳақ»,
Хожи ойим синдириб тавоқ,
Маҳаллалар тарақа-туроқ,
Маҳшар каби бўлди во ёв!

Тарақлатишининг зарбидан,
Азон айтишнинг кўпидан,
Охир қора куюнди ой,
Уз аслига қайди во ёв!

Эртасига Шервон хола
Олти қозон қилиб бўтқа,

Қиёматдан қолғонига
Худойилар қилди во ёв!

Абдуқодир аъламимиз
Деди: «Замон охир ўлур,
Бўлмаса юртга мингбоши
Хотин-қиздан бўлмас», во ёв!

Қозон-товоқ тўнтарилиб,
Лабга учук чиқди во ёв!

Қиёматингни ваҳмидан
Така-такалар бўлди во ёв!
Ў...во...ёв! Во ёв! Дод во ёв!..

Норин Шилпиқ

«Муштум», 1924 йил, август, 8-сон

ЭШОНИМНИНГ БОШЛАРИДАН ҮТГАНЛАРИ

(Эшон поччамнинг альбомларидан)

Бу ҳам бир достон

Отом эрди бир аҳли илм эшонлардан,
Безор бўлди калта чопон нодонлардан.
Бинобарин, ўғлим подон бўлмасун деб,
Ўқутдилар Ҳафтиягу Куръонлардан.

Бир қанча вақт ўқиб бўлдим муллобачча,
Турпоқ ялаб мадрасада ётдим анча.
Узоқ фурсат таҳсил кўриб, ундан сўнгра
Эшонча деб ном қўйдилар ўзларича.

Отам подшо, мен вазирдек эдим эшон,
Муридлар ҳам иккимиздан шоду хандон.
Узоқ фурсат яхши сурдик давру даврон,
Биз сургандек салтанатни сурмас хоқон.

Давлат тоги раҳна бўлиб ўлди отам,
Мен ятимга қараб қолди мушфиқ онам.
Ўй ичида ўн еттита хотин қолди,
Отомдан сўнг бўлди турли-турли ҳангом.

Ўн олтиси эди менга ўгай оно,
Мендан бошқа йўқдир эди уйда боло.
Урди-сурди жанжал билан ер бўлдилар,
Тўқсон таноб ерни олдим қанчо доло.

Бундан кейин ҳамма мурид менга қолди,
Бутун давлат менга қараб сувдек оқди.
Оз фурсатда эл ичида донгли бўлиб,
Вужудимни каромат деб эл ишанди.

Мен шу кунлар эшон ўғли — эшон бўлдим,
Назр бўлғон қоши қоро бир қиз олдим.
Кун кечирдим, ғам тотмадим, сафо сурдим,
Хоним билан айшу ишрат суриб қолдим.

Кун-тун ўтди, рўза ойи келиб етди.
Муридларим, давлатларим чекдан ошди.
Рўза куни хоқонимнинг ҳужрасида
Падаримнинг арвоҳига сұхбат бўлди.

Рамазоннинг ўн бешида ифторга деб
Хотин-қизлар чақирилди мажлис қилиб.
Отам-бобом арвоҳига дуо ўқиб,
Жаҳру суҳбат қилдук тинмай ёшлар тўкиб.

Даричадан қарасамки, бир нозанин,
Қора қоши, қора қўзи мисли лочин.
Кўнглум қўшин панжасига тез тушурди,
Омон қолмас эди жоним, бу эрди чин!

Эй воҳ, фалак, мен ўлмадим ёшлигимда,
Ҳурлар билан ўйнамадим кавсарингда.
Ҳеч гуноҳсиз ёшлигимда ўлсам эди,
Бунга ошиқ бўлсам эдим бу мажлиса.

Тонг ёришди, хотин-қизлар қўзгалдилар,
Үйларига қайтмоқ учун чоғландилар.
Қизнинг ишқи мени чинлаб тутқан эди,
Хотин-қизлар бир-бир босиб тебрандилар.

Паривашлар кетди, кулбам ўзи қолди,
Маъшуқамнинг оёғини изи қолди.
Бир неча кун ҳушсиз бўлиб, ўзни билмай,
Ишқим ошди, кўнглим тошди, ёнмоқ қолди.

Падар марҳум: ҳолаларни чақиртирдим,
Кўнглимдаги армонимни унга айтдим.
Завчиликка бела боғлади, ҳолам борди,
Қизнинг менга назрлигин кейин билдим.

Оз фурсатда никоҳимга олдим уни,
Ўн бир ёшар бир қизчадир, шаҳло кўзи.
Никоҳ кеча йиғлошидан қўл урмадим.
Қиз йиғлади, оҳ-воҳ билан шу тун ўтди.

Эртаси кеч қизга дедим: нозик гулим,
Хумор кўзли, хуш қоматли, писта лабим.
Йиғламоннинг фойдаси йўқ, ғам тортмағил,
Иктиёри менда бўлгой бор-йўқлиғинг!

Зарда билан сапчиб турди пари пайкар,
Хой дегүнча кўкрагига урди ханжар.
Ҳушим кетди, эсим оғиб қотиб қолдим,
Ҳушим тўплаб қизга боқсан жонсиз ётур.

Бу воқиа элу ҳалққа машҳур бўлди,
Элликбоши воқиани келиб кўрди.
Бу тўғрида мени айбдор қилмақчиди,
Домла-имом пул қистириб қутултириди.

Имом-домла ёлғонларни ёмлаштириди,
Жасадини қабристонға элтиб қўйди.
Қиз отаси воқиадан огоҳ эди,
Чурқ этмади, на чорадир, бели синди.

Шунинг билан бу воқиа битиб кетди,
Нозаниним шафқат қилмай ташлаб кетди.
Зарари йўқ, ўн тўрт ёшлиқ бир қиз олдим,
Эсизларким, унинг ўрнин босолмади.

Кўп ўтмади, билиб қолди большевойлар,
Юзсизликка, текширмакка бошладилар.
Бориб бердим большевойға қўрқмай сўроғ,
Хайрон қолиб атрофимни ўрадилар.

Эсизгина, текширганда сир очилди,
Бир ярим йил турмасига қамаб қўйди.
Қамоқда ҳам беш вақтимни тарқ этмадим,
Вақти етди, турмасидан озод қилди.

Ўз уйимга киборона келдим босиб,
Йўл-йўлакай тасбеҳимни айлантириб.
Келсам, ўйда на онам бор, на хотин бор:
Онам ўлган, хотин кетган эрга тегиб.

Муридларнинг ихлосларий мэндан қайтған,
Уялмайин Мустафодан динин сотғон.
На эшон ман, на бошқо ман, ақлим шошди,
Муридларим ёмонларғо бўлди қалқон.

Бир бурда нон тополмайин эшонлиқдан,
Муридларим юз ўғурди нодонлиқдан.
Иш бўлмаса қандой қиласай, бўлдим маддоҳ,
Нима қиласай, кутмагандა урса арвоҳ.

Ўз-ўзимга дедим: «Шайтон сўзи билан
Олмағонда ўша қизни сабр билан,
Нари бўлмас эди давлат ҳамда мурид,
Давру даврон сурар эдим ишрат билан».

Муштум оғо!

Мен юқоридаги ёлғон ҳақиқатларни ўз пийримнинг хотира дафтарларидан ўғурлаб ёздим. Лекин, тақсиримнинг шайтон сўзи билан қилдим деб ҳасрат қилишларига тушунмай қолдим, чунки яқинда ўртоғим шайтон билан сўзлашиб турганимда, «Нега эшонимизни йўлдан уриб расво қилдинг?» деб койий бошлиганимда, шайтоннинг кўзи қийнидан чиқиб кетди, дедики: «Эшон шундақ жиноятни қилиб турган чоғда қаттиқ уйқуда эдим, нима учун яна айбни устимга оғдарадир? Одамларнинг юзсизлигидан жуда безор бўлдим, эшоннинг расволиги бошидан бери қелмасин!»

Муштум почча, мен жуда ҳайратда қолдим, шайтоннинг даъвоси тўғрими ё эшонимизнинг ҳасрати тўғрими? Қани, сиз нима дейсиз?

Норин Шилпиқ

Муштум:

Эшоннинг ҳасратига қараганда, шайтоннинг даъвоси тўғрироқдир, чунки шайтон эшонлардан кўра ростгўйроқдир.

«Муштум», 1924 йил, 7 ноябрь, 14-сон

УЧРАШГАНДА

Кичик фельетон¹

- Ассалому алайкум!
- Ваалайкум ассалом... Эй, қалайсиз?
- Мен сизни қаерда ҳам кўргандек бўламен, аммо эслаб ололмадим-да...
- Қўқонда кўргансиз-да, илгари икковимиз жуда яқин эдик-ку...
- Эй... ха, ҳа, дарвоқе, эсимга тушди. Қани, қайтадан бир кўришиб олайлук. (Кўришурлар.) Қўқон қалай, урди-сурдилар йўқ бўлиб кетгандир-а?
- Аллақачонлар тинди.
- Албатта шундай бўлиши керак эди. Хўш, мактабларнинг ҳолидан келинг, қалай?
- Албатта, Қўқонда юз-икки юз мактаб бор эдики, ундан хабар ололмасмудук...
- Ҳали мактаблар жуда озми, қанча бор?
- Атиги икки интернат (*оч болалар интернати*). Яна битта ўша ўзингиз билган сийقا тангадек дорулмуаллимин (яқинда у ер-бу ердан йўниб олиб техникумга айлантирилган). Ундан бошқа майда-чўйда мактаблар бор, уларнинг ҳолидан сўзлаб ўлтиришдан кўра дардига даво тилаганимиз ортиқдир.
- Үқишилар қалай ёки ҳаммасининг ҳам биқининг от тепганми?
- Бу томонини сўрамангиз, анув икки интернат, ча-канга-чукана мактабларни қўя туруб, кўзимизнинг қорачигидек муҳим бўлғон дорулмуаллимидан бир шингил сўзлаб ўтайнин.
- Қани, хўш?
- Мен яқиндаги Андижонга саёҳатимда вагон ичидага бир билим юрти ўқувчиси билан тасодиф келдим. У бола билан бир оз сўзлашгалим натижасида худди офтобда қаттиқ ичган қариндош чиқиб қолдук. Албатта, ма-

¹ Асар «Муштум»нинг 1924 йил 5-сонида босилган.

сала тўғридан-тўғри билим юрти устига бурилди. Унинг айтишига кўра, билим юртида бериладиган риёзиёт дарси жиққа арабча бўлур экан, агарда бирорта даққи хира хандонлардан кириб қолса, билим юртидан билим олиш ўрнига миясини ачиган қатиқдек суюлтириб чиқади. Ҳалиги ўқувчидан «Сиз қандай, тушунасиз?» дегаида, «Эй... ҳадеб пайдан қолмасангиз, тушунасиз-да», деди.

Қоторимиз Асака станциясида тўхтади, бола тушиб кетди, эсизларки, мен нима учун арабча дарс берилиши сабабини сўролмай қолдим.

— Сабабини мендан эшитинг, афанди. Қўқондийларни билувчи камина-да, унинг сабаби мана бундай:

Араблар илгари маданият, шони-шавкатларини йўқотиб сирри валқо йироқ бўлғонларидан кейин, араб зиёлилари ўзлари ўрталарида бирлик ясаб, Фарғона зиёлиларидан имдод сўрағонлар, Фарғона ёшлиари ҳам у аризага «Қабул» деб қарор қўйиб, Қўқон билим юртидан кишилар тайёрлаб юборамиз, деб жавоб қайтарғонлар. Мана, билим ютидаги арабча дарснинг ҳақиқати шундайдир. Ўтган қишида ҳам билим юрти программасига арабча дарс киритмоқчи бўлиб бир қўзғолиш ясағон эдилар, билмадим, давом этдими, этмадими?

— Ҳа, ҳа. Ўзбек миллати ҳам бошқаларга раҳбарлик қилмоқчи денг?

— Бўлмаса-чи.

Яланг оёқ

БИЛДИРИШ

(Фельстон)

Бутун Фарғона мўмин ва мусулмон оға-иниларга маълум ва равшан бўлсинким: Қўқон шаҳрида ўзининг дуохон ва табиблиги билан маъруф ва машҳур бўлиб кўп беморларни осонгина тинчтиб қўядиган «Чўлоқ домла» бир оз фурсат ишни йиғиштириб мусулмонларни ҳасратга қўйган эди. Илтимос устига илтимос ёғилавергандан кейин яна ўз ишларини бошлаб юбордилар.

Ишлари: иссиқ-совуқчилик, қайтарма, жинтумор, балотумор, касал ўқиш, жинни тузатиш ва ҳоказо.

Шифо истаб келувчилар қуйидаги шартларга риоя қилсалар, ҳар икки томонга фойдалидир:

1. Эрлар—9 ёшдан 19 ёшгача.
2. Хотин-қизлар —9 ёшдан 90 ёшгача.

Бу ёшдан юқорилари ёки қуйидагиларга дуонинг таъсири бўлмаслиги бир қанча тажрибадан кейин исбот қилинди.

Қабул қилинадиган касаллар:

Қиндингига бод тўхтаган, кўкраги шишган, туғмайдиган хотинлар, ишқ дардига мубтало бўлган лайлилар, мажнунлар, парилар, юқ ташлаган келинлар. Айниқса, хазонрезги, тошқизиги вақтида қайталанадиган жинни ҳамда арвоҳ урганлар ва бошқалар...

Дорилардан намуналар:

1. Қўзиқориннинг барги, ҳавонинг ёғи, сўнгра мўрининг қуруми, чилимнинг суви, араванинг ғиж-ғижи ва бундан бўлак турли-туман атторнинг қутисида йўқ дори-дармонлар.

Жинниларни тузатиш борасидаги икки сўнгти тажрибамиз Қўқоннинг Миртоҳир маҳалласидаги донгли бир жинни устида бўлади. Ташреҳ учун саккиста белкурак, еттита кетмон буюрилди. Дори учун энг муносиб Ҳамроқулов қорининг ашула айтганда чиқарган тери лозим кўрилади.

Адрес: Қўқон, маҳалласи ҳаммага маълум.
Домланинг илтимослари билан: Норин Шилтиқ.

АФАНДИНИНГ ИҚРОРИ, ҮЗИДАН ҚЕЙИН...

Бу кунги газетанинг икки бетли бўлиб чиққанидан қувонган Маъруф афанди, баъзи журналларнинг ўз вақтидан кечикиб чиқнишидан шундай хаёлга келди:

Қоғоз кифоя қилмайди, матбуот кадрлари йўқ, ҳозирги чиқиб турган газеталардан бир нечаси бекилишга маҳкум. Буларни давом эттириш большевикларнинг қўлидан келмайди.

Мундай хаёллар уни шундай қувончли ишончларга олиб бордики, почтанинг «бу кун газеталар келмай қолди» деган жумласидан ҳам ўзича турли маънолар чиқараидиган бўлди.

Бироқ, унинг хаёли — хаёлича давом этди, ҳақиқат ўз йўли билан бора берди.

Маъруф афанди бир кун районда алоҳида район газеталари чиқарилиши ҳақида хабар эшилди, у:

— Ана холос, бизнинг бутун Туркистон учун чиқарган «Садои Туркистон» газетамиз ва «Ислоҳ» журнализмининг тиражи мингга етмаган эди-ю, ҳали шунча жумҳурият газета ва журналлари туриб, район газеталарини ўқийдиган одам қайда?

Большевиклар қўлларидан келмайтурган ишга нега уринадилар? Ахир, Ўзбекистонда бизга ўхшаган саводлиларни лотинча деган янги алифбе чиқариб саводсиз қилиб қўйдилар. Энди 82 районда 82 газета чиқса, уни ким ўқийди?

Аввали шуким, қоғоз йўқ, босмахона йўқ, ҳарф тेरувчи йўқ, машина йўқ, газетада ишлайдиган матбуот кадрлари йўқ. Ҳаммаси топилганда ҳам — чиқадиган газеталарни ўқувчи йўқ...

Шу хилда хаёллар Маъруф афандининг дилига таскин берса ҳам, район газеталарининг бирин-кетин чиқиб туришлари уни асабий хасталикдан руҳий касалликка олиб борди.

Биринчи босилишда 500 нусха чиқсан район газетаси ҳозир 4—5 минг нусха чиқди. Демак, Маъруф афанди ўйлаганча «йўқ»лар ҳаммаси бор, йўқлари борлиққа чиқарилган.

Маъруф афанди бунга ишонмади. Мумкин эмас!— деди. Лекин қайдандир унинг қўлига газета-журналларнинг номлари ёзилган бир китобча тушди. Газета-журналларнинг рўйхатларини кўриб аччири чиқди.

— Бир-иккита каттароқ районда чиқиши мумкин. бироқ, 70га яқин районда маҳсус газеталарнинг чиқиши нотўғри. Большеевиклар ёлғон ёзидилар. Биз бутун Туркистон учун чиқарган 2—3 газета-журналга ўзимиздан бошқа ўқувчи топа олмаганимиз ҳолда, биргина Ўзбекистонда шунча газета-журнал? Бу ёлғон!!!— деб қичқирди.

Маъруф афанди ўйлади:

— Балки тўғридир, бундан катта ишларни қилаётган большевиклар буни ҳам эплай олгандирлар. Лекин ўз кўзим билан кўраман-да, сўнгра ишонаман...

У илгари қироатхонага кириб, келатурган газета-журналларни кўздан кечирмоқчи, агарда бирортаси кам бўлса, қироатхона мудири билан кўйлакдан ёқа қолгунча олишиб, большевикларни сўқиб олиш, мудири шарманда қилиш фикри билан қироатхонага юрди.

Маъруф афанди қироатхонага кирганда, мудир янги келган газета-журналларни стуллар устига ёйиб турган эди. «Қани, териб бўлсин, сўнгра сўзлашаман», деб кутиб турди.

Катта столнинг икки томони газеталарга тўлиб, жой ҳам етишмай қолди. «Сариосиё ҳақиқати», «Пахтачи», «Қурилиш», «Зарбдор», «Марғilon ҳақиқати», «Социализм байроби», «Ленин йўлидан», «Коммуна», «Кохозчилар товуши»... ва ҳоказолар Маъруф афандининг қўлидаги рўйхатидан ҳам ортиқ.

Маъруф афанди, мудир билан ёқа йиртиш ўрнига, «оҳ» деб йиқилди. Юзига сув сепдилар—кўзини очди.

Маъруф афанди ҳозир илгари онгли афанди эмас, тош қизиги, хазонрезги ва чиллада авж олиб, ўз ёқасини ўзи йиртатурган девона. У—ўз-ўзидан алланарсаларни жавраб юради:

— ...Мумкин эмас... миллат... дин... йўқ... бўлса... мен... ватан... қарши эмас... кетди... қарши эмасман... лекин кетди...

Маъруф афанди том маъноси билан жинни ҳолга

келди. Дўхтилар уни руҳий касаллар хастанонасига юбордилар. Унда ҳам:

...Ҳақиқат... Қурилиш... Ленин байроби... Колхозчи...
Зарбдор... Пахта... Социализм... Коммуна...— каби сўзларни тақорролаб юрганишини сўзлайдиilar.

Фақат бу сўзларни соғлиқда икбор қилишга афандилик вижданни йўл бермади.

A. K.

«Муштум», 1933 йил, 8-сон

ИИГЛАТГАН КУЛГИ

Мажлиснинг бошланишига ҳали роса икки соат бўлса ҳам залда одам кўп, гап-сўз, кулги, ғовур...

Эшикдан кирган ўрта бўйли, қорин қўйган, йўғон, хушмўйлов йигит илижайганича девор остидан юриб бориб, партком масъул котибининг ёнига ўтири ва қўлидаги китобларини олдинги курсига қўйиб, масъул котибга папирос тутди.

— Кечаги чиқишингизда жуда бопладингиз-да, Қўчкор ака, жуда яхши гапирасиз-да. Бошқалар гапиргандан одам... зерикеб қолади, сиз ўн соат гапирсангиз ҳам одам яна эшитсан, дейди.

Масъул котиб унинг сўзига эътибор қилмасдан ёнидаги одам билан сўзлашишда давом этди. У одам туриб кетгандан сўнг бу йигит унинг пинжига кириб яна давом этди:

— Жуда озибсиз-да, Қўчкор ака, бир ўзингизни боқсангиз бўларди. Гўшт бўлса, қимиз бўлса.. Ишлардан бўшанг, ўзим боқقا олиб чиқиб кетаман. Қимиз сероб, гўшт ҳам.. Чиқасиз-а? Қачон чиқасиз?

Масъул котиб худди эшитмагандек, орқасига қараб кимнидир қидирди, сўнгра ўрнидан туриб кетди. Йигит атрофга қаради ва китобларини олиб ўрнидан турдида, ҳали у тўпга, ҳали бу тўпга бориб ўтириб, папирисини тугатади.

Агар бу одам қимизу гўшт тўғрисида гапирмаса ва ҳар кимнинг олдида насияга улгуржи мол сўраган дўкондордай эшилавермаса, мен уни мутлақо танимас эканман. Бундан уч йил илгари у, қора, қотма, кўримсиз бир йигит бўлиб, бизнинг мактабдаги ёпиқ дўконда нон сотадиган эди. Бир куни студентлар ғалва кўтаришиди: «Бу одам бизнинг ҳақимизга хиёнат қилади—кесиб олган нон билан тарози палласига шундай урадики, бир парча нон беш қадоқлик тошни ҳам босиб кетади», дейишади. Шундан кейин профкомда буни ишдан бўшатиш тўғрисида гап бўлди. Эртасига у синфбошининг уйнга бир чёртварт қимиз ва беш қадоқ гўшт кўтариб келиб, профкомда миллатчилик борлиги, совет даврида шундай миллатчилик бўлганига чидай олмаслигини арз қилди ва бутун синфдаги студентлардан

«Шу одам яхши» деб иттифоқнома ёздириб беришини илтимос қилди. Биз иттифоқнома ёздик. Бироқ, у айтганинг тескариси бўлди. Ҳаммамиз бир оғиздан шу одамнинг тездан бўшатилишини талаб қилдик.

Мен уни танидим. У ҳам мени таниди ва мен сўрашгани ўрнимдан турмасдан бурун югуриб келиб таъзим билан қўл узатди.

— Саломат бормисиз?.. Одам соғиниб қолар экан... икки-уч марта бордим. Борда узумлар хазон бўллаёзди. Қимизлар жуда тобида. Бир чиқмасангиз сира бўлмайди. Бу ерда ўртоқларингиз бордир. Мәсалан, Қўчқоров акамни биласиз? Қачон чиқасизлар? Мен сизни қаерда кўраман? Қўчқоров акам билан ҳозир гапиришиб қўйинг...

— Шу ерда ишлайсизми?

— Ҳа, ҳар хил масъул ишларда юриб, командировкадан зерикдим. Менга шу дўкон иши яхши. Ҳозир ёпиқ дўконда мудирман. Бир марта Московга командировкага бориб, бир ҳафтада қайтадиган одам бир ярим ой қолиб кетибман. Москов жуда обод шаҳар экан. ГУМ деган магазинини айтинг. Катталар ҳам шу магазиндан мол олишар экан. Оғзимни очиб айланиб юриб билмасдан ўзимни ўртоқ Будённийга уриб олибман. Бир хижолат бўлдим. Кейин танишиб қолдик. Уйига таклиф қилди. Ваъда бериб, бормадим, чунки у вақтда ҳали партияга номзод эдим, холос.

Мен камгап. Шундай одам сергап одам билан дуч келса, бир ҳафталик гапини бирпасда тўқади. Бир соатнинг ичида нималар демади. Унинг боғига ҳамма комиссарлар бориб туради. Унга ҳамма комиссарлар ҳар нарса ваъда қиласверади, ваъдасига вафо ҳам қиласди. У Комиссарлар советига пропускасиз киради. Дунёда ундан яхши, ундан обрўли киши йўқ, аммо уни бу идорада ҳеч ким билмайди. Атайлаб ўзини паст олиб юради.

Зал одамга тўлди. Тозалаш комиссияси ўнашиб, раис мажлисни очиқ деб эълон қилганда йигит менинг тиззамга туртиб:

— Шу одам менга қарши, бунинг акасини мен газетада урдирганинан,— деди.

Ўзи қалтирас, филт-филт этиб тупугини ютар эди.

— Сизга қачон навбат келади?

— Бизга бари бир... бир-икки кишидан кейин навбат келади.

Шундай бўлди, навбат келди. Йигит минбарга чиқиб, белгиланган ярим соатда таржимаи ҳолини, «қаҳ-

рамонона» курашлардан иборат бўлган саргузаштини айтиб берди. Сўнгра саволларга кўчилди.

— Сиз партияга қайси ячейкадан ўтгансиз?— деди залдан бир киши.

— Ячейкадан эмас, қишлоқда, ўртоқ... Шоабдуфаттоҳхўжаев ўтказиб, кейин ячейкага борганинан. Партия билетини йўқотганим учун...

Раис бутун гавдаси билан унга ўгирилди ва юзига узоқ тикилиб турди-да, кулди. Сўнгра деди:

— Хўп майли, XVII партия қурултойида ўртоқ Сталин нима тўғрида гапириди?

— Ҳамма тўғрида гапириди. Ҳаммага маълум нон савдосига жавоб берилсин, деди. Аъзолик ҳақини камайтирилсин, деди. Меҳнаткашлар ҳукуматига фойда бўлсин деб ноннинг нархини қиммат қилинсин, деди.

Залда кўтарилиган кулги раиснинг савол бериши билан босилди:

— Яна нима деди?

— Яна... ҳар нарса деди. Нима дегани маълум.

— Сизга ҳам маълумdir, ахир?

— Албатта. Ўртоқ Сталин ўзининг тарихий докладида сиёсий боронинг раҳбарлиги остида... ҳаммага маълум... Ўртоқ Икромовга пахтани оз берәтирсизлар, деди...

Раис яна ўзининг саволи билан залда кўтарилиган кулгини босди:

— Сиёсий бюрода кимлар бор?

— Ҳамма бор... ҳаммага маълум, ўртоқ Сталин ҳам бор. Кейин ўртоқ Будённий, сўнгра ўртоқ Калинин, ўртоқ Ворошилов, ўртоқ Челюскин.

Кўтарилиган қаттиқ кулги узоқ давом этди. Шу топдаги ҳар бир секунд йигитга бир аср туюлиб, тоқатсизланди. Кейин бўғилди ва томогининг томирларини чиқариб қичқирди:

— Мен ўз ячейкамда ўтсам бўлар эди. Фирқа ячекасининг масъул котиби менга душман бўлгани учун мени зўрлаб шу ерда ўтишга мажбур қилди.

Залда яна кулги.

— Нимага куласизлар, бефирқалар чиқиб кетсин... Ҳар кимнинг ҳам бошига тушадиган иш бу!..— деди йигит бўғилиб. Яна кулги кўтарилиганидан кейин йифлаб юборди-да, минбарни ташлаб чиқиб кетди.

«Ҳикоялар» китобидан, ЎзССР
Давлат нашириёти, 1935 йил

ҚАНОТСИЗ ЧИТТАК

I

Кимга «Читтак» деб лақаб қўйса бўлади ва у нима учун эрталаб наҳорда бир пиёла совуқ сув ичади?

Цеҳ комсомоллари чиқарадиган деворий газетада «Викторина» ўйини бор, ундаги саволлар кўпроқ техникикани ўрганиш, сиёсий саводни оширишга хизмат қиласа-да, баъзан цехдаги камчиликларни йўқотишга ҳам қаратилар эди.

«Читтак» ким ва у нима учун эрталаб наҳорда бир пиёла совуқ сув ичади?

Бу савол кун бўйи кулгига сабаб бўлди. Ҳатто ўша сув ичадиган одам—ингичка, новча йигитнинг ўзи ҳам сариқ, эгри тишлигини кўрсатиб илжайди ва ёнидаги шеригининг:

— Үлгундай безбет экансан-да, Набигул!— деб берган дашибонига одатдагича масхарабозлик билан жавоб берди.

— Қандай қиласай, ўртоқжон, ўзимга қолса шундоқ бўлсин дебманми.

Унинг асл исми — Наби. Ўзининг ашуласи, чолғу ва қизиқилиги билан суҳбатларни гуллатгани учун маҳалладаги улфатлари уни «гул»—«Набигул» деб атаганлар.

Лекин завода уни Набигул эмас, «прогул» дейишиди. Аммо бунга ўзи ранжимайди, чунки бу лақаб ўз зарарига қўзғалган жиддий гапни баъзан кулгига, ҳазилга айлантириш омили бўлади. Агар ишбоши унинг ишга нега кеч келгани, ё бўлмаса бирон ишни нобоп қилгани тўғрисида жиддий сўрар экан, шу жиддиятни юмшатиш учун ўзига «прогул» лақабини тақиши эмас, бузоқ бўлиб маърашга ҳам тайёр.

«Читтак»—Набигул эканини овқат вақтида ҳамма билди, аммо унинг нима учун наҳорда сув ичишини ҳеч ким айттолмади.

Бу заводда, ҳамма заводлардаги сингари, ошхонада ударниклар столи алоҳида. Набигул овқатини еб,

шу столлар ёнидан ўтиб кетаётганида бир кекса ишчи унинг билагидан ушлаб, ёнига ўтқизди. Бу ерда деворий газетанинг муҳаррири ҳам бор эди.

Кекса ишчи сўнгги гўшт парчасини оғзига солдида, қўлининг орқаси билан мўйловини артиб, Набигулга юзланди.

— Читтак сенми?

Ҳамма кулиб юборди. Кекса ишчи газетанинг муҳарририга қараб.

— Нега бунга «Читтак» деб лақаб қўйдиларинг?— деди.

Нариг столда ўтирган кимдир оғзига солган овқатини ютаётib, палағда товуш билан жавоб берди:

— Нимагаки, шоҳдан-шоҳга сакраб юради.

Газета муҳаррири ва бу ерда ўтирган бошқалар ҳам шу гапни маъқуллашди. Кекса ишчи бармоғи билан мўйловини силаб кулади.

— Болалар, читтак нима учун шоҳдан-шоҳга сакршини биласизларми?

Бирор «овқат қидиради» деди, бирор «унинг табиати шундай» деди, аммо ҳеч ким қушларнинг ичидаги ёнг қўнимисизи, беқарори читтакнинг бу қилифи тўғрисида аниқ бир нарса дейлмади. Кекса ишчи қўлини кўтариб, ғовурни босди:

— Буни мен ҳам билмайман, аммо болалигимда бир афсона эшигтан эдим: Сураймон пайғамбар ҳамма жониворларнинг тилига тушунадиган, ҳамма жониворларнинг подшоҳи бўлган эмиш. Читтак унга «кавушинг эгри» деган эканми, уни ғазаб қилган эмиш: менга бир ҳасса толиб кел, ҳасса тўғри ҳам бўлмасин, эгри ҳам бўлмасин деган эмиш. Шундан бери читтак шундақа ҳасса излаб, шоҳдан-шоҳга сакрар эмиш. Унинг бир шоҳга қўниб «чиқ» деб бошқасига сакраши «мен излаган новда бу эмас» дегани эмиш. Агар «читтак» деб лақаб қўйган киши мана шу афсонани билса, Набигулга жуда мувофиқ лақаб қўйинти.

— Читтак шоҳдан-шоҳга сакраб тўғри ҳам эмас, эгри ҳам эмас калтак изласа, Набигул заводдан-заводга сакраб нима излайди, дейсиз-да?— деди газета муҳаррири.

— Ҳа, баракалла!—деди кекса ишчи ва Набигулга қаради.—Хўш, сен нима излайсан?

Набигул нима дейишини билмай, у ёқ-бу ёққа қарди, сўнгра икки қўлини икки сонига тап-тап урди-да, баланд, ингичка товуш билан хўрозд бўлиб қичқирди.

Фовур босилди. Бир лаҳза жимликдан сўнг қулги кўтарилиди. Набигул юрганича ошхонадан чиқиб кетди. Моторлар гулдураб, фидирик пидириб, цехда яна иш бошланди. Ҳали «безбет» деб дашном берган йигит— Қодир Набигулга «ҳолинггавой» дегандай қилиб қарди. Буни Набигул фаҳмлаб, ўзини оқлашга шошилди:

— Буларнинг ҳаммаси хусуматдан, ўртоқжон. Қайси куни эшикнинг олдида арқон тушиб ётган экан, технорук «олиб қўй, оёқ остида ётмасин», деди. Мен олиб қўймадим, «менинг ишим эмас», дедим. Шунга технорукинг ҳам, ишбошининг ҳам, ана у газетчининг ҳам фаши келди... Айтишиб қолдик.

— Ҳа, олиб қўйсанг нима қиласди?— деди Қодир ҳўмрайиб.

— Ўзинг ўила, ўртоқжон, бу, заводнинг арқони кўп бўлса, гайкаси кўп бўлса, асбоби кўп бўлса... Ҳаммасини олиб қўя берсам, ахир, нима бу... Ойликни оширисин, майли олиб қўяман...

Бу гапга Қодирнинг фаши келди шекилли, кечгача қовоғини очиб қарамади, гап сўраса дўнфиллаб жавоб берди, ҳатто бир-икки жеркиб ташлади.

Цех комсомоллари ҳордиқ куни икки соатлик шанбалик ўтказмоқчи эди. Шанбаликка қанча одам келишини олдиндан билиш топширилган киши цехда рўйхат қилиб юрганда Набигул ташқарига чиқиб турди, гудок бўлиб, ҳамма овқатга чиқиб кетаётганда Қодирнинг олдига келиб йифламсиради:

— Танқид қилинган одамнинг меҳнати ҳаром эканда...

— Нима қилди? Нега меҳнатинг ҳаром бўлади?

— Шанбаликка ҳаммани ёзди, мени ёзмади...

Қодир таажжубланди.

У ошхонада, овқат маҳалида шанбаликка рўйхат қилган кишидан нима учун Набигулни ёзмаганлигини сўраган эди, у киши Набигулни кўрмаганлигини айтди. Набигул эса столга муштлаб ўрнидан турди ва бор товуши билан бақиди:

— Ёлғон гапирма!. Зааркунанда экансан ўзинг, Шанбаликка кўп киши келишига қаршисан. Икки-уч мартаба айтдим, орқангдан эргашиб юрдим. Жўрттага ўзингни анқовлика солдинг.

Набигулнинг ҳозирги ҳолатини кўрганда ҳар кимнинг ҳам раҳми келар эди. Рўйхатга ёзмаган одам «ростдан ҳам шундай қилганга ўхшайман» деб ўйлади шекилли, паст тушди.

Эртаси иккинчи сменадан қайтишда Набигул Қодир билан бирга кетди. Қодир анча юмшарган эди. Набигул ярамас хулқлари бор эканини бўйнига олиш билан Қодирни яна ҳам юмшатди.

— Қани, ростини айт-чи, нега қўнимсизсан?— деди Қодир қулиб.

Набигул унинг бундай савол беришини кутган бўлса ҳам, «худди шуни сўрашингга маҳтал эдим, яхши сўрадинг» демоқчи бўлгандай жавоб беришга шошилди. — Ўртоқжон, мен сенинг раҳбарлигингда одам бўлмани, деб этагингни маҳкам ушлаганман. Сендан ҳеч сиримни яшимайман. Дастрлаб кирган заводимдан ўз ихтиёrim билан кетганим йўқ. У ерда битта-иккита ёмон одамлар бор эди: ўзинг биласан, дунёда ғаламис одам кўп. Бири «бунинг отаси ундей, бундай» деб берди. Бошим кал бўлса ҳам кўнглим нозик— ортиқча гапни кўтара олмайман. Кета қолай дедим. Албатта, мен буни яхши демайман. Отам базос бўлгани билан, мен ҳар кимларнинг эшигига юрганман. Фарғонада бир бойга хизматкор бўлганман. Борсам справка топа оламан, аммо бормайман, ўртоқжон. Шунаقا ишларга тобим йўқ.

— Прогул қилиб бўшаган экансан-ку!

— Йўқ, кейинги заводдан... шундай бўлди. Прогул қилган эдим, аммо бир кун ҳам беваж прогул қилганим йўқ. Аммо справка олиб бўлмайдиган важ. Сендан ақли расо, тушунадиган одам бўлса заводдан кетмас эдим. Бир куни акам ўғлини кестирди. Қандоқ қиласи, умрда бир бўладиган тўйни ташлаб кетиб бўладими? Бир қултум-ярим қултум ичиш тўйнинг зеб-зийнати. Ичгандан кейин ланж бўласан-да, қандоқ қиласан. Эртасига ҳам ишга бормадим. Албатта мен буни яхши демайман. Бир куни мусаллас суздим; сузмасам бўлмас эди, чунки амаким хумини қистади. Бир айтганида бўшатиб бермасам, янаги сафар бермайди. Мусаллас сузгандан кейин, қандоқ қилиб сабринг чидайди, тотиб ҳам кўрасан-да. Албатта мен буни яхши демайман. Эртасига кечроқ бўлса ҳам ишга бордим. Аммо картошка ковлатганимда бир-икки кун боролмадим. Мана шу жуда ёмон бўлди—бошқа прогулларни ҳам кўзга кўрсатиб юборди...

— Озми-кўпми боғчачилик иши бўлган бошқа одамларни ҳам биламан, боғчачилик уларнинг ишларига хаал бермайди-ку.

— Қандоқ қиласи, ўртоқжон, бошқа ишларни йигиши-

тирай десам ойлик етмайди. Пул керак. Узим очиқ қўл йигитман. Бир оғайним уйга бореа юз сўм сарф қўлмай жўнатмайман!

Хотининг ҳам ишласин!

Хотин ишласа-ку, «сатта» иликка палов қиласар эдикку-я, лекин хотинимни асти ишлатгим йўқ. Ўзине инсоф қил, хотининг уйда ўсма қўйиб, сурма тортиб йўлингга нигона бўлиб ўтиреа, келиб чўзилганингда бир сидра уқалаб ташласа қандоғу, ўзинг билан бара вар ишдан келиб оғиз очгани қўймаша қандоқ? Албатта мени буни яхши демайман.

Набигул икки гапнинг бирида «албатта мен буни яхши демайман» дейишидан Қодир «шуларнинг ёмон эканлигини энди билган бўлса, демак қилмишига пушаймон, бундан кейин ўзини тиядиганга ўхшайди», деб ўлади. Хусусан, у яхши бир ўртоқнинг ёрдамига, раҳнамолигига муҳтож эканини билдириб, «энди сенинг этагингдан маҳкам тутдим, қайси йўлга бошласанг ўзинг биласан» деганидан кейин Қодир жуда ийиб кетди. Шунинг учун унинг «ҳордиқ оқшоми бизниги борайлик, менга оқ йўл деб фотиҳа бер» деган таклифини қайтармади.

II

Қодир эртаси ҳордиқ оқшоми, ваъда қилган вақтида бориб, Набигулни маҳалла қизил чойхонаси олдида учратди. У, дафтар кўтарган бир киши, афтидан, маҳалла комиссиясининг раиси билан уришар, новча, буқчайғанроқ бир йигит ўртага тушиб уни орқага тортар эди, Набигул Қодирни кўриб газабидан тушди, унинг олдига келаётib дафтар кўтарган кишига бақирди:

— Рабоччикман,— деди кўкрагига муштлаб,—савдоғар эмасман! Қоровулга бергани туғиб қўйган пулим йўқ...

Новча йигит Набигулни жаҳл билан силтади ва итариб юборди, сўнгра Қодирга қараб илжайди-да, қўлини кўкрагига қўйиб:

— Бу лаънатини олиб кетинг,— деди ва келиб сўрашди.

Набигул Қодирни қўлтиқлаб тор кўчага бошлади. У новча йигит ҳам булар кетидан юрди.

— Болладимми?— деди Набигул кетига қараб,—йилига олти сўм эмиш, олти тийин бермасман...

Бу қандай можаро эканини Қодир дастурхон устидагалиги йигит—Набигулнинг акасидан эшилди. Наби-

гулга маҳалладав олти сўм қоровул пули чиқсан экан. Набигул қаёқадир кетиб, Қодир унинг акаси билан ёлғиз қолди. Бу одам Қодирнинг келганига кўп ҳурсандлик билдириб ўзини унга жуда яқин тутда. Қодирнинг иши, турмуши тўғрисида сўраб, яъши томонларига ҳурсандлик изҳор қилди, ёмон томонларига эса афсусланиб, агар шуни бир ҳафта, ҳатто бир кун илгарироқ билганида ёрдам қилиш қўлидан келганини билдириб. Қодир ўз уйини кўкимтири бўёқ билан трафарет қилдириб, шунга мос келадиган абажурга ишқанини ва кўп машаққатлар билан арамг топганини айтгандай таажжубланди:

— Ие, ахир Набигулга бир оғиз айтмайдиларми!

— Айтиб эдим, шекилли.

Бу одам шунча дарғазаб бўлдики, Набигул шу ерда бўлса бир-икки тарсаки урадигандай эди.

— Бизнинг Набигул одам эмас ўзи! Ёшда, ҳали ошна-оғайнигарчиликни билмайди. Минг мартаба айтаман: ҳой, ука, ошна-оғайниларинг бир нарсага зориқ-қанда ҳожатини чиқариш қўлингдан келмаса менга айт, агар етти аждарҳо бараварига оғзини очиб «топиб берма, ютаман» деганида ҳам писанд эмас—топиб бераман! Оғаничи, ҳой, бу дунёда оғани бўлиш кепрак.

Қодирнинг келганига яна ҳурсандчилик билдириди, яна Набигулдан койинди, шундай қадрли меҳмон келишини олдинроқ билмагани сабабли тайёрлик кўролмаганидан нақадар хижолатда эканини айтиб битиролмас эди.

Қирқ ёшлилардаги бир киши кирди. Набигулнинг акаси бу одамни ҳурмати билан қаршилаб, Қодирга «амакимиз» деб таништириди. Қодир бу одамнинг афтидан касб-корини белгилай олмади. У бир тўғрида ўпкалаб, район советининг раисига «бўлди энди, оғайним эмассан, мен билан гаплашма» деган эмиш, аллақандай бир терговчини чақиртириб (чақириб ҳам эмас) хўп сўккан эмиш. Қодир унинг қаерда ва қандай хизматда эканини сўрагани тортинди.

— Мен бу кишининг дидларига қойил бўлдим, амаки,— деди Набигулнинг акаси,— уйларини кўкимтири бўёқ билан трафарет қилдирган эканлар, ҳафсала қилиб, чироқларига шу рангдаги абажур ҳам қўйиптилар. Менинг ҳам дидим чакки эмас деб юрардим, аммо бу кишининг олдиларида тўқим табиат эканиман деб қўй-

дим. Диидни қаранг-а, трафаретнинг рангига мос аба-
жур!

Унинг амакиси Қодирнинг кийим кийишига ҳайрон
қолди: Қодирнинг кўйлаги оқ, галстуғи кўк экан, шун-
дан ҳам бир гўзаллик топди. Шундай қилиб, Қодир
барча гўзал нарсалар ва ҳусннинг «заршуноси» бўлди.

Набигулнинг акаси Қодирга попоп машина билан
гул солинган қора баҳмал бир рўйжа кўрсатди.

— Шоабдуфаттоҳхўжаев икки юз бераман, тез мен-
га бер, дёб ёпиши,— деди аввал амакисига, сўнгра
Қодирга қараб,— у, тўқим табиат бир одам... минг тил-
ла берганда ҳам нега берай!

У Қодирдай гўзаллик заршуносининг бир оғиз сўзи-
ни эштиш учун тўқим табиат кишиларнинг минг тил-
ласидан воз кечишга тайёр эканини ва агар бир юз
йигрма сўм пулга ҳаддан ташқари зориқмаганида бу
рўйжани Қодирга сотишдан кўра текинга беришини аф-
зал кўрганини билдири.

— Мана шу четидан тангадай жойини сичқон ема-
гандা беш юз сўмлик мато экан,— деди амакиси аввал
Қодирга, сўнгра жиянига қараб,— бу кишига бераман
дайсану мени уялтирасан-да. Райсоветнинг раисига вав-
да қилган эдим.

Қодир «ҳа, ўша одам ола қолсин» дея олмади. На-
бигул келди. Унинг кетидан бири най, бири танбур, би-
ри дутор кўтарган уч йигит кирди. Набигулнинг айти-
шича, булар маҳалладаги ҳаваскор созандалар эди.
Машқ вақтида Қодир буларда ҳеч қандай завқ кўрмади.
Ҳаммасининг ҳам қўли асбобда, диққати бўлак ёқ-
да, кўзи жавдирайди, ниманидир кутади, нимадандир
умидвор.

— Бу нима дeng, амаки,— деди Набигул точкадаги
бир чирпит мусалласни кўрсатиб.

— Ақлнинг қайроғи!

— Йўқ, амаки, бу—қасам. Мен бугун қасам ичаман.
Қодиржон акам цех бошлиғи бўлган кундан бошлаб
ударник бўлишига қасам ичаман!

Қодир ўнғайсизланди.

— Қўйсанг-чи, ҳали маълум эмас...

— Нега маълум бўлмас экан,— деди Набигул пиё-
лаларга мусаллас қуяётib,— цех бошлиғи бўлишингиз-
га ичганимиздан кейин албатта бўласиз! Қани...

Қодирнинг цех бошлиғи бўлишига, ундан кейин са-
ломатлигига, яна алланималарга устма-уст бир неча
марта қадаҳ кўтарилди. Қодирнинг боши қизиб қолди.

Набигулнинг акаси бир навбатини Қодирга «сўна» қил-
ди. Қодир кўнмади. Набигулнинг амакиси илтимос қил-
ди. Қодир узр айтди. Томоғи тақиллаб ўтирган дутор-
чи «кўтармасалар ичмасинлар» деса ҳам Набигул
унамади. Қадаҳ тўхтаб қолди. Дуторчи дуторнинг қуло-
ғини жаҳл билан қаттиқ бураб, торини узиб юборди.
Суҳбатдан нечукдир файз кетди. Қодир бошқа ичмас-
лик шарти билан иккинчи пиёланинг ярмини ичишга
рози бўлди. Набигул Қодирнинг қўлини қўйиб юбормай
Ҳаммасини ичишга мажбур қилди.

III

Қодир уйғонди, у ҳаддан ташқари чанқаган эди,
чойнакда қолган совуқ чойни шимириб, атрофига қа-
ради. Набигулдан бошқа ҳеч ким қолмабди. Қодир На-
бигул мажбур қилгандан кейин яна ичдими, йўқми—
билмасди.

У ўрнидан турмоқчи бўлган эди, боши айланиб йи-
қилди, судралиб обрезнинг олдига борди; у ерда юма-
лаб ётган шишани кўриб кўнгли озди. Ҳушёрликда «шер
билин олишсам енгаман» деган Қодир ҳозир биқинига
ботиб турган қумғонни нари суришга мадори етмас эди.
Не машақатлар билан ўрнидан туриб соатига қара-
ди. Соат тўрт. Юраги жигиллаб кетди. Бир жойга бориб
сира бундай кеч қолган эмас эди. Хотини кўчаларда
юрганмикан! Дарров қайтиш нияти бўлганидан, Наби-
гулниги келаётганини хотинига айтмаган эди. Бу ҳам
майли, лекин шу аҳволда борса хотини нима дейди?
Хотини уни ҳеч қачон бу аҳволда кўрган эмас.

Набигулни уйғотган эди, турмади. Кийинди. Наби-
гулнинг акаси, ана у мисли топилмайдиган рўйжани
ўраб, ихчам қилиб боғлаб, пальтосининг чўнтағига со-
либ қўйған эди. Қодир, рўйжа эсида йўқ, нима экан деб
олиб қарамоқчи бўлди, аммо чўнтағидан суфура олма-
ди, кейин эсига тушди.

Кетди. Йўл-йўлакай инқиллаб борар эди.

Боргандга хотини маст эканини билмаса, кеч қолга-
ни учун бир-икки дўнғиллаб қўя қолса қандай яхши
бўлар эди!

Үйига етди. Эшиги олдида кимдир қоп-қора ҳайкал-
дай бўлиб турар эди. Қодир ҳали бу ким бўлиши мум-
кин эканини ўйлаб етмаган эдики, у киши, кўрди ше-
килли: «Э, ана келдилар, Қодир ака!» деб чақирди.

Бу—маҳалланинг қоровули эди. Қодир товуш берган эди, қоровул: «Бемаҳалда ҳаммани югуртириб қаёқда қолдингиз», деб қойиди ва ҳуштагини чалиб, узоқлашиди. Эшикни очган хотини эканини Қодир билди.

Қодир эшикдан кирар экан, киргандан кейин нима дейинини билмас, нима деса ҳам хотини бақириб берадигандай туюлар эди.

Уйга кирди. Хотини боласини аллалаб ётқизмоқда эди. Қодир ечинди. Хотини Қодирга бир қаради-да, масти эканини билди, аммо ўзини билмаганга содиб:

— Чой ичасизми?— деди.

Қодир «энди бу мени чой ичириб қўйиб жонимни олади-ку» деб ўйлади-да, ерга қараб:

— Йўқ, ҷарчадим, ётаман,— деди.

У ҳозир хотинининг қаёққа бординг, нега бунча кечикдинг, деган сўроғини кутар ва шу сўроқни берса, гап эшитиб бўлса ҳам шу ташвишдан қутулишни хоҳларди.

Хотини индамади. Қодир «энди ётгандан кейин бошлиди шекилли-да», деб ўйлади. Хотини эшикни занжирлади, чироқни ўчирди ва кундагидай ёта берди. «Бу эрталаб ишни катта қилмоқчи шекилли», деб Қодирни вахима босди.

Хотини эрталаб ҳам индамади. Овқатгача, овқатдан кейин ҳам чурқ этмади. У индамаган сайин Қодир азобланар эди. У рўйжа олиб келганини унугтан экан, эснага тушди; уни чўнтағидан олиб, хотинининг олдига қўйди, илжайди; шу баҳона билан ўзи гап очиб, узрини айтмоқчи бўлди.

— Нима бу?— деди хотини рўйжани ёзиб.

— Қаравотнинг тепасига осгани шунақа бир нарса қидириб юрган эдинг шекилли. Жуда ажойиб нарса.

Хотини рўйжанинг у ёқ-бу ёғини кўрди.

— Неча пулга олдингиз?

— Қани мўлжалингни айт-чи.

Хотин рўйжанинг сичқон еган жойига бармоғини тикиб:

— Саксон сўм,— деди.

— Яъни саккиз юз демоқчимисан?

— Ун мартаба камайтириб айтадиган бўлсан, саккиз сўм дер эдим.

Қодир рўйжани ёзиб, синчиклаб қаради; кўзига оддий бозорий рўйжалардан кўринса ҳам, бунчалик мақ-

товини эшиштгани учун сира оддий рўйжалар каторида кўргиси келмас эди.

— Мен, сен билмаймиз-ку бунақа нарсаци. Буни танийдиганлар билади. Агар шу жойини сичқон емаганда беш юз сўм мато экан.

Хотини лабини бурди.

— Сиз неча пулга олдингиз?

— Бир юз йигирма сўм.

— Пулини ҳам бердингизми?

— Олгандан кейин беради-да, киши!

— Кимдан олдингиз?

— Бозордан эмас, пулга зориқиб ноилож сотган бир одамдан... Бунинг хуштори жуда кўп экан, ўзи айтди.

Хотин бошини чайқади ва зорланиб деди:

— Ахир мен буни тўқсон сўмга олмаган эдим-ку!

— Қаерда, қаҷон, бошқадир..

— Бозорда, йўғ-э, кўчада. Ҳеч бошқа эмас, шунинг ўзгинаси. Мана сичқон еган жойи. Эгаси юз сўм сўради. Мен етмиш сўм дедим. Агар сичқон еган ери бўлмаса саксон сўмга олар эдим, дедим. Саксон сўмга берар эди.

— Йўғ-э, бошқадир. Туппа-тузук обрули бир одам райсоветнинг раисига вაъда қилган экан. Менинг юзимдан ўтолмай ноилож берди-ю!..

Хотин индамади, рўйжани тахлаб, столнинг четига суруб қўйди.

Қодир рўйжа хотинига жуда ёқар, бу яхши иши ўёмон қалмишини ювиб кетмаса ҳам, ҳар ҳолда хотинни бир оз юмшатар деган умидда эди. Бу яхши иши ҳам ўёмон бўлиб чиққандан сўнг қунишиди.

Қодир бўлган воқеани бошдан-оёқ сўзлаб берди.

— Мен қанотсиз читтакнинг уйига борган эдим, маълум бўлишича, у ерда қанотсиз қузғунлар ҳам бор экан, деди.

1935 йил

ДҮСТИМНИНГ ОДАТИ

Дўстимнинг бир одати бор: ҳар нарсани ҳар нарса-
га ёпиштира беради. Шунинг учун унга бир нарса ай-
тишга ҳам сўнгги вақтларда юрагим безиллаб қолди.

— Фалончи ҳали ҳам тузук-қуруқ саводини чиқар-
мабди. Ўз онасининг тилини билмайди,— десам,

— Қатта-кичик театрларимизнинг бир қанча актё-
ларига нисбатан бор экан-да!— дейди.

— Ўзашр корректорлари ажойиб одамлар. Ёзувчи
«ғазаб» деб ёэса, «азоб» деб тузатади, таржимон «дил»
деб ёэса, «тил» деб тузатади. Шоир «уян» (камчилик)
сўзини ишлатса, «уят» деб ўнглаб қўяди ва ҳоказо, де-
сам.

— Бу бир касал,— дейди дўстим,— унинг номини
«ўзимгина биламан» деб атайдилар. Соғлиқни сақлаш
Х. К. га билдириш керакки, янги (эпидемия) касаллик-
нинг олдини олмасин!

— Ўзим бир яхши саводлик, ҳатто ёзувчи бўла ту-
риб умримда бир йўл таржима қилган эмасман, а!—
десам.

— Бўлмаса, ёзувчилар союзининг жумҳурияти қў-
митаси сени Масковга—умумий иттифоқ таржимонлар
қурултойига вакил қилиб юборади. Кутуб тур!— дейди.

Чидай олмадим.

— Драматург бўлсан ҳам, а!— дедим.

— Ҳеч бокиси йўқ,— дейди.—Ишқилиб таржимага
қўл урмасанг бўлди!..

— «Ботган кемадаги хазина» деган кинофильмга
«Қизил Ўзбекистон» эълон бўлими «Ҳалок (!) кеманинг
бўйиклари» деб, чала туғилган боланинг номини бе-
ради-я?—десам.

— Эълон бўлими шунаقا ўзи: баъзи-базида ўз
саводсизлигини ҳам эълон қилиб туради. Хафа бўлма,
шундай эълонларни ўқиб кўлиб турсанг, трамвай кутиб
тажангланган асабларинг жойига тушади,— дейди.

— Яқинда марҳум бўлган «Театр» газетасининг яр-
мидан кўп материали таржима дейдилар. Шунга ишон-
гим келмайди. Нима дейсан,—десам,

— Ажаб одам экансан. Ўзбекча саводи йўқ киши-
ларнинг русча саводи ҳам йўқ, деб қайси маҳмадана
айтди сенга?— дейди.— Ўлганларни фақат хайр билан
ёд қиласидилар. «Ярмидан кўпи таржима бўлса ҳам яхши
газет эди, раҳматли!» десанг-чи!

A. K.

«Муштум» журнали, 1936 йил, 4-сон

ҮЗИНГ ШИФО БЕР

— Уҳ... оҳ...вой, вой, вой-е, вой-дод... олло... олло... ўламан. Ҳой, Мавлонқул, кел, оғзимга сув томиз... Вой, одам бўлишими гумон, уҳ...

— Кўйинг, ота, шунақа деманг.

— Иўқ, сен билмайсан, ишим қийин, ўламан, Мавлон. Бор, бор, ғунажинингга қара, туғиб қўйди... Ҳой Хайрулло, оқпадар, қулоғингга пахта тиқдингми?

— Лаббай, отажон?

— Кўрпачанинг тагидаги пулдан 5 тийин олиб чиқиб пол очтириб кел. Вой, оҳ, ху-уудо...

— Ота, полчиға нима дейман?

— Вой, бу оқпадар мени жудаям куйдириб куқун қилди-да, нима дер эдинг: отам касаллар, бир пол қаранг, дейсан, вой-е, вой; вой-ээ, шуни ҳам билмайсан. Марг сендеқ тарбиясиз туғилғонинffa, вой... а, уҳ, вой... худо. Суйган бандангга дард берасан, суюклиқ бандангдан дардни олсанг, нима бўлар экан, вой, вой...

— Ота полчи пол кўриб туриб айтдики, Кўҳинқорининг тескари пири тегибdir. Бир қора қўй сўйиб, худо йўлида хомталаш қилса, кўрмагандек бўлиб кетадир, деди.

— А, нима дединг, бир қўй худойи? Хайрулло, 5 тийиннинг ҳаммасини тутқаздингми?

— Ҳ-ҳаммасини.

— Вой ер ютсин, икки дунёда ҳам одам бўлмайсан. Вой, вой, худо, ўзинг шифо бер. Бор, Мавлонни чақир. Уҳ. Қўй сўяр эмишман. Бели оғримаганнинг нон ейишига қара, вой, қўй, вой-ээ, қўй, қўй.

— Ҳа, ота, нима ишингиз бор?

— Вой, вой... Үғлим Мавлон, бор, домла поччангни чақириб кел, вой, уҳ... Олло. Менга дам солиб қўйсинлар. Вой, жоним.

— Ассалому алайкум. Аҳмаджон, баҳай...

— Уҳ... Бир оз тобим қочди, тақсир.

— Худо сақласин. Майли, зарари йўқ, худо суйган қулига дард берадир. Қани келинг, бир дам солиб қўяй. Тангри хоҳласа кўрмагандек бўлиб кетасиз. Қал Ражабникида худойи бор экан, мени кутиб турибдирлар. Тезроқ бормасам бўлмайдир.

— Ҳўп, тақсир, уҳ...

— Фе гўспандоллокун ва ала хала жойин. Муродатун дангалун, куф... Оғдарма қилиб гунг солуисуф... Қалай, Аҳмадали, тузук бўлий дедингизми?

— Ҳа... та... қ... сир.

— Болам Мавлон, дўхтур-пўхтурга кўрсатмадингизми?

— Иўқ.

— Яхши, ақллик иш қилибсиз. Дўхтур ҳаром ўлдуриб қўяр эди. Мен дам солиб қўйдим, худо хоҳласа эрта-ицдин юриб кетадир. Хайр.

— Шошманг, тақсир, мана, назрни олинг.

— Қойиб нима қиласр эдинг, ўғлим.

— Хайр.

— Хайр, тақсир, яна эртага бир дам солиб кетасиз-да.

— Ота, отажоним...

— Вой, дунёдан ўтдилар, меҳрибоним отам, ғамгузорим отам...

Иннолиллиоҳи ваниноиллоҳи ражинун.

ИШКАЛ

Шимолий Францияда қўймичидан найза еб, бурон-ғи бўлиб келган собиқ ефрейтор Гоппи Бейер Эльвира номли жуда кетворган бир қизга хуштор бўлиб қолган эди. Эльвира унга сира-сира илтифот қилган эмас, кўрганида юзини тескари ўгириб, «афting қурсин, қирқ-оёқ!» дер эди. Софорий жинсидан бўлиб, ўзига бино қўйган кишини ҳашаротга ўхшатиш яхши эмас, албатта. Гоппи ўч олиш қасдида ундан ҳам танноз бир қизга уйланди, лекин бу билан ҳам алами чиқмай, ҳақоратни кўнглига туғиб қўйган эди.

Кунларнинг бирида у, аҳолини болалатиш давлат маҳкамасининг Брауншвейг музофот шуъбасидан қўйидаги баённомани олди:

«Муҳтарам Гоппи Бейер!

Уруш бўлганлиги важҳидан эркак немисларнинг аксарияти фронтда, бинобарин, ердаги эркакларниң яна бир вазифалари шудирки, болалаш ишининг ривожига кўшиш қилиб, бу ерда қолган эркак ва аёлларга ғамхўрлик қилсалар.

Бизлар сизни серҳосил эркак деган қаноатдамиз ва шу сабабли Германия учун муҳим ҳамда мўътабар вазифанинг ижросига киришмоғингизни илтимос қилиб, сизга мурожаат қилдик.

Ва яна маълум қиласмилини, зимманинг юкланган бу вазифа ожизангизга сиздан талоқ бўлиш ҳуқуқини ато қилмайдир. Урушнинг оқибати бўлган бу анчайин дилсиёҳликка ҳар бир ожиза камоли иштиёқ билан бўйин эгмоғи матлуб.

Сизга 9 жувон ва 17 бокира мавжуд бўлган даҳанинг тайин қилдик, бунинг тафсилотини бафуржга баён қилурмиз.

Агарда зимманинг юкланган мазкур вазифанинг ижросига ожизлик қилсангиз, бу ҳақда доктордан шаҳодатнома олиб, ўрнингизни боса оладиган ўзга бирон эркакни кўрсатиб, юқорида зикр қилинган адресга маълум қилғайсиз.

Агарда сиз тайин этилган даҳадан бошқа яна бирон даҳани ҳам уdda қиладиган бўлсангиз, у вақтда васий-офицерлик мартбасига эришурсиз ва серҳосил эркак бўлганингиз учун бериладиган сийловдан ташқари, наслни муҳофаза қилганингиз бадалига қизил лентага қадалган биринчи даражали нишонга эга бўлурсиз.

Шундай бўлган тақдирда алоқа қилишингиз лозим бўлган аёлларнинг рўйхати тез кунда юборилади.

Мазкур рўйхатни олганингиздан кейин хайрли ишни бетўхтов бошлаб, фаолиятингизнинг оқибати хусусида 9 ойдан кейин, маҳсус дастурга мувофиқ, бизга ахборот берурсиз.

Брауншвейгдаги аҳолини болалатиш давлат маҳкамаси (Отта Хенне Вег...)

Бир неча кундан кейин Гоппи «алоқа қилиши лозим бўлган аёлларнинг рўйхатини» олди ва бунда ўша қайсар қиз Эльвиранинг номини кўриб, қичқириб юборди.

— Эльза,— деди хотинига,— мен ҳозир Германия учун муҳим ва мўътабар вазифанинг ижросига киришмоқ учун кетаётирман. Маълум қиласманки, зиммамга юкланган бу вазифа сенга мендан талоқ бўлиш ҳуқуқини бермайди.

Гоппи кетди, бориб, ўзига маълум бўлган қора эшикдаги қўнғироқ тугмасини босди. Эшикнинг пардаси кўтарилиб, Эльвиранинг боши кўринди ва дарҳол эшик очилди:

— Хайл Гитлер,— деди Гоппи.

— Хайл Гитлер,— деди Эльвира ва четланиб Гоппига йўл берди.— Хизмат?

— Мен Германия учун муҳим ва мўътабар вазифанинг ижросига киришмоқ учун келдим. Маълум қиласманки... Урушнинг оқибати бўлган бу анчайин дилсиёҳликка сиз камоли иштиёқ билан бўйин эгмоғингиз матлуб... Нега ҳайрон бўласиз? Мана рўйхат.

Эльвира рўйхатни кўздан кечириб, елкасини қисди.

— Ишқал бўлгандир,— деди,— Германия учун муҳим ва мўътабар вазифани ҳозиргина Ганс жаноблари ижро қилиб кетдилар. У кишининг қўлида ҳам рўйхат бор эди. Мана, эсларидан чиқиб қолибди.

Гоппи рўйхатни кўздан кечириб, ўт бўлиб кетди ва Эльвирага индамай, «Аҳолини болалатиш маҳкамасига жўнади.

Эҳе, бу маҳкамага яқинлашиб бўладими! Бунақа чатоқликларни билгани келган одам сон минг! Бирор

га юборилган рўйхатга ўзининг синглиси кириб қолабди.

Гоппи бутун бу иннинг тўғри бўлишидан умид узиб уйига қайтиб керди.

Иўланда бигта қўлнигаёт турар эди. Гоппи ким келган экан, деб эмилини очиб қараган эди, каравотда кўрпанинг остидан чиқиб турган каттакон сержун Сир оёқда кўзга тушди. Гемин ҳали жунини ўнглаб олмаган эдик, ширманинг орқасидан хотинининг товуши эши билди.

— Гоппи, сенми?

— Мен, у ким?

Хотини ҳали жавоб бермаган эди, каравотда ётган килини бошини кўрпадан чиқариб:

— Хайл Гитлер! — деди.

— Хайл Гитлер! — деди Гоппи.—Хўш?

— Германия учун мұхим ва мўътабар вазифани.. Эльза ширманинг орқасидан туриб, у кишининг сўзини бўлди:

— ...Икросига кирвашмоқ учун келган эканлар. Урупнинг оқибати бўлган...

У киши холинининг сўзини кесди:

— ...Бу анчайин дилсиёхликка Эльза жоним намоли шитиёқ билан бўйин эгдилар.

Гоппи бўшашиб, ўзини диванга ташлади.

Матъум бўлдики, «Аҳолини болалатини давлат маҳкамаси» чатоқ қилибди. Гоппи у киши билан бирга бу ишканни тўғрилагани кетди.

«Кизил Ўзбекистон», 1941, 12 октябрь

ДУНЕ ҚАЧОН ЭРКИН НАФАС ОЛАДИ

Ултан йил баҳорда немис қарбий кинокроникаларидан бирини кўрдик. Буида Франция шахарларидан бири қандоқ олингандиги кўрсалади.

«Ҳарбий обьект» бўлган бутун бошлиқ бир маҳалла да пачакина бир имерат фомбардиндан «омон» қолибди. Бу манзаранинг маъноси маълум: оператор ўз хўжайини Гитлернинг қурол кучини кўрсагмоқчи бўлди. Кўн!

Ула начакина иморатнинг ғимит зипаси устида кичкинагина бир оёқча ётибди... чиқарида, емирилган рўзтор ажжомлари, лягта-путталар орасида учта ўлик. Булардан бирининг одам эканлигини бир елжаси ва опиоқ оскорлидангина билниб бўлади. Иккичиси 7-8 ёнлардаги қиз. Улган қаннари билан чаپ қулоғининг орасини икмадир ўтириб кеттиги. Учинчиси қалиги ғимит зина устида ётган оёқчанинг эгаси — икки ёки иккни ярим яшар бола...

Ёвромада зўр ёнчиларнинг қизғини шульасида ўтириб, емирилган бинодарнинг каробалари остидан сизиб чиқкан юнни, одамнинг бош суюгидан қилинган косаларда ичиб кўймаган дев бизнинг юртимиэга қадам бостанида нималар қилиди?

«Биз, бир гуруҳ разведкачилар, Студенное қишлоғига яқин келганимизда доду фарёд овозини эшитдик. Фашистлар бир қизил аскарнинг уйига ўт қўйиб, унинг хотини, болаларини ўтга ташламоқда эканлар...»

Батальон комиссари Бойлинсон.

«Бронислава қишлоғида немислар болаларни оналарининг кўз олдидаги тириклий ерга кўмиб, сўнгра оналарини отиб ташлашди».

Фронт сиёсий бошқармасининг маълумоти.

«Узоқ разведкага бориб, Пропойск шаҳрига яқин бир қишлоқда немислар подвалдан бир чол, бир қиз

бала ва яна бир ўғил болани олиб чиққанларини кўрдим. Булардан ниманидир сўрашди, уришди; чолни отиб ташлашди, чинқириб йиглаган қизни наизага илиб, улоқтириб ташлашди; болани шунга қараб туришга мажбур қилишди, сўнгра отиб ташлашди».

Взвод командирининг ёрдамчиси Пляшечний.

Аҳолиси йигирма мингдан ошмайдиган Феодосия шаҳрида гитлерчилар бир сафар 917 ва янаги сафар 230 кишини отдилар; бу ҳам камлик қилиб, хони Грузинов—ноинсоф сайдега хизмат қилишдан завқ оловчи кўпакнинг ёрдами билан одам овлашда давом этдилар.

Немис оператори эҳтимол бу манзараларни ҳам қозонилган «ғалабалар» тарзида тарих жиноятлар дафтарига камоли иштиёқ билан қайд қилгандир!

Бу ҳақдаги ҳужжатларни ўз кўзинг билан кўрмасанг, жонли гувоҳларнинг ҳикояларини ўз қулоғинро билан эшитмасант, шунча жиноятлар одам қўли билан қилинаётганлигини, одам одамга шунчалик душман бўлиши мумкин эканини тасаввур қила олмайсан киши. Бутун дунё ўт ичиди. Ер юзидаги энг кичик қабилалардан тортиб, неча юз миллионни ташкил этган халқларгача бу ёнгиннинг жафосини тортмоқда. Хўш, бу манзараларнинг маъноси нима?

Қадимги бир афсона эсга тушади:

Ғалча деган бир тоғнинг камарида бир дев турар экан. У ҳар куни саҳарда камардан чиқиб, то еттига одамнинг бошини ражиб ташламагунча кириб кетмас экан. Кунлардан бир кун дев шу қилигини қилиб турганида бир соҳибқирон пайдо бўлиб, унинг қўлидан маҳкам ушлапти ва: «Эй малъун, бу нима қилганинг?» депти. Дев соҳибқироннинг довюраклигидан ҳам кўра берган саволига ҳайрон қолипти ва «Бўлмаса нима қилай?» деб соҳибқиронга ҳам оғиз солибди. Соҳибқирон унинг жафини айириб ташлабди.

Мана шунинг сингари Гитлерга ҳам «Бу манзарнинг маъноси нима?», «Бу нима қилганинг?» деб савол беришнинг маъноси йўқ. Бошқа нима қилсин? Заҳарга тўлиб кўкарган саратон чаёни юрагингда ётган чақалоқни чақиб чириллатса, қутурган ит хандон-хушон ўйнаб юрган болани пайсалаб ташласа, не ажаб! Бошқа нима қилсин?

Гитлер бошқа нима қилсин?

Бу соҳибқирон унинг жафини тишләми керак. Бу соҳибқирон — шонли Қизил Армия. Қизил Армия ўз тупроғимизда бутун инсониятнинг тақдирини ҳал қилаётиди. Москва, Тула бўсағаларида, Ростов, Қерч, Феодосия, Калуга, Калинин ва бошқа кўп шаҳарларда, Волхов бўйларида, минглаб қишлоқларда Гитлернинг жағи буюк соҳибқироннинг қўлига кирди.

Кичик жиноятчилар ҳоли танг бўлган вақтда қишлоқдан-қишлоққа, шаҳардан-шаҳарга қочиб жон сақлайдилар. Ундан каттароқлари мамлакатдан-мамлакатга қочадилар. Энг зўр жиноятчи Гитлер ҳоли танг бўлганда қаерда жон сақлайди? Ер юзининг қайси қитъасига қочади? Бирон эски қабрдан бўлак жой унга бошпана бўла олмайди. Лекин, унинг кетидан қувган Қизил Армия аскари ўша қабрдан ҳам уни судраб чиқаради; тўкилган қон, кўз ёшлиарини, вайрон бўлган шаҳар-қишлоқларни кўз олдига келтириб туриб, афтига бир туфлайдиу сўнгра отиб ташлайди. Унинг зардоб сингари қони тўкилгач, дунё эркин нафас олади. Албатта шундоқ бўлади!

28. I. 42 йил

Абдулла Қаҳҳор

БАРОН ФОН РИНГ

Бирорки тама риштас қылгуси,
Аминг бирла ўзи осилгуси.

Навоий

Бир атторнинг эшаги шундай ўйлаб қараса, дунёда туришнинг ҳеъ ҳам қизиги қолмабди: аттор ҳар куни азонда оғир юк ортади, ўзи ҳам минади, «хи, исқоти!» деб икки биқинига тепади. Қимлоқ күчалари... «Қизчаларга ўсма келди!.. келинларга сурма келди...» Кеч-қурун қайтилади. Аттор ина «хи, исқоти!» деб оғилга қамайди-қўяди.

Эшак ўзини ўлдирадиган бўлди. Шу ниятда дарё бўйига кетаётса, йўлда иккита одам урушаштиби:

— Хонумонимни барбод қилиб бўлса ҳам оламан!
— Бермайман! Сенга бергунча ана у эшакка бераман!

Эшак тўхтайди, қайрилиб орқасига қарайди ва қулоқларини тикка қилиб ўйланниб қолади: «Хўш, нима экан у? Уч-тўрт кун сабр қилай-чи...»

Бу жанжал эшакнинг жонига ора киради. Эшак қайтиб кетади.

Барон Фон Ринг, албатта, эшак эмас, балки орий жинсидан бўлган бир зот. Барон тўғрисида гапирмоқчи бўлиб гапни эшакдан бошлаганимизнинг важи бор. Бунга сабаб, унинг эшакка ўхшашлиги эмас. Наинки барон эшакка ўхшаса! Эшак деганинг қулоги узун бўлади: бароннинг қулоги мутлақо йўқ: Сан-Маринода бўлган бир карта ўйинида бор-йўгини бой бергандан кейин, чўталчининг таклифи билан минг тилло бараварига қулогини тиккан эди, бир инсон бойвачаси ютиб шартта кесиб ташлаган; ер юзидағи ҳамма эшаклар йиғилиб, минг йил уринганда ҳам битта китобни ўқиёлмайди, барон ўзи якка етти йил мобайнинда «Юз эллик фокус» ҳамда «Ужда атрофида турган француз офицернинг кундалик дафтари» деган икки китобни ўқиб ташлаган.

Барон тўғрисида гапирмоқчи бўлиб, гапни эшакдан бошлашимизга сабаб ана шу китобларнинг иккинчиси бўлди.

Барон Фон Ринг бир куни шундай ўйлаб қараса, дунёда туришнинг ҳеъ ҳам қизиги қолмабди: йигирма ёшдан бу ёғида кўрганлари ва кўраётганлари йигирма ёшгача кўрганларининг такрорланишидан иборат! Такрорнинг жаззаси «ва ҳоказо» деб қўя қолиш. Барон ўз ҳаёти тўғрисида «ва ҳоказо» деб, ўзини ўлдирадиган бўлди: Мол-мулки, бойликлари ҳақида васиятинома ёэди, ўзини осгани арқон қидириб юрганида қўлига ҳалиги китоб—«Ужда атрофида турган француз офицернинг кундалик дафтари» тушиб қолди. Барон китобни шундай очиб қараса, эхе... Офицер бундоқ деб ёзибди:

«...Агар шу давлатим билан Европада турсам уч кунда ўзимни осиб қўяр эдим, чунки бор давлатим ҳар куни янги бир қаср бино қилгани имкон бермайди. Бу ерда, бу ваҳший араблар орасида ҳозирги қасрим ҳар куни менинг учун янги қаср... Еввойи араб қизларининг ўрнини ҳар йили Калифорнияга боришини одат қилган Париж таниозлари боса олмайдими, дерсиз? Йўқ, боса олмайди! Париж таниозларидан бир кунда ўнтасини олиб келсан, қасримга ўн хил ўзгариш кирмайди, чунки ҳаммасига бир хилда, Европа киборлари расмича муомала қилишга мажбурман; араб қизларидан биттасини олдириб келсан-чи, қасримга ўн хил ўзгариш киради, чунки унга муомала қилиш расмларини ўзим, истаганимча ўйлаб чиқараман...»

Фон Ринг ўйланиб қолди.

Бу китоб унинг жонига ора кирди.

Шарқий фронт.

Барон Фон Ринг Украина қишлоқларидан бирида «ибрат» йўли билан фашистча «тартиб» ўрнатди; эри партизан гумон қилиниб осилган ёшина бир жувон типирчилаётган вақтида оёғига уч яrim яшар қиз-часини осидирди; бу манзарани кўриб «ибрат» олсин учун қишлоқнинг ёш-қари, эркак-аёл бутун аҳолисини ҳайдатиб келди.

Мана энди «С» шаҳарчасида ҳам шундай «тартиб» ўрнатгани кетаётиди. У, автомобилда хаёл сурив бормоқда: «Уруш ҳадемай тугайди. «Ойдин Водий» Урта Осиёнинг қаерида? Бу водийнинг ҳокимлигини Фюрердан сўрайман. Мармардан қаср солдираман. Урта Осиёда неча хил миллат бор? Ҳар ҳолда тентак француз офицерига қарагандан менинг ишим йирик бўлади...»

Даҳшатли бир портлаш.

Нима бўлди?

Нима бўлганини барон Фон Ринг икки соатдан кеин ҳушига келиб, ўзини бир ертўлада кўрганида билди. Нима биландир машғул бўлган лейтенат бароннинг ҳушига келганини кўриб:

— Хуш келибсиз! — деди.

Барон ўрнидан турәтиб, хушомад тарзида не маҳқатлар билан илжайди—устки лабини кўтариб, бурнини жийирди. Ўлган отнинг кўзига ўхшаган хира кўзларидан «Мени ҳўқиз ўрнида қўшга қўшсанг қўш, лекин ўлдирма» деган маъно англашилар эди.

Қирқ минутдан кейин асири штабга әлтиш тўғрисида буйруқ бўлди. Икки қизил аскар ҳарчанд қиласди, барон ертўладан чиқмайди—олиб чиқиб отади, деб кўрқади. Ҳозир «Фюрер»нинг ўзи келиб «мен сени Оидин Водий»га ҳоким қилдим, ўзбек, қирғиз, тоҷик, қозоқ, туркман қизлари сени мармар қасрда кутиб ўтиришибди» деса ҳам чиқмайдиган кўринар эди. Қизил аскарлар унинг қулоқлари йўқ эканини пайқашмаган экан, кўриб қолиб кулишиди. Бу кулги уни ўлим ваҳмасидан бир оз халос қилди. Барон ким гапирса оғзига қараб, ким бундайроқ ҳаракат қилса, қуёндай ҳуркиб ертўладан чиқди; шофернинг ёрдами билан автомобилга чиқар экан, шундай ўйлаб қараса... ўйлашнинг ҳеч ҳам қизиги қолмабди...

1942 йил

БОС ТЕПКИНИ

Ўғри мушук бир парча гўшқолиниб қўйилган қовоққа бошини зўр билан тиқаётганида нимани ўйлади? Гўштдан бўлак нарсани ўйламайди, албатта. Бошини қовоқдан тортиб ололмай ўзини у девордан бу деворга уриб юрганида-чи? Тузоққа тушганини дарров фаҳмлайди, чунки унда мушуклик фурури йўқ, ўзига бино қўйган махлуқ эмас.

Фашист, мағрут Хорст Шустер милтиқ кўтариб бизнинг тупроққа қадам қўйганида нимани ўйлади экан?

Хорст Шустер ўн ёшгача мактабда шундай тарбия олган:

«Уруш жуда қизиқ нарса бўлади. Катта бўлганингда бир ўзинг юзта душманни ўлдирасан, Фюрер сени ва урушни яхши кўради, сенга ўқ тегмайди. Сен ертўлада баҳузур ўтирасан. Ертўлада яхши жой: овқат ейсан, хурсандчилик қиласан...»

Хорст Шустер ўн саккиз ёшгача «гитлерчи ёшлар» ташкилотида бундай тарбияланган:

«Янги немис халқи қулларга эга бўлади. «Қул» деган сўзга нисбий маъно берма, унга рамз деб қарама. Биз янги шаклдаги ҳақиқий қулликни вужудга келтирмиз. Сенинг пичофинг узун ва ўткир...»

Хорст Шустер мана бунақа ашулаларни айтган:

«Бутун дунё ҳаробазорга айланса, айланана берсин!
Биз олга бораверамиз,
Чунки бугун Германияга ҳоким бўлсак,
Эртага жаҳонга ҳоким бўламиз...»

Хорст Шустер ўн саккиз ёшида солдат бўлди. Унинг қўлига «дастуриламал» беришди:

«Буюк армиянинг солдати! Қўйидагиларга амал қилсанг, сенга ўқ тегмайди, енгилмайсан. Агар шу дастуриламалнинг бирон моддасига амал қилмасанг ҳам ҳалок бўласан:

1. Эртаю кеч, кечалари билан фюрерни ёд эт. Бош-
ка ҳеч нарсани ўйлама, чунки фюрер сенинг учун ўй-
лайди. Сен вазифангни бажаравер, қўрқма... Сенга ҳеч
қандай шикаст етмайди. Сенинг танингга ўқ ҳам бот-
майди, найза ҳам...

2. Бошингга мушкул тушса фюрерни ёд эт, мушку-
линг осон бўлади. Душман ҳужум қилса фюрерни ёд
этиб, дадил ҳаракат қил—душманни қириб ташлайсан.
Раҳм-шафқат деган нарсани кўнглингдан буткул чиқа-
риб ташла, бунинг урушда кераги йўқ. Ким рўпара кел-
са, ҷолми, кампирми, қиз болами, ўғил болами—ўлди-
равер. Шундай қилсанг, ўзингни ҳалокатдан қутқарган,
онланг бахтини таъмин этган ва дунёда ном қолдирган
бўласан.

3. Дунёда бизга бас келадиган ҳеч қандай куч йўқ.
Биз бутуни дунёни тиз чўқтирамиз. Сенга қаршилик кўр-
сатадиган жон эгаларининг ҳеч бирини тирик қўйма ва
ҳаминча фюрерни ёд эт, енгасан...»

Унинг отаси 1903 йилда, пахта сотиб олиш имконият-
ларини билиш учун Бишоф фермасининг агенти сифа-
тида Туркистонга келган ва бирмунча вақт турган эди,
ўсли фронтга жўнаётганида «Бухорога борсанг, сувидан
ичма — ришта касали бор» деб меҳрибончилик қилган.

Шундай бўлгандан кейин, милтиқ кўтариб бизнинг
тупроққа қадам қўйган Хорст Шустер нимани ўйлайди?
Улдириш, талашдан бўлак нарсани ўйламайди, ал-
батта. Оддий бир қизил аскар рўпарасидан чиқиб, «кў-
тар қўлингни, хумпар!» деса-чи? Асири тушганлигини
дарров фаҳмлармикин?— Иўқ! «Битта ўзи юзта душ-
манни ўлдирадиган», фюрерни ёд этса «мушкули осон
бўладиган» мағрур Хорст—«Дунёнинг ҳокими» буни
англайларни деб билади, ёки (жон ширин) — ик-
ки қўлинни қизил аскар истагандан ҳам баландроқ кў-
таради.

— Саккиз яшар қиз бола сенга нима туноҳ қилган
эдики, отиб ташладинг?

Хорст бунақа саволга тушунмайди.

— Саккиз яшар қиз болани отиб ташладингми?

Бунга тушунади.

— Ҳа, отиб ташладим,— деб жавоб беради Хорст.

— Нима учун?

Немис тушунолмайди.

— Уканг борми?

— Бор!

— Ўша укангни мен отиб ташласам нима дер эдинг?

Хорст ҳайрон: бу қанақа савол?

Унда одам туйғусини қўзғатадиган, ўзининг ҳам қа-
чондир одам бўлғанлигини эслатадиган гаплар фашист-
нинг инсонга, инсониятга душман фикр-хаёллар билан
тўлган калласига кирмайди. Кирмайди, мих қилиб
қоқсангиз ҳам кирмайди! Бу каллага фақат бир нар-
сагина киради: 25 грамм қўрошин!

— Э, улуғ совет ватанинг соҳибқорони, бос тепки-
ни!

1942 йил

«ҲИ-ҲИ...»

Бу одам ишга ҳар куни бир-икки минут илгари келади, ишдан бир-икки минут кеч чиқади; профсоюз аъзолиги ҳақини ойма-ой тўлаб туради; мажлис бўлса олдинги қаторда ўтиради ва албатта сўзга чиқиб, бирон кишининг фикрига қўшилади. У ҳеч қачон «пахта плани», «ҳукумат топширифи» демайди, «пахтамизнинг плани», «ҳукуматимизнинг топширифи» деб гапиради; ўзининг айтишига кўра, аллақайси йили, аллаким тўғрисида «тегишли жойга» маълумот берган, натижада ўша одам жосус бўлиб чиқсан. Қачон, ким тўғрисида маълумот берганлигига қизиқсангиз, бир кўзини қисиб, лунжини қимирлатади: давлат сири...

Уруш бошланган кунлари. Мана шу одам танаффус чоғида ўз столида чой ичиб ўтирас эди, девор тагида курсида ўтирган хотин эмизиб ҳам йиғидан тўхтата-олмаган боласини бағрига босиб:

— Жон ака, кўраётисиз-ку... Нима қилади энди, қўл қўйиб бера қолсангиз...— деди.

Бу одам шошмасдан тухумни арчи迪, ҳафсала билан туз сепиб оғзига солди, узоқ чайнади, товуқдай бўйини чўзиб ютди-да, кетидан чой ҳўплар экан, имо билан девордаги соатни кўрсатди, яъни танаффус ҳали тамом бўлгани йўқ демоқчи бўлди.

Хотин йиғлагудай бўлиб ташқарига чиқди, яна кирди, яна чиқди... Қани энди, бу «товушинг ўчгур» бола юпанса! Қани энди, бу зормонда 7—8 минут ўта қолса!

Оқибат, соатнинг стрелкалари бир-бирига мингашди. Бу одам узун кекирди (ош бўлсин мирзо йигитга), оғзини қоғоз билан артди, соатга яна бир қараб столнинг тортмасини очди; қандайдир бир қоғозни олиб қўл қўйди ва хотинга узатар экан, илжайиб:

— Ҳи-ҳи...— деди.

— Нима ҳи-ҳи! Бунинг маъноси нима?

Танаффус менинг қонуний ҳақим шундан тўла фойдаландим демоқчими?— Йўқ. Одамни маҳтал қилиб

қўйиш менинг ҳам қўлимдан келади демоқчими?— Ҳеч. Гап бунда: у хотин уйига борганидан кейин, йиғлай-йиғлай ҳолдан тойган боласига ичи ачиб, эҳтимол, «уйинг куйгур» эмас, «уйинг куйгурлар»дер. «Ҳи-ҳи» менинг юзимга туфур, туфугинг менинг бошимдан ошиб ҳукумат столига тушсин демоқчи.

Радио қўшинларимиз Киевни ташлаб чиққани ҳақида хабар берди. Бу одам, ҳаммадан олдинда, ҳовучини қулоғига қўйиб тингламоқда эди, бирдан баланд овоз билан:

— Оббо! Ҳи-ҳи...— деди.

Шу куни катта холасининг қутиласини титиб, Паст-қўриқдаги шоликорлик ерининг васиқасини топиб қўйди.

Хабар:

— Москва хавф остида.

— Оббо! Ҳи-ҳи... ҳи-ҳи...!

Шу куни эртадан-кечгача излаб собиқ «Фантазия» номерининг васиқасини тополмади. Майли, «Фантазия»ни раҳматлик отаси Альфреддан нақд пулга сотиб олганини биладиган одамлар бор.

Мана шу кунларда «ҳи-ҳи» Қизил Армияга, Совет ҳалқига бўхтондан иборат мишишларни тарқатиб юрди; фронтга кетган йигитларнинг дўстлари, қавм-қариндошлари кўнглига ғулгула солишга уринди. Бу мишишларни унга ҳаммавақт «аллаким» айтган бўлади. Ким айтганлигини «сира эслай олмайди», эсарлигидан хафа бўлиб калласига муштлайди, яна писанд қиласи:

— Мен, албатта, ишонмадим. Рост бўлган тақдирда ҳам... Ҳи-ҳи... бу гап орамизда қолсин...

Ҳамма шундақа дейди.

Бирон ҳодиса ё бирон нарса тўғрисида ўз фикрини айтиши лозим келиб қолса, ҳазил билан чинни қўшиб гапиради. Қаршисидаги одам ўзини кўнглидагидай тутса «ҳи-ҳи» дейди унинг авзойи бошқача бўлса, «қизиқчиликка» ўтади. «Қизиқчилик»ни ўринлатиш учун бузоқ бўлиб маърашдан, ит бўлиб ҳуришдан ҳам қайтмайди.

Немис Москванинг пўлат қўрғонига пешонасини уриб, ағдарилиб тушди. «Ҳи-ҳи», яна радио карнайи остида ҳовучини қулоғига қўйиб тинглайди.

— Қўшинларимиз қарши ҳужумга ўтдилар.

— Ўҳҳ... Яшасин!

«Ҳи-ҳи» ўзининг эҳтиёткорлигидан хурсанд «бунди» хайрият ҳам «Фантазия» тўғрисида биладиган одамлар билан гаплашмагани—ҳали эрта экан.

— Москва области немислардан тозаланди.

— Ухъ... Яшасин!

«Ҳи-ҳи» шу куни шоликорликнинг васиқасини қайтиб катта холасининг қутисига солиб қўйди.

У ҳозирги кунларда хомуш. Қизил Армиянинг олға босган ҳар бир қадами бўғэнига тушаётгандай, ўтирган ерида мушукнинг хириллашидан пастроқ бир өвозди чиқариб ўтиради.

— Хўш, тақсир, нега хомушси?

— Э, азиз дўстим, сал қийналиброқ қолдим.

Билмаган одам уни тирикчилик важидан «қийналиброқ» қолган гумон қиласди. У ҳануз кавакда жон сақлаб келмоқда. Бефаросат, лақма одамни кўрса кавакдан секин чиқади, «аллакимдан эшитган янгиликларни» айтади, яна кириб кетади.

Бироқ қачонгача?

Халқ уни гирибонидан ушлаб қонун қўлига топширажак.

1942 йил

ИККИННИГ БИРИ

Фашист қизил аскарга тўсатдан рўпара келиб қолса, ёзи қўрқанидан мумкин қадар қаттиқроқ ҳуркиб бирорни қўрқитмоқчи бўлган лайчадай пўписа қиласди— «Рус, таслим бўл!» дейди, ё ўзи таслим бўлади. Ўзи таслим бўлса шафқат кўради, чунки Қизил Армиянинг мақсади қон тўкиш бўлса, Сталинград ёнида қуршовда қолиб кетган немисларга «қаршилик кўрсатишдан тўхтаган барча офицер ва солдатларнинг ҳаётини, бехатар яшашини таъминлаймиз» демас эди.

Фашист «рус, таслим бўл!» деса ё қаншаридан ўқеб ер тишилайди, ё эвини қилолса, оч битдай абжирлик билан рўпара келган тешикка ўзини уради. Ер тишиласа, уни отган қизил аскар аждаҳо Гитлернинг тишиларидан бирини қоқиб ташлаган, қон тўкишнинг олдини олган ва шу билан эл-юртининг фармонини, инсоният олдидаги муқаддас бурчини бажарган бўлади.

Фашист рўпара келган тешикка ўзини уриб жон сақласа, унинг матбуоти ё «русларнинг шафқатсизликлари» ҳақида фарёд кўтаради, ё сўюғи ўйнаб кетган «немис руҳи»ни тиклаш учун «Қизил Армия ўн олти яшар болалардан иборат бўлиб қолди» деб бақиради. «Русларнинг шафқатсизлиги» ҳақида ҳалитдан обидийда қилиш чакки: Қизил Армия унинг ўзи кўтариб келган қилич билан бошини узмоқда, ўзи олиб келган кишан билан бошига уриб сулайтироқда, ўзи чанг солган ерини тишилатмоқда, қисқаси, 1941 йил 22 июнда эккан экинининг дастлабки маҳсулотидан баҳраманд қилмоқда, холос. Ҳали совет халқи азиз фарзандларининг хунини ундан талаб қиласди; бурнини ерга ишқаб, вайрон бўлган шаҳарларини, куйиб кул бўлган қишлоқларини тиклаб беришга мажбур қиласди!

Фашист матбуоти ва радиоси «Қизил Армия ўн олти яшар болалардан иборат бўлиб қолди» деб бақирганда «руҳи кўтарилиган» ғоғил немис солдати бутун Фронт бўйлаб рўй берәётган аҳволни пайқар экан ё

ҳайрон бўлади, ё ҳайрон бўлишга ҳам фаҳми етмай қолади. Ҳайрон бўлса ҳайрон бўлгудай, чунки ўша «ўн олти яшар» болалар бутун фронт бўйлаб ҳужум қилмоқда, ўзига бино қўйган немис, румин, венгер генералларини тиз чўктироқда. Немис солдатининг ҳайрон бўлишга фаҳми етмаса ё генералининг изоҳини кутади, ё бошқа бирон кишининг, Гитлердан изоҳ кутиши чакки, сабабки, у ўтган йил кузда нутқ сўзлаб, «Сталинграднинг ишғол қилиниши ғоят катта муваффақият бўлажак ва агар биз бирон жойни ишғол қиласр эканмиз, у ердан бизни силжита олмайдилар», деган эди. Қизил Армия унинг энг камида 330 минг кишидан иборат сараланган групласини худди ўзи айтгандай ҳеч қаерга силжитмади, ҳаммасини асир олди.

Немис солдатига изоҳ берадиган бошқа «фюрер» топилса, ё ўзи ёлғон гапиради, ё Гитлер рўпара бўлиб айтолмаган ёлғонлардан изоҳ тўқиб, немис солдатининг кўзини боғлайди, унга осонлик билан қўлга киритиладиган ғалабалар ваъда қиласди. Немис солдати шу ёлғонларга яна алданса, унинг кўзини очадиган, ҳеч қачон эсдан чиқмайдиган изоҳни Қизил Армиянинг ўзи беради.

Бу изоҳдан немиснинг кўзи ё очилади, ё очилмайди. Кўзи очилса қудратли Қизил Армия қаршисида тиз чўқади, очилмаса абадий очилмайди—ер остида чириб кетади, ириб кетади.

1943 йил

МАКТУБ

Махфий

Совет ёзувчилари союзига арзи ихлосдан сўнг маълум бўлсинким, камина мулло Қутбиддин Махдум Сирожиддин муфти ўғлидурман.

Қиблагоҳимиз каминанинг таҳсил кўриб мўминларни худоничг инояти йўлига бошлигувчи аҳбоби дин ва арбоби шариат бўлмоғимга кўшиш ва ҳаракат қилур эрдилар, аз жумла, етти ёшимда Саид Муродхон эшоннинг муборак тупукларидан ялатиб, мактабдор мулло Шаҳобиддин ҳазратга эт ва сўнгокимни топширдилар. Фақир муддат саккиз йил риёзат чекиб ўн беш ёшимда Қаломи Шарифни хатм қилдим ва яна махфий қолмасинким, бир жумъя намозида имоматга ўтдим. Шундоқ зеҳн ва салоҳият соҳиби улғойгандага қандоқ рутбаларга лойиқ бўлмоғи ўзларига аён бўлса керак.

Афсус ва надоматлар бўлсинким, ҳозир бир қанча жоҳил тамагирлар чиқиб, бири эшонлик ва бири имомлик ва бири қорилик ва бири сўфилик даъвосини бирла илм ва фазилат аҳлларига азият еткурмакдалар, чунончи, маҳаллада бирор қазо қиласа бу кимсалар қузғун каби ўлик талашиб факирни жаноза ва қабристонга ўйлатмайдурлар.

Эшонлик даъвоси бирла юрган Нурмуҳаммад эшон бир ароқ дўконида қоровул бўлиб бир кун ишлайди ва икки кун ишдан фориғ; қоровул бўлган кечалари ароқ талаб маст-аластларнинг ҳожатини чиқариш баҳонаси бирла фирибгарлик қилур: молга икки баробар нарҳ қўйгани етмай, ароққа сув ва конъякка фамил чой қўшиб сотадур. Бул диёнатсиз ишдан фориғ кунларининг бирида чайқовчилик бирла машғул ва яна бирида эшонлик жомасини кийиб мурид овлайдур. Қоровулликда Нурмат Холматов ва чайқовчиликда Нурмат Жириқ ва эшонликда Нурмуҳаммад Форсо номлик бу маҳлуқнинг топ-

гани ҳаром, егани макруҳ ва ўзи мушрикдур, воллоҳу аълам биссавоб.

Мана шул кимса ўзи янглиғ мушрик Каримжон сўфи ва Иноят қорининг муованатида каминани имомликдан четга суреб, ўрнимга мулло Дониёрни ўтказурди. Мулло Дониёр мулломан деб чикон-чикон қилса ҳам аслида оми, ўзи банди ва хуфия сувратда наша сотадур.

Каримжон сўфи ҳам ҳаромдан парҳез қилмайдир, ош тамаида ёнига тўртта сабзи солиб ҳар кимларнинг эшигини қоқиб юрадур. Иноят қори капитарбоз ва катта хотини товуқ ўғриси. Бу жоҳил ва тамагир шахслар ҳукуматимизга ҳусн таважжуҳ кўзи бирла боқмайдурлар.

Хулосай калом, маҳалла ва масжидларимиз яхши таҳсил кўрган ва мўминларни пайғамбаримизнинг шафоа и ва ҳудои таолонинг инояти йўлига бошлагувчи ва ҳамда бир кўзини масжид меҳробига ва бир кўзини ҳукумат даргоҳига тиккан кишилар бирла ороста бўлса, мўминларнинг бу дунё ва охириати обод бўлур эди. Шу важҳдин илтимосимиз будурки, мазкур одамларни газаб давотига ботириб, мазкур одамларни газетада шарманда-ю шармисор қиласалар.

Фақир жами ёзғувчиларимизнинг осор ва ашъоридин баҳраманд бўлиб, ҳар дастурхон устида дуойи жонларини қитурман. Бу мутолеалар хосиятидин ўзимда ҳам андек табъи назм пайдо бўлиб бир қанча байт-ғазаллар ёздим, чунончи, ҳукуматимиз тарбиясида бўлган интернат талабаларининг азиз бөшларига соя солиб турган бир туб янғоқ дараҳтидан таъсир олиб айтибдурман:

Ажаб бир дараҳтеки номидир янғоқ
Саяси салқину, меваси юмалоқ...

Мазкур байт-ғазаллардин етти донасини союз даргоҳиға йўлладим, азбарон ҳатосини ислоҳ қилиниб «Замоний» таҳаллуси бирлан махфий сувратда чопга берилмоғи учун. Дигар илтимосим шулдурки, каминани бир юз саксон кишилик ёзғувчилар союзи аъзолигига муносабиқ кўриб, бир микдор маош тайин қилинса, фақир ўдебе ва шуаронинг қўлларига сув қуйиб, умримни союз хизматида ўткарур эдим.

Фақирдин ёшу қари ва эркак-аёл барча ёзғучиларга дуо ва салом ва яна маълум бўлгайки, камина яхшилик гарданида қиёмат қарзи бўлиб қоладиган одамлар тоифасидан эрмасман.

Бақия. Мулло Дониёрнинг бошпурти йўқ.
Фақирулҳақир мулло Қутбиддин Маҳдум

Сирожиддин муфти ўғли.

Моҳи рамазон, чоршанбаи муродбахи

ПОРА

Эртак

Бир порахўр амалдор амалидан тушиб ғалати дардга йўлиқди. Унинг томоғи кундан-кун торайиб бораверди. Қирқ тош теварак-атрофда уни кўриб дори бермаган доктор қолмади—ичи алтекага айланиб кетди; уни боқмаган табиб ҳам қолмади—яントоқнинг гулидан тортиб калтакесакнинг думигача қуритиб каппа отди; ўқимаган дуохон, ром очмаган фолбин қолмади—кичик ҳамён бўшаб, катта ҳамёнга қўйл кетди. Бўлмади, дард борган сари кучайиб, томоғидан ҳатто сув ҳам ўтмай, оғзига пахта билан томизилган сув бурнидан келадиган бўлиб қолди.

Кун ўтди, ҳафта ўтди, ниҳоят, амалдор шифтга қараб ётганича бир-икки ияк қоқди-ю жон берди. Берди! Порани пул, мақтов, зиёфат, хушомад, мебель, ов милтифи, кийик, зотли ит, ёғоч, бўёқ, тилло соат, этик ва бошқа минг бир шаклда олиб, олавериб бериш деган сўзни эсидан чиқариб юборган амалдор, худди берганига ҳайрон бўлгандай, оғзини, кўзларини катта очганича қолди. Унинг ҳайратдан очиқ қолган оғиз ва кўзларини ювғуви таҳтада юмди.

Тахта, кафан, тобут, гўр... Мурда лаҳадга қўйилиб, гўрга тупроқ тортилаётган вақтда, таомилга кўра кимдир халойиққа юзланиб:

— Ҳо яхшилар, марҳум қандоқ одам эди?— деди.

Ҳеч кимдан садо чиқмади. Шунда марҳумдан кўп азият чеккан бир киши:

— Порахўр эди!— деб юборди.

Шу чоғ қабрга тортилаётган тупроқ бирдан тўзиб кўкка кўтарилиди-ю, унинг остидан бояги мурда кафанини судраб, оғзини, кўзларини катта очиб чиқиб келди. Ҳамма тумтарақай бўлди. Бояги «порахўр» деган киши қочолмай туриб қолди. Мурда тўғри ўшанинг олдига келиб:

— Нима? Пора? Қани пора?— деди.

У киши шошиб у ёқ-бу ёққа қаради; қараса беш-олти одим нарида бир кирпи ётибди, югуриб бориб кирпини олди-ю:

— Мана пора!— деб икки қўллаб мурдага тутди.

Мурда кирпини шошиб олди, қалтирган қўллари билан оғзига элтиб, кўпдан бери пора ўтмай битиб кетган томоғини очиш, қаттароқ очиш учун кирпини тескари ютди.

Фалончига пора деб берсанг тирик кирпини тескари ютади, деган гап мана шундан қолган.

КУЗАЧА

Ваҳобжон Тўрақулов янги ишга тайинланиб, янги уй ҳам олди. У, кўч-кўрон ортилган машинани жўнатди-ю, «яна нима қолди экан» деб ҳовлига кирди. Тандирнинг олдида ташландиқ нарсалар орасида икки кўзача ағанаб ётар эди. Бу кўзачалар ўз замонасида кулоллик санъатининг дурустгина асари ҳисобланган бўлса ҳам, ҳозир назардан қолган, бунинг устига, эскириб, сири тўрлаган, шунинг учун Тўрақуловнинг хотини янги уйга муносиб кўрмай ташлаб кетган эди. Тўрақулов алланечук мунғайиб ётган кўзачаларга раҳми келгандай бўлди-ю, иккаласини икки қўлтиғига қисиб жўнади.

Тўрақулов гузардаги чойхона олдидан ўтиб кетаёт-ганида икки киши иргиб сўридан тушди, қўл қовуштириб йўлини тўёди, қўлидан кўзачаларни биттадан олиб, ўзини иззат-икром билан «бир пиёла чойга» таклиф қилди. Тўрақулов буларни идорада бир-икки кўрган, лекин икковининг ҳам фамилияси Назаров эканини бири семиз ва бири ориқ бўлса ҳам хулқ, феъл-атвор ёғидан худди бир қолипдан чиққандай бўлгани учун идорадагилар буларни Кўшназаровлар деб аташини билмас эди.

Семиз Назаров Тўрақуловга назокат билан бир пиёла чой узатиб, кўзачанинг қорнига шаппалади.

— Асл мол! Дидингизга қойилман!.. Бунақа молни танийдиган, қадрига етадиган одам ҳозирги замонда мингтадан битта!

— Юз мингтадан битта!— деди ориқ Назаров.

Семиз Назаров лунжини шишириб кўзачанинг ичига пуллади, бўйнига икки бармоқлаб чертди.

— Хунармандлар ҳам ўлмасин!

Ориқ Назаров кўзачанинг ичини ҳидлаб, қорнини юзига суркаб кўрди.

— Хунармандни ҳунарманд қилган ҳунар эмас, Ваҳобжон акамлардай дидли, заршунос одамлар! Шу кўзача биронта тўқим табиат одамнинг қўлига тушсин-чи!..

Кўшназаровлар «Ваҳобжон акам»нинг нозик диди,

тенги йўқ заршунослиги ҳақидаги бирин қўйиб, бирин ганиравергандан кейин Тўрақулов ҳижолатт бўлди-ю, «шу чоққача пайқамаган эканмизми» деб мўзачага нўз қири билан разм солди. Иўн, ўша эски мўзачаси! Янги бўлганда ҳам, ҳозир бирор пулга олмайди! Тўрақулов Кўшназаровларнинг дид ва заршунослиги ҳақидаги мақтевларида ўзини мудофаа қилиди:

— Жуда ҳам уччалик эмас шекилини Қорнидаги суратни кўринглар, қўлас дессанг чўчага ўхшайди, чўтқа дессанг иутасла ўхшайди.

Бу гап Кўшназаровлар не машаққат билан сўзлаётган торни узгандай бўлди. Семиз Назаров бир палла искака ўхшаган қорнини сийлишиб кулемди.

— Тўғри! Бу, албатта рассомнинг камчилиги, лекин, рассомнинг камчилиги кўзачага ҳусн бўлиб тушган! Узига ярапиди! Дунёда шундай камчиликлар ҳам бўлади...

Ориқ Назаров суратга ҳурккан товуқдай бир назар ташлатанидан кейин бўйинни ичига тортиб, иянгини бир томонга чиқариб, кучсанган бир товуғ билан Тўрақуловнинг нозик дид ва баланд табиатини унинг ўзидан мудофаа қилиди:

— Менимча ҳам бу, ҳар қалай, камчилик эмас, балики кўзачанинг ютуғи: суратнинг нотайнин бўлиши кишини ўйлашга, ҳар хил тахминлар қилишга, ақл ишлатишга мажбур қиласи.

Семиз Назаров Тўрақуловнинг елкасига қўлини ташлади:

— Ваҳобжон акам бизни синаётибдилар. Яхши раҳбар шунақа бўлади: қўл остидаги одамларни ҳар томондан титкилаб кўради!

Шундан кейин Тўрақулов ўйлаб қолди: «Булар кўзачани баҳона қилиб менга катта-катта суюклар ташлаётиди-ку! Идора бошлиги тупурса тупугини ерга туширмайдиган одамларга ўхшайди...»

Ориқ Назаров кўзачани уч бармоқ билан кўтариб, бир нарса демоқчи бўлган эди, Тўрақулов сўз қотди:

— Дуруст, дуруст, сизларнинг ҳам дидларинг жойида экан. Идорангда шундай дидли одамлар бўлса, юкинг ерда қолмайди... Шу кўзачаларни янгилигидага талай пулга олган эдик...

Семиз Назаров шошиб сўз қистирди:

— Дутор, вино, мана бунақа нарсаларнинг эскиси яхши бўлади!

— Балли, отангизга раҳмат! — деди Тўрақулов.— Шуларни бизга пуллаб берсаларинг жуда хурсанд бўлар эдик. Камхаржроқмиз...

Қўшназаровлар ҳанг-манг бўлиб қолишиди ва иккови баравар:

— Қанчага? — деб сўради.

— Сизлар турганда мен баҳо қўйсам қандоқ бўлади? Янгилигидан ҳар бирини беш юз сўмдан олган эдик, йигирма йил бўлди... Ҳар йили йигирма беш сўмдан эскирганда ҳам таннархи билан минг сўмдан бўлармикин.. Ошиғи сизларники!

Тўрақулов шундай деди-ю, кўзачаларни икковининг қўлига биттадан тутқазиб, турди-кетди. Қўшназаровлар унинг кетидан қараб қолишаверди.

Тўрақулов кўздан ғойиб бўлгандан кейин, ориқ Назаров ҳушига келиб семиз Назаровга еб қўйгудай бўлиб қаради ва кўзачани унга томон юмалатди.

— Ол, сотиб бер!

Семиз Назаров иккала кўзачани унинг олдига сурди.

— Мақтовини сен келтирдинг, сен сотиб бер!

Жанжал чиқди.

Қўшназаровлар кўзача билан бир-бирининг калласига туширди, иккови ҳам ҳушдан кетиб йиқилди.

ХИҚИЧОҚ

Учинчи сигнал бўлиб, чироқ ўчадиган пайтда залга ҳиқичноқ тутган бир маст кириб келди. У, бўш жой излаб, шомда қолган товуқдай бўйини чўзиб, у ёқ-бу ёқ-қа қаради, афтидан, ҳеч нарсани кўрмас эди. Контролёр унинг қўлидан билетини олиб кўрди-ю, бўш жойга йўллади. Маст дам-бадам ҳиқиллаб, қатор орасидан одамларга кетини ишқаб ўтиб борар экан, оёғи чалмасиб бир хотиннинг тиззасига ўтириб қолди; хотиннинг дашноми қулоғига кирмай, шошмасдан ўрнидан турди, ниҳоят, бўш жойга ўтириб яна бир марта «ҳиқ» деди.

Чироқ ўчди. Парда очилди. Саҳнанинг ўртасида ғоз турган артист кўзига иккита кўринди шекилли, маст бир кўзини ҳовучи билан беркитиб қаради; артист ашула айтәтибди, деб ўйлади шекилли, тиззасига уриб:

— Дўст! — деди.

Унинг ёнида ўтирган кимдир туртди:

— Жим!..

Маст унга юзланди.

— Мен сизга дўст деялганим йўқ, ошна! Сиз нима қилибсизки... ҳиқ... дўст дейишлик керак!.. «Фифонким гардиши даврон»ни биласизми? Ҳиқ... билмайсиз!..

— Саҳнага қаранг, пулингиз куяди!

— Менинг пулим куядиган пуллардан эмас... Лекин, қарасам қарайвераман, хоҳласам бир кўзим билан... ҳиқ... қарайман, хоҳласам иккала кўзим билан қарайман! Ўзимнинг кўзим, ўзимнинг билетим, ўзимнинг... ҳиқ... пулим!

Маст ёнидан папирос олди, энгашиб гугурт чаққан эди. Атрофда босинқи ғовур кўтарилди. Ўтиб бораётган контролёр мастга томон энгашиб, қаттиқ шивирлади:

— Чекманг, штраф қиласман!

— Ие, опажон, билет олганимизда штрафи... ҳиқ... ичидаган эди-ку! Кеч... кечириласиз, мен бу ерни кино дебман... Штраф эмиш, мен нима гуноҳ қилибман? Күчингиз фақат бизга етар экан-да! Буларга нега инда-

майсиз ё булар пора беришганми? Биз ҳам нақд пулга... ҳиқ... билет олганимиз! Мен бирорни сўймасам, бирорни урмасам... Бирорни урсам, эҳтимол, майда безориликка... ҳиқ... киарар эди. Мени ҳозир ҳеч ким ҳеч нарса қилолмайди! Қўлингиздан келса, биласизми... ҳиқ... ҳиқичофимни тўхтатиб беринг!

Мастни ҳеч тийиб бўлмас эди. Унга на ёнидаги одамларнинг ёлвориши кор қиласи ҳади, на контролёрнинг пўписаси. Контролёр пўписа қилган сайин маст авж қила бошлади, афтидан, шовқин соладиганга ўхшаб қолди. Шунда мастнинг орқасида ўтирган бир йигит контролёрта «Сиз кетаверинг, ўзимиз әплаймиз» деган мъянода ишора қилди-ю, әнгашиб, мастнинг қулоғига шивирлади:

— Яшант! Хотинингиз ҳам кайфи ошса, ҳиқичноқ тутиб, худди ўзинтиздай жуда ширин бўлар экан!

Маст ирғиб ўрнидан турди.

— Қаерда кўрдингиз?

— Эшикнинг тагида ҳиқиллаб ўтирибди...

— Хотиним ичмас эди-ку! Қачон кўрдингиз?— деди маст ва йигитдан жавоб қутмай, жавраганича жўнаб қолди.— Ҳозир чиқиб саксон саккиз талоқ қўяман! Менга ичадиган хотин керакмас! Йирадиган бўлса ичадиган эрга... Йўқ, ичмайдиган эрга тегсин!

— Чакки бунақа дедингиз,— деди йигитнинг ёнида ўтирган бир хотин,— ҳозир қайтиб келиб ёқсангиздан ушласа, нима жавоб берасиз?

Йигит бепарво жавоб берди:

— Ҳали-бери келмайди: уйита боради, хотинини чироққа солиб кўради, оғзини исказиди, қасам ичириб, сўроқ қиласи... Үнгача спектакль тамом бўлади.

Босинқи кулги кўтарилди.

ОҒАЙНИЛАР

Оркестр гумбурлайди. Официантларниң қўлини қўлига тегмайди. Бурчакдаги столда иккى оғайнин пиво шишлари орасига кўмилиб ўтирибди. Бирин стаканларга пивони шопириб қўйди, шишани тақ этиб қўйди-да, атрофига «қойил қилдимми» дегандай назар ташлаб, сўзида давом этди:

— Бу дунёда одам боласига ҳеч нарса керак эмас! Пул ҳам, мол ҳам... Ҳаммаси топилади, қачонки яхши оғайнинг, қиёматлик оғайниларинг бўлса! Хотин, бола-чақа ҳам топилади; Тўлтаган оғайнин! Барои топилади... Қани, ичайлик, исиб қолмасин!. Соколингни артиб ол, азиз дўстим!

Тўлтаган энгашиб дастурхоннинг бир четига соколини артиди, доири тиқилган товуқдай бўйини чўзиб кекирди, сирка ичгандай афтини буриштириб:

— Жуда тўлдим; Абдуманноф,— деди,— қимирласам тўкиламан... Пивоси қурғур жуда-жуда серсув нарса бўлади-да, сувини сиқиб ташлаб ўзини ичсанги тусув...

— Ҳозир, қиёматлик оғайним; ҳозир,— деди Абдуманноф ва официанткага ишора қилган эди, ароқ кельтириб берди.— Шунақа, ўртоқ! Лекин оғайнинда ҳам оғайнин бор! Батъин оғайнин бўлади, унақа, батъин отайни бўлади, жонингга жонини мих қилиб юқиб ташлайди.

— Унақа оғайнин мингтадан битта!

— Да, баракалла! Раҳмат дўстим!.. Үзинг билансинку, мен йигирма еттаничи, йигирма саккизинчи, то йигирма тўқизинчи йилгача қанақа эдим? Эски шахарда каттакон ошхона, Шиёнбозорда бинойи дўкон... Савдо гурриллаган... Ҳар куни улфатчилик, базм... Ҳозир ўша улфатлар, ўша оғайнилар кўчада кўрса тескари қараб ўлади. Шуми оғайнигарчилик! Бу ҳам майли-я, ўтган йиди ҳайит: ҳафтаси галати иш бўлди: ўша оғайнилардан биттаси районга бориб мени чақибди—«ҳозир борса!» принт уйидан камида иккى юз метр бажмал топасизлар» дебди. Уч кун ҳайит ҳаром бўлиб ўтса бўладиши?

Тўлаган ҳам кўп оғайниларидан куйган, кўпларидан аламзада экан, сўкина-сўкина гапириб берди; айниён бир оғайнисини кўп сўқди. У, олтмиш метр баҳмал ва ўн уч ярим кило чойни пуллашда ўртада туриб, Тўлаганинни беш юз йигирма саккиз сўмга туширган экан. Бу Абдуманнофнинг эсига туфли воқеасини туширди. Унинг ҳам бир оғайниси йигирма жуфт шериклик туфлини «қўлга тушди» деб еб кетган экан. Тўлаганинг эсига алиф, вентилятор, Абдуманнофнинг эсига мурч, цемент можаролари тушди ва ҳоказо. Шундай хулоса қилиб қарашса, оламда икковидан бўлак ҳалол одам қолмабди.

— Кел, бир ўпай! — деди Абдуманноф. — Оҳ.. Азиз оғайним!. Лекин, дўстим, одам танийдиган бўлиб қолдим. Сен азалдан одам танийсан. Кўнглингга бир нарса келмасину, оғайнинг Шоабдуфаттоҳ Хўжаев ўғил бола йигит! Биламан-да, гаплашмаган бўлсан ҳам, қадам олишидан биламан. Пошшо йигит!

— Хизрни йўқласанг бўлмасми, — деди Тўлаган кулиб. — Уни қара, ҳув...

Абдуманноф иргиб ўрнидан турди. Шоабдуфаттоҳ Хўжаев уч оғайниси билан залнинг ўртасида тураг, бўш стол излаб бўлса керак, у ёқ-бу ёққа кўз ташлар эди.

— Тўлаган, азиз дўстим! — деди Абдуманноф «пошшо йигит»дан кўзини олмай. — Чақир! Бориб олиб кел!

— Қўй, нима қиласан...

— Қиёматлик оғайним бўлсанг, сўзимни ўлдирмайсан! Тур!..

Шоабдуфаттоҳ Хўжаев оғайниларидан бирини қаёқ-қадир юборди, қолган иккитаси билан келиб ўтириди. Маълум бўлишича, булар бу ерга ўтиргани эмас, бир одами қидириб киришган экан. Абдуманноф улфатларининг, айниқса Тўлаганинг раъйига қарамай ишни катта қилиб юборди.

Шоабдуфаттоҳ Хўжаев хомуш эди, Абдуманнофнинг кутганига қарши, бошқалар чулдираш даражасига етганда ҳам ўзига келмади. Абдуманноф охири Тўлаганиндан бунинг сабабини секин сўради. Тўлаган нотайироқ жавоб берди. Орадан икки соатча ўтганидан кейин қаёққадир кетган киши қайтиб келди ва кимнингдир уйидаганидан хабар берди. Шоабдуфаттоҳ Хўжаев иргиб ўрнидан турди. Оғайнилар ҳам туришди.

— Энди, ўртоқ Шоабдуфаттоҳ Хўжаев, — деди Абдуманноф қўл қовуштириб. — Бу ўтириш ҳисоб эмас. Ишларинг қистов экан, мени уялтириб қўйдиларинг. Бизнинг ҳовлилар ҳам жуда баҳаво жой...

— Ҳали кўп кўришамиз, — деди Шоабдуфаттоҳ Хўжаев. — Хайр... Кетдик.

Абдуманноф уларни эшиккача кузатиб келди.

— Пошшо йигит! — деди ўрнига ўтириб, — лекин таъби хирароқ кўринадими?

— Ҳа, бечоранинг бошига мушкул тушиб туриди. Иши прокурорда.

— Қанақа иши!

— Магазини текширилганда чатоқ чиқибди... Чатоқ чиқмасдан бўладими?

— Директорликдан бекор бўлгани йўқми?

— Бекор бўлганига бир ой бўлди-ку. Билмасмидинг? Қамаладиганга ўхшаб туриди.

Абдуманноф иштаҳа билан чайнаб турган гўштини туфлаб ташлади. Жимлик чўкди. Официант счет келтирди.

— Боя нега айтмадинг? — деди Абдуманноф счетни қўлига олиб, — ҳм, икки юз ўттиз бир сўм етмиш тийин!

— Ўзинг биласан дебман-да.

— Шундай деган бўлсанг, қани, пулдан чиқар! Бир юз ўн беш сўм саксон тийин берсанг бўлади. Ҳисоблик дўст айрилмас.

— Нега? Мен ўзимнинг ҳисобимни ўзим қилиб ўтирибман: йигирма олти сўм қирқ тийин бераман. Ma!..

— Ҷўз, ҷўз! Бу ер ҳазилнинг жойи эмас.

— Ҳазили нимаси! Одамгарчилигинг бўлса, шу йигирма олти сўмни ҳам олмас эдинг, мени ўзинг олиб келгансан. Энди Шоабдуфаттоҳ Хўжаевнинг сарфини ҳам кўтарайми! Ўзинг чақирдинг, ўзинг буюрдинг... Тўлайвер, ахир бир куни тағин директор бўлиб қолар...

Орада бир-икки оғиз гап ўтди. Бунинг натижаси шу бўлдики, Тўлаганинг қаншарига мушт тушди, стол ағанаб кетди... Орага тушган официант лунжини ушлаб орқага чекинди. Оркестр тўхтади. То икковини оташкуракка қистириб чиқариб ташлагунча орада ўтган гаплардан жанжалнинг сабаби маълум бўлиб қолди. Чаласини лунжи шишиб кетган официант айтиб берди. Буни эшишиб баъзилар қотиб-қотиб кулар, баъзилар бўғилар эди.

Зал тинчиди. Оркестр давом этди. Кўчага чиқиб, мажарони охиригача кўриб келган жиккаккина бир чол шошиб-пишиб овқат еркан, ўзича жаварар эди:

— Магазин директорининг оғзини мойлашга ҳаракат

қилганига ҳеч ҳайрон қолмайман. Йўқ! Қана сигирнинг қулоғига тушади, туёғига эмас. Шунча одам орасида ҳар қайсиси ўзидан хавотир қилмай, бир-бирининг сирини очиб ташлаётиди—мана бунга ҳайрон қолса бўлади! Наҳот чайқовчи ўзини шунча эркин сезса! Шунча қутурса! Қутурмай ҳам нима қилсин, чайқовчиликда айланганларнинг устидан судлар шу қадар юмшоқ ҳукм чиқараардик, билмайсан киши: жазо бердими, насиҳат қилди? Жамият учун зарари нақд, ҳатто вақт-соати келганда ҳавфли бўлган бу текинтомоқлар билан кескироқ курашгани нима халал беради? Нима халал беради?!

ОҚ АРОҚНИНГ ҚОРА ИШИ

Ҳавонинг қовоғи солиқ. Битта-иккита ёмғир томчи-лаб турибди.

Кимсан Қорабоев қўғирчоқдеккина қизчаси Лолани етаклаб, хотини билан ажрашгани судга кетаётиди. Унинг соchlари тўзиган, ранги не ахволда, кийим-бошиғижим, шимининг почалари лой...

Лола дадасининг қаёққа кетаётганидан бехабар, лекин шундай яхши дада ҳар куни қаёққадир бир ёмон жойга бориб, ароқ ичиб, ёмон дада бўлиб келишини билар эди, шунинг учун хавотирда: ўша ёмон жойга ҳар куни ўзи якка борар эди-ку, бугун нега мени олиб кетаётиди экан?..

Лола дадасидан кўзини олмай, туртиниб-суриниб, оёқ остидаги кўлмак сувларни сачратиб, қалдирғочдай тинмай чуғурлаб борар эди. Қим билади, гоҳ ранжиган, гоҳ ёлворган, гоҳ йиғламсираган товуш билан жавраётган бу гўдак нималар деяётиди!..

Кимсан муюлишда гастрономга бурилди, магазинга кириб Лоланинг қўлини қўйиб юборди-ю, ранг-баранг шишалар териб қўйилган томонга борди. Лола магазиннинг ўртасида туриб қолди; қўзлари жавдираб, дадасига бир шиша ароқ узатгая «ёмон бир опа»га, харидорларга қаради. Лекин уни ҳеч ким пайқамади.

Магазиндан чиқилгандан кейин Лола гапирмай қўйди. Энди унинг хаёли бошқа нарса билан банд эди: дадаси шимининг чўнтағида дўппайиб турган ароқни қаҷон ва қаерда ичади-ю, яна «ёмон дада» бўлиб нималар қиласди...

Суд залида эр-хотин Кимсан билан Инобатхоннинг яқин қариндошлари, баъзи бир таниш-билишлар. Инобатхон аслида яхши, лекин ичкилик тириклай тобутга тиққан эрига чиндан ҳам аза тутгандай бошдан-оёқ қора кийган; қовоқлари шишинқираган, киприкларида ёш заралари йилтирайди, ҳўнграб юбормаслик учун рўмол-насини лабига қаттиқ босиб бир чеккада ўтирибди.

Лола онасини кўриш билан югуриб бориб унинг бўйнига осилди, яна қалдирғочдай чуғурлаб, бирпастда олам-жаҳон гап гапириб ташлади...

Суд мажлиси очилди. Савол-жавоб бошланди.

Ун бир йиллик оила, Кимсан илгарилар «хонаси» келганда ичар эди, кейинчалик битта-иккита улфат орттириб «хонаси»ни ўзи келтирадиган бўлди. Тўрт йилдирки «хонаси» ҳар куни келади, тўрт йилдирки оиласда ҳаловат йўқ: харҳаша, шовқин, кўз ёши... Кимсанни баъзан ечинтириб бўлади, баъзан бўлмайди. Бутун уйдан, кийимлардан, кўрпа-ёстиқдан, ҳатто Лоланинг бошидан ҳам ароқ ҳиди келади!

Кимсан стаканинг қўлига олганида нима учун ичтанини билмайди, бирор гапирса малол келади, «доно одамларнинг насиҳатидан чиқиб қолибман» деб жеркиб ташлайди.

Ароқ унинг териси билан эти орасига жойлашиб олган, шунинг учун севгили хотинидан кўра ароқка кўпроқ ишонади.

Кўпинча ароқ унинг қулоғига шивирлади:

— Биласанми, хотининг сенга куймайди, рўзгордан уриб пул ортираётиди. Кўрмайсанми, топганинг зўрга учма-уч келади...

Жанжал...

Инобат жонидан безор бўлиб, қаттиқ гапирса ароқ яна Кимсаннинг қулоғига шивирлади:

— Хотининг ҳалол эмас, ширин сўзини бошқаларга тўкиб, сенга нуқул тахирини қолдиради...

Шовқин-сурон...

Инобатхон ширин сўз бўлса, яна балога қолади:

— Хотининг ҳозир ўйнашининг қучоғидан чиқиб келди, сенга доғулилик қилаётиди! Шунча зийраклигинг билан наҳот шуни пайқамасанг!

Инобатхон гоҳ зор-зор йиғлаб, гоҳ ёлвориб, гоҳ қаттиқ гапириб уни ичкиликтан тиймоқчи бўлган вақтларида ароқ Кимсанни қутуртиради:

— Хотининг сени қайириб олмоқчи, бир марта гапига кирсанг елканга миниб олади. Бир стакан ичадиган бўлсанг хотинингни додлатиб туриб икки стакан, уч стакан ич!

Тўрт йилдан бери аҳвол шу. Фақат шугина эмас-да, хотин мастанинг қусиғи артилган латтадай қўланса шу одам билан бир кўрпада ётиб келаётиди!

Инобатхон тўрт йил давомида йиғлаган, жанжалашган, бунақа оиласидан турмушдан воз кечмоқчи

эканини айтган вақтларда ҳам ароқ Кимсанга «парвоқилма, ҳеч қаёққа кетмайди» деб тасалли берди; бундан икки ой бурун Инобатхон уйдан узил-кесил чиқиб кетаётганида ҳам «хотиржам бўл, барibir қайтиб келади» деди. Лекин, шундоқ бўлса ҳам, Кимсан кўнглига ғулғула тушиб, ҳар эҳтимолга қарши Лолани зўрлик билан олиб қолди. Бироқ ҳозир Инобатхон судьяларга қараб, қавм-қариндошлар олдида шунча гапни айтганидан кейин Кимсаннинг кўзи ярақ этиб очилди-ю, ичкилик ҳароратидан кечаси билан қаттиқ уриб ҳориган юраги алланечук бўлиб кетди, совуқ тер босди. Унинг аҳволини кўриб кимдир бир стакан совуқ сув келтириб берди. Лола бўлаётган гапларни яхши тушунмаса ҳам, ароқ туфайли ёмон бир иш рўй берганини сезиб бир чеккада мунғайиб ўтиради, дадасининг титраётган қўлидаги стаканга кўзи тушар экан, жон-жаҳди билан қичқириб унга томон отилди:

— Дадажон, ичманг! Ичманг!..

Стакан Кимсаннинг қўлидан тушиб чил-чил бўлди, Орқада ўтирган бир чол Лолани ўзига тортиб бағрига босди. Залда бир ғовур кўтарилди-ю, оғир жимлик чўқди, у ёқ-бу ёқдан пиқ-пиқ йиги товуши эшитилди...

Суд ҳукмга кирди. Ҳукм икки соатдан кейин эълон қилинди. Лола онага ҳукм қилинди. Инобатхон Лолани етаклади. Лола ҳайрон, гоҳ дадасига қарайди, гоҳ онасига...

Кимсан нима бўлганига тушунолмай гаранг бир аҳволда эшикка томон йўналди. Қим билади, шимининг чўнтағида сонига ботиб турган бир шиша ароқни эшикдан чиқиши биланоқ ичадими ё ерга кўтариб урадими! Агар ерга урса бунинг товушини Инобатхон эшитиб эҳтимол қайрилиб қараса, эҳтимол қайтса... Ахир, Инобат хурсанд бўлиб эмас, йиғлаб кетаётиди-ку!..

БИЗНИНГ МУЛОҲАЗАЛАРИМИЗ

(Баъзи тақризларга назира)

Матбуот саҳифаларида маълумки, ҳозирги вақтда шаҳар ва қишлоқларимизда турли бинолар ва турар жойлар кўплаб қурилмоқдалар. Модомики, шундоқ экан, халқимизнинг стол, стул, буфет, шкаф, каравот, маданий қозиқ ва бошқа шунинг сингари молларга талаби кундан-кун ортмоғи ва харидорларимиз у ёки бу магазинда узун-қисқа очередлар ташкил қилмоғи айрим ҳолларда (*курсив бизники!*) мумкин дейилса хато бўлмаса керак деб ўйлаймиз. Бундай ҳолларда харидорларнинг қимматли вақтларини тежаш юзасидан уларни рўйхатга олиш практикаси, яъни очередини ёзма шаклда олиб бориш кўпдан бери синалган методлардан бири бўлиб келмоқда.

Биз 87-магазинда тузилган йигирма икки кишилик бир рўйхат тўғрисида ўз мулоҳазаларимизни баён қилмоқчимиз¹.

Аввало шуни айтиш керакки, рўйхат кўп қиррали (қоғоз саккиз бувланган!) ва ранг-баранг хусусиятга эгадир: унда олти фамилия қора, бир фамилия қизил, бир фамилия кўк, қолган фамилиялар яшил ва бинафша сиёҳ билан ёзилгандир. Шунинг ўзи авторнинг катта ижодий имкониятга эга эканлигини кўрсатади. Ўқувчини зериктирмасликка қаратилган бу услубга шундай баҳо бериш тўғри деган фикрга қўшилиш мумкин деб ўйлаймиз.

Рўйхатнинг ижобий хусусиятларидан яна бири, унда магазин мудири ўртоқ Норматовнинг (*курсив бизники!*) фамилияларига ҳамоҳанг бўлган Нурматов, Пирматов, Қулматов сингари фамилияларга кенг ўрин

¹ «Мебель олиш учун очередда турган гражданлар рўйхати», бир саҳифа, яхши чойқоғозга ёзилган.

берилганлигидир. Ўртоқ Норматовнинг фамилияларига айниқса Єрматов фамилияси алоҳида ҳамоҳанг бўлиб жаранглайди.

Рўйхатнинг автори ҳамма фамилияларни тўғри ёзишга уринган, хато қилмасликка ҳаракат қилган дейиш мумкин. Бу тўғрида тажрибали сотувчилардан Мустақимов, Зулфиқоров, Намозов ўртоқларнинг фикрига тўла қўшилиш керак.

Лекин, шундай бўлса ҳам, рўйхат айрим камчиликлардан холи эмас¹.

Аввало рўйхатга тартиб рақами қўйилган эмас. Бу ҳол авторнинг ўз ишига масъулиятсиз қараганидан, рақамнинг ҳалқ хўжалигига қанчалик катта аҳамиятга эга эканини тушуниб етмаганидан далолат беради. Буни бошқача изоҳлаш мумкин эмас!

Ундан кейин автор бир қатор фамилияларни бузиб кўрсатган, масалан: Шодиев дейилади, ҳолбуки Шотиев бўлиши керак! Жуда кўп фамилияларда «ъ» тушиб қолган.

Рўйхатда давр тўғрисида нотўғри тасаввур туғдирадиган қатор арабча, форсча фамилияларга кўплаб ўрин берилган. Шарофиддинов, Сирожиддинов, Қамолиддинов ва ҳоказо.

Яна шуни алоҳида қайд қилиб ўтиш керакки, автор салбий фамилияларга ўрин берган: Хонкелдиев, Сўфихонов, Султонпошшоева, Пашшоҳўжаев. Бунинг устига Болтаев, Яхшиева, Ширинжонов сингари ижобий фамилияларга рўйхатдан оз ўрин берилган ва деярли ҳаммаси хира ёзилган.

Давримиз учун типик бўлмаган Шобаратов, Шомансуров сингари фамилияларга рўйхатдан ўрин берилмаса ҳам бўлар эди.

Рўйхатда такрор ҳам учрайди, масалан: О. Жўраев, И. Жўраев, У. Жўраев деб ёзилади, ҳолбуки ихчамлаштириб О. И. У. Жўраев деб ёзилса, рўйхатнинг қиммати яна ҳам ортар эди.

Рўйхатнинг жиддий камчиликлари ҳақида гапирав эканмиз, авторнинг меҳнатга нотўғри муносабатини алоҳида қайд қилмасдан ўтолмаймиз! Масалан, рўйхатда Ҳузуржонов дейилган, унинг Ҳузуржонов бўлиши учун фидокорона меҳнат қилганлиги рўйхатнинг қаерида акс эттирилган?

¹ Авторнинг кандидатлик диссертациясидаги «Камчиликлар, жиддий хатолар» бобига қаралсан, саҳифа 2967.

Бу саволга рўйхатдан жавоб топиш қийин!

Рўйхатдаги мана шу камчиликлар тузатилса, бу нарса ҳозирги очередчилигимизда ижобий роль ўйнаши, харидорларимиз орасида тарбиявий иш олиб бориша алоҳида аҳамиятга эга бўлиши мумкин бўлса керак деб ўйлаймиз.

Магазин мудири ўртоқ Норматовнинг бу ташаббусини табриклиш керак бўлади (*курсив бизники!*).

НУТҚ

«Кенг эшигувчилар оммасига мўлжалланган» нотиқлардан бири ишдан қайтиб келганида хотини бўйнига осилиб, кўзига ёш олди.

— Сиз мени яхши кўрмайсиз... Турмушимиздан хурсанд эмассиз... Шу соатгача, шу минутгача кутдим, бир оғиз айтмадингизки, бир ёстиққа бош қўйганимизга бир йил бўлди...

Нотиқ ҳақиқатан буни унуган эди, лекин гап топди:

— Ие,— деди,— ҳали тўйимизга бир йил бўлдими! Бир йил? Шундай роҳат турмушимиздан, шундай шинрин умримиздан дарров бир йил кетдими! Оҳ, дод дейман...

Хотин илжайиб, турли ноз-неъмат, гуллар билан безатилган столни кўрсатди. Эр-хотин ўтириши. Хотин рюмкаларга вино қўйиб:

— Қани,— деди,— бир нима демайсизми?

— Бир нима деяйми?

— Вой, ҳали индамасдан ичмоқчимисиз?

Нотиқ рюмкани олиб ўрнидан турди. Қошлари чимирилди, ранги бир оз ўзгарди, аввал рюмкага, кеин уйининг бурчагига қараб сўз бошлади:

— Ўртоқ рафиқам! Ижозат берасиз, хушчақчақ ҳаётимизни шараф билан давом эттириб, оиласиб бурчимизни намунали бажарип келаётганимизга бир йил тўлган кунда сизни бевосита табрик қилишга!

Хотин бу муқаддимани ҳазил гумон қилганлиги учун қийқириб чапак чалди. Нотиқ яна ҳам жиддийроқ қиёфада давом этди:

— Бундан 365 кун муқаддам сиз билан биз ўз ҳаётимизда қатъий бурилиш ясад, зўр синовлар шаронтига бевосита қадам қўйдик. Илгариги вақтда фақат эркак, эндиликда эса ҳам эркак, ҳам хотин бошчилик қиласидиган оила масаласи ўзингизга маълум бўлганлиги учун бунга кенг равишда тўхтаб ўтиришни лозим кўрмайман.

Нотиқ оила түғрисида ўз фикрини баён қилганидан сўнг «Хотин ва социализм» деган китобнинг бир еридан уч, яна бир еридан икки, яна бир еридан ярим саҳифа ўқиб берди. Хотин бу орада икки марта оғзи-ни очмасдан эснади, қўлидаги рюмкани столга қўйди. Нотиқ давом этди:

— Сиз билан биз бир йиллик оилавий фаолиятимиз натижасида қандай ютуқларга эришдик? Аввало шуни таъкидлаб ўтиш керакки, биз у ёки бу масалада юз берадиган принципиал келишмовчиликларни четдан куч жалб қиласдан ўз кучимиз билан, ўзаро кенг муҳокама қилиш йўли билан бевосита бартараф қила-диган бўлиб қолдик. Иккинчидан, ўртоқ рафиқам, оиласизни ташкилий хўжалик жиҳатидан мисли кўрилмаган даражада мустаҳкамладик. Мен бу бобда фактларга мурожаат қилиб ўтирмайман, чунки орденли онангиз ўзларининг ҳар бир тарихий келишларида бу нарсани айрим равишда қайд қилдилар.

Нотиқ сув бўлмаганлиги учун винодан бир ҳўплаб давом этди:

— Хўш, бу ютуқларимиз камчиликларимизни қоплаб, бизни хотиржамликка солиши мумкинми? Агар биз камчиликларимиздан бевосита кўз юмиб, яшасинчлик кайфиятларига берилиб кетадиган бўлсак, хато қилган бўламиз. Бизда камчиликлар борми? Бор, оз эмас! Масалан, июль ойининг биринчи ярмида озиқовқат маҳсулотларини сақлашда йўл қўйган жиҳдий нуқсонларимизни олайлик. Бу масалага иккенинг ҳам жинояткорона совуқ қаравшимиз орқасида қатор чиришлар, бузилишлар, кўкаришлар юз бердими? Факт! Буни нима билан оқлаш мумкин? Ҳеч нарса билан!

Нотиқ қизишиб кетди.

— Иккинчи масала, яъни ички имкониятлардан фойдаланиш масаласини олайлик. Ўзингизга маълум, бизда юқори сифатли мис чойнак бор. Шу чойнакнинг қопқоги бугунги кунда йўқ. Бу ҳақда биз бир-бirimiziga сигнал бердикми? Йўқ! Агар биз ўзибўларчиликка узил-кесил барҳам бериб қопқоқ масаласини кун тартибига кўндаланг қўйсак, агар биз шу чойнакни ўз вақтида тегишли қопқоқ билан бевосита таъмин қилсак, самоваримиз сафдан чиқсан кунларда ҳал қилувчи роль ўйнار эди. Афсуски, биз бу масалага муросасозлик кўзи билан қарадик. Бугунги кунда чойнагимиз қопқоққа эга эмас, мутлақо эга эмас.

Хотин секин уҳ тортди. Нотиқ буни пайқаб «тўсатдан қаттиқроқ танқид қилдим, шекилли» деган андишага бориб, сўзини ўйқотиб қўйди, шунинг учун сўзининг охирини юмшатишга тиришиди:

— Лекин бу камчиликларга қарамай, турмушимизни аъло даражада олиб бораётганлигимизга ҳеч қандай шак-шубҳа бўлиши мумкин эмас деб ҳисоблаш мумкин. Шу билан қисқача сўзимни тамом қилиб, оиласизни бундан кейин ҳам шарафлар билан қопланажагига тўла ишонч билдиришга ижозат беринг! Бу рюмкани мана шунинг учун кўтаришдан бурун ўз муҳаббатимни яна бир марта амалий суратда изҳор қилгани рухсат беришингизни талаб қиласман.

Хотин унинг ҳаракатидан «ўпич бер» деган маънioni англади-да.

— Ўпичми? Ҳеч бўлмаса шуни тўғри айта қолсангиз нима бўлар экан!— деди.

— Қандай,— деди нотиқ ҳайрон бўлиб,— битта ўпични деб нутқимни бузайми?

Нотиқ ўтирди. У ўтирганида яна аслига қайтди. Хотин унинг ҳар бир сўзидан завқланар, кулар эди.

«КИМЁГАР»

Хоразмнинг қишлоқларидан бирида ўхшатиб тиқилган ҳасипдек таранг, жувозкундадек ёғдан ялтираган гимнастёрка-ю, галифе шими қоматига ёпишган, қоринчаси ўзига кўп ярашган бир йигит бор.

Шу тахлитдаги йигит бир ўша ердами, бошқа ҳар қаердан ҳам топилади, дерсиз? Тўғри, шу тахлитдаги йигит топилар, лекин шу хилдаги одам топилмайди, гаров бойлашаман, топилмайди! Унинг ўзи бир нусха!

Унинг касб-кори, фазилатлари нимадан иборат дерсиз?

Унинг қандоқ фазилатлари борлигини «Н» колхознинг раҳбарларидан сўраш керак, биз буни билмаймиз. Биз фақат шуни биламиш: унинг кори—омборчиллик, касби—«кимёгарлик»дир.

Колхозда омборчиллик нима эканлигини ўзингиз биласиз: омборчи улгуржи олади, чакана беради.

Кимёгарлик нима эканлигини ҳам биласиз: кимёгар ғиштни, гувалакни қип-қизил олтинга айлантиради.

Омборчи сифатида Ёвқоч Оллоберганов ҳам, бошқа омборчилардай, улгуржи олади, чакана беради: кимёгар сифатида у ҳам, бошқа кимёгарлардай, олтин ясади. Бироқ олтинни у, бошқа кимёгарлар сингари ғиштдан, тошдан, гувалакдан эмас, инсонлик иззати нафсидан, инсонлик шаъни ва инсонлик ҳамиятидан ясади. Уни нодир нусха қилган ҳам мана шундай кимёгарлигиидир.

Олтмишдан ошган чол ҳалол меҳнати эвазига тегадиган донни олиш учун омборга келди. Оллоберганов ўзига хос чаққонлик билан донни дарров тортиб беради. Софдил чол, омборчи ҳозир тарозидан уриб уч килограмм кам берганлигини хаёлига ҳам келтирмай, донни кўтариб кетаверади.

Кимёгар виждонини уч килограмм донга айлантириди.

Оллоберганов омборни қулфлаётганда бир йигит ўзига тегишили совунни сўраб келади.

Оллоберганов пўнгиллади:

— Нима бу, колхознинг омбори баққолнинг дўконими, вақтида келинг-да!— дейди ва унинг афтига ҳам қарамай кетаверади.

Муюлишда унга банка кўтарган бир хотин киши учрайди.

— Вой, ука, мен ёғ олгани келаётган эдим-ку, жон ука...

Оллоберганов, қовоғини солганича, индамай орқасига қайтади, омборни очади, хотиннинг қўлидан банкани жеркиб олади ва ёғ тортиб беради. Хотин, омборчи ҳозир тарозидан уриб, камиди уч юз грамм кам берганлигини билса ҳам, индамайди, «гўрга, бу билан чап чиқишиб бўладими» дейди, лекин ичиди унинг башарасига минг марта туфлайди. Буни Оллобергановнинг ўзи ҳам билади. Нима қипти, ичиди туфласа туфлар, тупук оғиздан чиқмаса бўлди-да! Башарти, чиққанда, пешанасига тегиб кўзига оқиб тушганда ҳам Гоголь айтмоқчи, «чўнтағида рўмолчаси бўлмаса экан», рўмолчаси бўлганидан кейин олади-ю, артади-қўяди-да!

Кимёгар инсонлик қадр-қимматини камиди уч юз грамм ёғга айлантиради.

Бирор ўзига тегишили чойни сўраб келади. Оллоберганов шошиб қоғоздан карнай ясади, шошиб тарозига тош қўяди, шошиб тортади...шошганидан «янглишиб» тошни 150 грамм кам қўяди. Бу «янглишиш»дан шубҳага тушган колхозчи иккинчи сафар тўғри тортилган чойни салмоқлаб кўради, шубҳа билан қайтиб кетади; йўлда чойни тортиб кўради-ю, қайтиб боради.

— Биродар, бу чой 50 грамм кам-ку.

Оллоберганов, бу одамга чой бергани гўё эсида йўқдай, унинг сўзига «тушунмайди», сўнгра «тушунади-ю» чойни шошиб тарозига қўяди, шошиб олади, шошиб унинг қўлига беради.

— Билмайман, билмайман, миямни ачитман! Мен молни кўз олдингизда тортганман. Қамини қаерга қўйган бўлсангиз, ўша ердан бориб олинг.

Жабрдийда, жабр кўргани устига яна муттаҳам қилинганига чидолмай, икки оғиз нордон гап айтади. Оллоберганов ўзини эшитмаганга солади, омборда елиб-югуриб юради.

«Кимёгар» инсонлик ҳамиятини, инсонлик иззати нафсини 50 грамм чойга айлантиради, ҳоказо ва ҳоказо.

Қалай, бошқа ҳеч қаерда шундай одамни кўрганмисиз, ҳеч қачон шундай «кимёгар» ўтганини эшиганимисиз?

Шундай қилиб, унинг шу хилдаги «кимёгарлиги» битта-иккита колхозчига очиқ маълум бўлиб қолди. Буларнинг шу ҳақдаги шикоятлари бошқаларнинг ҳам диққатини дарров жалб қила қолди. Дарҳақиқат, Оллоберганов шундай «кимёгар» бўлмаса районда энг бадавлат колхозчининг ҳам ҳаваси келадиган ўй-жой, рўзгор, елини ерга тегиб турган сигирлар, қўйруғи қу-чоқка сифмайдиган қўйлар қаёқдан бўлади?

Бурчак-бурчакда шивир-шивир гап бошланади: «ўғри», «ҳақимизни ейди»...

Бу гап ҳисбот мажлисида очиқ, баланд овоз билан айтилади:

— Омборчимиз Ёвқоч Оллоберганов ҳалол одам эмас, кўпчиликнинг ҳақини ейди, ўрнига бошқа ҳалол одам қўйилсин,— дейилади.

Ҳеч ким ҳайрон бўлмайди, ҳамма бу ҳақли талабнинг қондирилишини кутади. Жимлик чўкади. Оллоберганов райондан келган вакил—ўзининг меҳмони ўроқ Ж.га ер остидан қарайди. Ўртоқ Ж. виқор билан ўринидан туради, қоқ миясини¹ кафти билан ишқаб гап бошлайди:

— Ўртоқлар! Оллоберганов ҳалол одам эмас деган гап тўғри, очиғини айтганда, Оллоберганов — ўғри! Лекин қандоқ ўғри, вот масала—оч ўғрими, тўқ ўғрими? Мен бутун масъулиятни бўйнимга олиб айтаманки, тўқ ўғри, тўйган ўғри! Мен буни исбот қилишим мумкин... Шунинг учун тўқ ўғрини бекор қилиб ўрнига оч ўғрини қўйишлик кони зарар...

Гап унинг бу «назария»сида эмас. Бу назарияни узи директор бўлган пахта заводида ҳам татбиқ қиласдими, йўқми, буниси билан ҳам ишимиз йўқ. Гап шундаки, Оллоберганов ҳеч бўлмаса кўнгил учун ҳам ўзини оқлашга уринмайди. Уриниб ҳам нима қиласди, ўғри деса дер, бу гапни прокурор айтмаса бўлди-да!

Шундай қилиб, «кимёгар»имиз ўзининг бутун инсонлик хислатларини колхоз омборининг калитига айлантиради.

Калит унинг қўлида қолади.

1948 йил

¹ Ўрт. Жуманиёзовнинг мияси бор эди.

ТЕШИК ДАСТУРХОН

Намангандаги ўз ишини яхши кўрадиган, ўз хурсандлигини халқнингро ҳадатидан топадиган кишилар қўлида бир боғ бино бўлипти, шоирлар буни ҳар қанча муболага билан мақташса ҳам ҳақиқатдан ошиrolмайди. Уйчининг хушқомат ва хушманзара дараҳатлари-ю, Унҳаёт боғларининг кўзни қамаштирадиган ранг-баранг гуллари; Пашшоотанинг ҳавоси-ю, Заркентнинг шабадаси; Нанайнинг манзараси-ю, Намангандаги ўзига хос латофати...

Кун ботган сайн кишининг кўз олдида очила борадиган намозшомгуллар атрофига одамлар тўплangan. Булар кўк ғунча бирдан ёрилишини, сариқ чизиклар аста-секин кенгайиб, ҳаш-паш дегунча қаҳрабо гул япроқ ёзишини томоша қиласдилар.

Ёнбош хиёбонлардан бирининг охиридаги хилват бир скамейкада фира-шира қоронғиликда худди каттакон сувқовоққа ўхшаб кўринган иккита фигура турипти. Булар бири малла, бири йўл-йўл сариқ дастурхон ёлинган икки аёл. Иккови кўз ўнгидан қўйилган тангадай тешикдан қараб намозшомгулнинг очилишини томоша қиласди.

Гулгагина эмас, ёруғ дунёга ҳам дастурхоннинг тешигидан қараб бугунги ҳаётнинг нашъу намосидан тўлиқ баҳра ололмайдиган бу хилдаги аёллар Намангандаги ўзида ҳам, унинг районларида ҳам кўп учрайди.

Баъзи районларда айрим масъул ходимлар тешик дастурхонни паранжига қараганда олға босилган бир қадам деб ҳисоблашади. Бу, албатта, бехуда гап, ўринсиз, асоссиз тасалли, чунки гап аёл бошига нима ёпиниб юришида эмас, нима учун ёпиниб юрганигига.

Кўп районларда айрим раҳбар ходимлар районда паранжи буткул йўқолиб кетганлигини катта мамнуният билан қайд қилишади. Тўғри, биз Поп, Чуст, Тўракўргон, Уйчи, Чорток, Янгиқўргон ва бошқа район-

ларда биронта ҳам паранжили хотинни кўрмадик. Бироқ бу районларда паранжидан ном-нишон қолмаганинги аёл ва эркаклар орасида муттасил олиб борилган тарбиявий иш натижаси эмас, кўпроқ маъмуриятчилик ёки маъмуриятчиликдан кўп фарқ қилмайдиган тадбирлар натижасидир. Паранжи ўрнига тешик дастурхон расм бўлганлиги шуни кўрсатади.

Фактлар шуни кўрсатадики, маҳаллий ташкилотлар хотин-қизлар масаласи билан жуда оз шуғулланади, шуғулланган тақдирда ҳам юзаки, бъязан расмиятчилик кўзи билан қараб иш тутади.

Яқинда Чорток райоnidа актив хотин-қизларнинг кенгаши бўлиб ўтди. Бу кенгашнинг қандоқ уютирилганлиги ва қандай ўтказилганлигини аёллар масаласига формал муносабатнинг намунаси дейиш мумкин.

Бир соату эллик минут чўзилган докладнинг ярмидан кўпи ҳаммага маълум бўлган ҳақиқатларни қайд қилишдан, қолган қисми эса аллақачонлар бўлиб ўтган ва район ташкилотлари томонидан тегишли чоралар кўрилган, район учун асосий бўлмаган фактларни санаб ўтишдан иборат бўлди. Кенгаш мутлақо тайёргарликсиз чақирилганлиги устига на докладчи, на ундан кейин катта нутқ сўзлаган райком ходими, на район комсомол комитетининг секретари — ҳеч ким кенгашнинг аҳамияти, моҳияти, унинг олдида турган вазифалар тўғрисида кенгаш қатнашчиларини жунбишга келтирадиган, йўналтирадиган, уларга илҳом ва шижоат бағишладиган тайинли бир гап гапирганий ўқ. Натижада озиб-ёзib бир чақирилган кенгаш руҳсиз, туссиз, мазмунсиз, район хотин-қизлари ҳаётида из қолдирмасдан ўтди. Музокарада жуда кам аёл қатнашиди, қатнашганлар ҳам «қўйма гаплар» доирасидан четга чиқмади. Ҳатто колхозда бригадирликни муваффақият билан олиб бораётган илғор аёл Анорхон ҳам қанча ерга пахта экканлиги, бу йил қанча ҳосил олишини айтиб минбардан тушди-кетди.

Наҳот кенгаш шунинг учун чақирилган бўлса!

Холбуки, агар бу кенгаш пишиқ тайёргарлик билан чақирилганда, доклад ва масъул ходимларнинг нутқлари қалбларга йўл топганда, ишдаги иллатлар ва бу иллатларнинг сабабларини очиб ташланганда, танқид ва ўз-ўзини танқид учун кенг йўл очиб берилганда кенгаш жуда қизғин, мазмунли ўтар ва район хотин-қизлари ҳаётида катта воқеа бўлиб, бунинг овози ҳар

бир ҳенадонга ҳатто тамбалаб қўйилган эшиклардан ҳам кириб, кўниши орқасида мудроқ босган идрокларни ҳам уйғотар эди.

Бундай кенгашда қатнашувчиларнинг гапирадиган гапи, район партия ва комсомол ташкилотларига, совет органларига қиласиган таънаси, ўзининг талаблари, таклифлари, шикоятлари йўқ эмишми? Бор, жуда кўп эди.

Мана шуларнинг устига кенгашда совет демократияси қўпол равиша бузилди: президиум составига кишидан қочадиган бир аёл суқиб киргизилди ва бу аёл то «тегишли чоралар» кўрилгунча залга орқасини ўгириб ўтириди. Кенгашга раҳбарлик қиласиган ўртоқлардан бирининг фикрича, бу «тадбир» ўша аёлни астасекин очиқликка олиб чиқар эмиш!

Хотин-қизлар масаласига шу хилдаги муносабат Уйчи районида бўлиб ўтган актив аёллар кенгашида ҳам қўринди. Дуруст, бу ерда кенгаш Чортокдаги кенгашга қараганда хийла жонли, хийлагина мазмунли ўтди. Бироқ кенгашда йиғилган 320 аёлнинг кўпчилиги тешик дастурхон ёпинадиган аёллар эди. Булар клуб майдонига кириш олдидан тешик дастурхонларини қўлтиққа уриб, унинг ўрнига чорак метрли оқ тўр, яъни янгича чиммат ёпиниб олишди. Клуб майдони, мажлис зали Қутайба замонидаги араб аскарларининг қароргоҳига ўхшаб кетди. Агар шу аёлларнинг ҳаммаси эмас, ўндан бири кўчада паранжили қўринса бу ҳол район ташкилотларини жуда катта ташвишга солган бўлар эди, бироқ кенгашда мажлис залида шунча аёлнинг янгича чиммат билан ўтириши бирорни ташвишга солганлиги маълум бўлмади.

Наҳотки тешик дастурхон паранжига қараганда гўё олға босилган бир қадам ҳисоблангандек, янгича чиммат паранжига қараганда олға босилган икки қадам ҳисобланса! Наҳот қичитқон какрага қараганда ширироқ бўлса!

Деярли ҳамма ерда: «Биз хотин-қизларни тарбиялаш билан тўла шуғулланаётганимиз йўқ, хотин-қизлар орасида оммавий-тарбиявий ишларимиз бўш», деган гапларни эшитиш мумкин ва кўп масъул ходимлар тешик дастурхоннинг бунчалик кенг тарқалганлигига бирдан-бир сабаб қилиб шуни кўрсатишади. Йўқ, бунинг сабаби фақат шу эмас. Тешик дастурхон ёпинадиган аёлларнинг жуда-жуда кўпчилиги хотинини саводсиз тутган Чуст район газетасининг собиқ редакторидан онглироқ, хотинини ота-онасига чўри

қилиб қўйган учқўрғонлик тарих фани ўқитувчisi С.-дан тарбиялироқдир. Булар орасида районда шунча врач туриб, яхши туғруқхона бўла туриб, хотинини доя қўлида ҳалок қилган уйчилик йигит У. сингари етти қайнаб нам ўтмаган жоҳил кишилар йўқ!

Тешик дастурхон, турли-туман чимматларнинг бунчалик тарқалганилигига сабаб—хотин-қизлар орасида оммавий-тарбиявий ишларнинг бўшлигими ёки эрлар, эркаклар орасида бу иш буткул ўз ҳолига ташлаб қўйилганлигими?

Чорток район «Коммунизм йўли» колхозининг Давлатали ака бошлиқ бригадасидаги хотин-қизлар орасида ҳатто табелчидан, бригадирдан, раисдан қочадиган аёллар бор. Бир шу бригада, бир шу колхозда, ёлиз Чортокда эмас, бошқа район ва бошқа колхозларда ҳам кишидан қочадиган аёлларнинг жуда кўпчилиги фақат ўз сельсовети, фақат ўз колхозининг кишиларидангина қочади. Булар, агар «ўз эркаклари» бўлмаса ва келиб қолиши эҳтимол тутилмаса, «бегона» эркаклардан қочишмайди, қочишмайдигина эмас, жуда очишиб-ёзилиб суҳбат қилишиди. Бунга сабаб эрлар, эркаклар орасида диний таассуб кучли эканлиги, қолаверса, баъзи бир онабезорилар ўз оналари, хотинлари, опа-сингиллари ҳам колхозда ишлаётганлигини унтиб, аёлларга ола қарашлари ва ўнг келганда уларга ҳўқиз тили билан муҳаббат изҳор қилишларидир.

Аёлларга ола қарайдиган ва шу билан омма орасида олиб бориладиган тарбиявий ишларга катта зарба берадиган шахсларга нисбатан кескин чоралар кўрилмайди.

Мана шуларнинг ҳаммаси ҳалқ орасида илмий-оқартув, сиёсий-тарбиявий ишлар ниҳоятда заиф ва баъзи жойларда эътибордан буткул четда қолганлигини кўрсатади.

Юқорида номи айтилган районларда хотин-қизларга бой ва феодалларча муносабат деган гапга кўпинча жуда тор маъно берилади: ҳаром пул қутуртирган бирон муттаҳамнинг хотин устига хотин олиши «феодализмга киради», лекин, масалан, Уйчи районида бу йил ўрта мактабни биронта ҳам қиз битирмаганлигининг сабаби — гўё феодал муносабатга кирмайди; қизларнинг ўқишига монелик қилиш феодал муносабатга киради, лекин ўқиган, яхши маълумотли аёллардан тўғри фойдаланмаслик, уларнинг ўқишига ёрдам бермай,

ишдан олиб ташлаш учун бирон хато қилишини кутиб туриш — гўё феодал муносабатга кирмайди; бир эр хотинига зулмини ошириш, уни ўзига керосин сепиб ўт қўйишига мажбур қилса — бу феодал муносабатга киради, лекин бригададинг соя-салқин дала шийпонида эркаклар дам олганда шулар қатори меҳнат қиладиган аёллар томнинг орқасида ёки бирон пастқамликда овқатланишга, дам олишга мажбур бўлса — бу гўё феодал муносабатга кирмайди!

Бундай маломатли ҳолларни ҳар қадамда учратиш мумкин.

Ўз мушоҳадаларимиз, областда хотин-қизлар ишига қизиққан кўп ўртоқларнинг текшириш натижалари шуни кўрсатадики, Наманган обlastida хотин-қизлар масаласи бонг уриш зарур бўлган бир аҳволда.

1953 йил

ҚУЮШҚОН

Антон Павлович Чехов ҳикояларидан бирида бирор «Мен ўлимдан қўрқмайман, ўлсам қабрим устида фалончи нутқ сўзлайди деб қўрқаман» дейди:

Дунёда қалб ҳарорати билан жон киргизилмаган нутқ—ўлик нутқдан совуқроқ нарса бормикин!

Тирик яъни юракдан чиққан жўшқин нутқ ўликини тирилтиурса, ўлик яъни юракдан чиқмаган совуқ нутқ, дарҳақиқат, ўликка ҳам озор етказади.

Кундалик ҳаётимизда шунаقا ўлик нутқларни оз шитамиزم!

Одамларки бор, ҳалол меҳнат билан ўзини кўрсатгани эринади-ю, оламда борлигини маълум қилиб туриш учун кўпроқ гапиришга ҳаракат қиласи; мажлис-пажлисда сўз тегиб қолса, фойдали бирон фикр айтиши учун эмас, гапириш, фақат гапириш учун гапиради. Жамиятда ўзи кўринмай фақат товуши чиқадиган бу хилдаги одамлар, текин қулоқ топилса, битта эски тўппи тўғрисида саккиз соат сув ичмасдан гапиради. Одамлар эснайди, мудрайди, мажлис раисига хўмрайиб қарайди...

Бу—ўлик нутқнинг бир хили.

Ўлик нутқнинг бошқа хили ҳам бор.

Район марказидан колхозга лектор келди. Ҳар нарсанинг ҳам сал нарироқдан, айниқса, юқорироқдан келгани яхшироқ кўринади эмасми, колхоз клуғига одам сифишмай кетди.

Клуб мудири бугунги лекциянинг темасини, лекторнинг номини жуда керилиб, писандада қилиб эълон қилди.

Урта ёшлардаги бир киши минбарга чиқди, белига қистириб қўйган қизил муқовалик қалин дафтарини олиб минбарга қўяр экан, ёдакисига, яъни дафтарини ҳали очмасдан туриб, «Ўртоқлар!» деди. Дафтарнинг варақлари жузидан чиқиб кетган, йиртилиб тушган, бошқа бирон жойда лекция ўқилганда

чалкашган бўлса керак, лектор лекциянинг бош-кетини тополмай хийла овора бўлди; бу орада ёдакисига яна икки марта «Ўртоқлар!» деб олди. Ниҳоят лекциянинг боши топилди. Лектор йўқолиб овора қилган варақни зарда билан қоғозлар устига қўйди, хатга қараб жаҳл билан яна бир марта «Ўртоқлар» деди-ю, лекцияни бошлаб юборди. Лекция дин ва турмуш деган темада бўлиб, сўз ибтидоий одам нима учун табиатдан ташқари бир куч бор деган хаёлга борганилиги, жин ва алвости, арвоҳ ва чилтан ҳақидағи тасаввурнинг пайдо бўлиши, жамиятда юз берган ўзгаришлар диний қаидага қандоқ таъсир қилиши, ва бошқалар ҳақида борар эди.

Лектор айтган, яъни ўқиб берган гапларнинг ҳаммаси рост, бу гапларнинг ҳаммаси залда ўтирган кишиларнинг кўпчилиги учун, эҳтимол, янги гаплар бўлса. Лекин бу рост ва янги гапларга ҳеч ким қизиқмаётганилиги шундоққина кўриниб туар эди: биринчи қаторда ўтирган бир аёл оғзини катта очиб эснаб юборганини ўзи ҳам билмай қолди; клуб мудири унга зимдан танбек қилди-ю, ҳаял ўтмай ўзи ҳам, лекин оғзини очмасдан эснади. Лектор галстугининг тугунини тез-тез ушлаб қўйишига ўрганиб қолган экан, орқада ўтирган бир қиз шу ҳақда бир нима деб дугонасини кулдириди, бу гап қулоқма-кулоқ кетди. Клуб мудири зални икки марта тартибга чақирди... Орқа қаторларда одам сийраклашиб қолди.

Ҳаммаси рост ва бу ердаги кўп одамлар учун янги гаплардан иборат бўлган лекция эшигувчиларнинг диққатини тортмаётганига сабаб унинг ўқилиш, яна бир қиёмда ўқилишигини эмас. Маълум даражада бунинг ўзи бошқа бир сабабнинг натижасидир.

Гап шундаки, ҳозирги вақтда, тилемизнинг бойлигини, унинг қочириқларини ўрганишга эринган, сўз санъатига ҳунар деб эмас, касб деб қарайдиган, бисотидаги бир ҳовуч сўзни йиллар давомида айлантириб кун кўриб юрган бир туркум қалам аҳлининг «фаолияти», чала мулла бা�ъзи олимларнинг «илмий хуласа»лари натижасида ажиб бир тил буњёдга келган. Бу тилда ҳеч ким гапирмайди, зотан, гапириш мумкин ҳам эмас, фақат ёзигб ўқиб бериш мумкин. Бу тилда ёзилган нарсани бир қиёмда ўқимасдан ҳам илож йўқ. Бу тилнинг ҳеч қаерга ёзилмаган, лекин амалда жорий бўлган темир қонунiga кўра

«яхши овқат едим!» деб ёзиб бўлмайди, албатта, «сифатли овқатландим» деб ёзиш шарт! «Папирос чекадиган киши гугуртини олиб юриши керак» деб ёзиш тўғри эмас. «Папирос чекиши одатига эга бўлган киши ўзини тегишли гугурт билан таъминлаб юриши керак» деб ёзилса тўғри бўлади. Бу тилда латифа айтиб бўлмайди, ёзиб бўлмайди! Бу тилда ҳазилга, мақолга, маталга, ажойиб ҳалқ ибораларига ўрин йўқ. Бу тил ҳар қанақа жонли фикрга кафанди кийгизади, ҳар қанақа ўйноқи мазмунни таҳтага тортади, ҳар қанақа лекторни фурбатнинг уясига, ҳар қанақа аудиторияни ўлик чиққан ҳовлига айлантиради!

Лекция тамом бўлди. Халойиқ, оғир бир юқдан қутулгандай, енгил нафас олиб тарқалди.

Орадан бирмунча вақт ўтгандан кейин мен шу лекторни бошқа бир колхознинг катта йўл бўйидаги чойхонасида кўрдим. У бирор билан шахмат ўйнар ва айни вақтда йигирмага яқин одамни оғзига ҳаратиб кулдириб ўтирас эди. Клубда бу қадар совуқ, қуруқ кўринган бу одам шундай хушчақчақ, шундай дилкаш, шундай гапга уста эканки, асти қўйинг! Мен ўнг келиши биланоқ ўша кунги лекциядан гап очдим ва бу ҳақда кўнглимда борини айтдим. Лектор менинг гапимга аввал ҳайрон бўлди, кейин чуқур хўрсиниб:

— Қандоқ қиласай, лекция ўқиганда қуюшқондан ташқари чиқиб бўлмайди, шуни талаб қилишади...— деди.

— Ким талаб қиласади?

Лектор бу саволга жавоб беролмади, бир нима деб мингиллади. Маълум бўлишича, бир талай журналистлар, редакторлар, нотиқлар, лекторлар, агитаторлар сингари бу одам ҳам мазкур тилни расмий, қаердадир тасдиқланган тил деб билар, бу тилда сўзланадиган ўлик нутқу жон киргизгани қилинадиган ҳар бир ҳаракатни «қуюшқондан ташқари чиқиши» деб ҳисоблар экан.

Лекторни, агитаторни фурбатнинг уясига, нутқи оғир юкка айлантирадиган бу «қуюшқон»ни қанча тезроқ улоқтириб ташласак, шунча яхшироқ!

1956 йил

САРХОНА

(Кашанданинг хотира дафтаридан)

Туғруқхонадан келганига тўққиз кун бўлган ёш она жигарбандини бағрига босиб, тор бўлса ҳам дунёдай кенг кўринган иссиқкина уйининг деразасидан кўчага қараб ўтирибди. Лайлакқор уриб турибди. Жимжит.

Йўлакда кимдир ер тепинди, пишиллаб ечинди, йўталдай. Эшик очилиб, парда орасидан сўлиброқ қолган семиз юзи ва тепакал боши қип-қизил, оғзининг икки томонидан иягигача осилиб тушган қалин мўйлови сарғайиб кетган башара кўринди.

— Мумкинми... Қечирасиз, келин табриклаш вазифасини ўз вақтида бажара олмадик... Эндиликда ҳам тўй, ҳам фарзанд масаласида қўш табрикимизни қабул қиласиз! Мен Юнуснинг қариндоши бўламан. Мирсолиев Мирсожид... Эшитгандирсиз?

Келин бунаقا номни эшитмаган бўлса ҳам:

— Эшитгандман... Юнус акам айтган эдилар... Марҳамат!— деб меҳмонни тўрга таклиф қилди.

Меҳмон тўға ўтиши билан уйни димиқсан, чириган тамаки ҳиди тутиб кетди. Уйга одам эмас, каттакон эски сархона киргандай бўлди. Келиннинг назарида бу ҳид унинг сариқ қурум босган мўйловидан чиқаётганга ўхшар эди. Бунинг устига, меҳмон ёнидан папирос олиб тутатди. Келин «уйда гўдак бор, чекманг», дегани тортинди-ю, буфетдан битта ликобча олиб, унинг олдига қўяр экан:

— Қечирасиз, Юнус акам шу кунлари папиросни ташлаганлар, кулдонимиз йўқ,— деди.

— Зиёни йўқ,— деди меҳмон оқ дастурхонга тушган кулни йўғон бармоқлари билан олишга уриниб,— тамакини кули идиш танламайди, носнинг иши қийин...

Келин йўлакда примусга чой қўйди, кириб нон кесди, дастурхон ёзди. Шунгача меҳмон яна иккита папирос чекди. Уй иссиқ бўлгани учун тутун юқорига

кўтарилилмай, одам бўйи сузаб юрар эди, шунинг учун келин чой дамлаб қайтишда эшикни қияроқ қилиб қўйди. Меҳмон келиннинг бу ишорасини фаҳмлаб, теласида сузаб юрган тутунни қўли билан еллиб тарқатган бўлди. Бу папирос ярим бўлмасдан тутун пастлаб гўдакнинг каравотига яқинлашиб қолди. Келин тоқати тоқ бўлиб назокат билан:

— Папиросни кўпроқ чекар экансиз,— деди илжашиб.

Меҳмон ичига тортган тутунни оғиз-бурнидан чиқараркан, чой ҳўплаб:

— Кўп чекаман ва кўлдан бери чекаман!— деди.— Қирқ уч йил бўлди. «Шури-мури»дан бошлиганин. Ундан кейин «Тари-бари»га ўтдим. «Тройка», «Роза», «Осмон» деган папирослар бор эди. Кейин чиққан папирослар ичидаги «Дюбек-Яка», «Триулапф», «Кавказ» деган папирослар аломат, лекин энг машҳури «Эпоха» эди.

Меҳмон папирос ҳақида сўз давомида учта папирос чекди. Уй тутунга тўлди. Келиннинг назарида ҳамма тутун боласининг ичига кираётгандай бўлар эди. Меҳмон гап билан овора бўлиб папироснинг кулини кулдонга қоқишини ҳам унуди. Папироснинг учидан узилган ярим бармоқдай келадиган кул аввал унинг тиззасига, кейин гиламга тушди.

— Ие, кечирасиз,— деди меҳмон ва оёғи билан кулни эзиб, гиламга сингдириб юборди.

Келин унинг тезроқ кетишини хоҳлаб соатига қарди.

— Соат уч, Юнус акам келмадилар, энди кечқурун, балки кечаси келсалар эҳтимол...— деди.

Меҳмон кулдонда тутаётган папироснинг қолдигига ингичка ва узун сўлак томизар экан:

— Зиёни йўқ, кутаман, фурсатим бор,— деди.

Келин уни зериктириш учун галига гап қўшмади, саволига қисқа жавоблар бераверди. Меҳмон дарҳақиқат, зерикиб қолди-ю, папиросга зўр берди; журнал варақлаб чекди, девордаги суратларни томоша қилиб чекди, деразадан кўчага қараб чекди... Келин дод, деб юбораёзди.

Соат ўн деганда меҳмон ўрнидан турди.

— Юнус келмади, энди мен кетай. Яна кела-ман...

Келин индамади, «дийдоринг қурсин», дейишдан бошқа гапга унинг тили бормас эди.

Меҳмон кетди. Келин йиғлагудай бўлиб эшик, дебразани очди, боласини бағрига босди, кўрпага кирди. Эр хотин уйни роса бир ҳафта қатрон қилишди: одеколон селишди, олманинг пўчошини тутатишди; исириқ солишди... Йўқ, уйдан ҳамон сархона ҳиди келар эди.

— Ахир абраҳ,— дерди Юнус,— бирорвоннинг уйига сёғингни артмасдан киргани-ку ибо қиласан, нега ҳавони булғатгани ибо қилмайсан?

1958 йил

БИР ШОФЕРНИНГ ХОТИРА ДАФТАРИДАН

(Тарихдан)

Чоршанба. Ниҳоят ўз ихтиёrim билан ишдан бўшатилганлигим тўғрисида бўйруқ чиқди. Зап қутулдим-да шу хўжайндан! Одам торс ёрилиб кетай дейди, ўқигани ўқиган, ёзгани ёзган; уйидан ишга, ишдан тўғри уйига боради. Ҳар замон бирон идорага, аҳёнда театрга олиб бораман. Кунига ўн-ўн икки километрдан ортиқ йўл юрмайман. Хотини ўзидан баттар! Тайёр машина бўлгандан кейин белини қайиштириб мин, машиначига бор, ҳаммомга бор!..

Якшанба. Ҳозир саккиз кружка пиво ичдим. Уф, қимирласам қорним қулқиллади. Майли, ўйнаб олай, бўйруқ қўлимда, эртадан ишга чиқаман. Янги хўжайнин, янги «Победа!» Ура!..

Душанба. Янги «Победа»га номер олдим. Хўжайнини ишдан уйига элтиб қўйдим. Хўжайнин деган мана шундоқ бўлса: қад-комат, савлат... Машинада ўтиришини кўрсангиз, одамларга худди «кўчани мунча пашша босибди», дегандай қарайди.

Сешанба. Бозордан чоғроқ тандир олиб келдим. Хўжайнинг қизи жуда шўх экан: тандирни ҳовлига қўйиб чиққунимча, сигнални дудулатиб турди; машинанинг эшигига нима биландир чизиб отини ёзибди. Кошки қисқароқ от бўлса — Пошшохон — бутун эшикни энлаб ётибди. Хўжайнин кўриб индамади, кулиб қўя қолди.

Кечқурун Пошшохон билан келинойимни шаҳар айлантиридим. Бу хотин мунча озғин? Пишмай қуриган дастмолқовоққа ўхшайди. Лекин товуши жуда ўткир, ўзи жуда сергап экан.

Чоршанба. Пешингача тандир қурдим, кейин ўтий ёрдим, ёқдим. Пошшохон машинада ўтириб анор ебди — ҳаммаёқ расво... Келинойимга арз қилган эдим, у киши индамадилар.

Кечқурун хўжайнин билан районга жўнадик. Кечаси соат икки яримда қайтиш. Ёнимдан ўттиз літр бензин олдим. Хўжайнин кўпайтириб берар...

Пайшанба. Хўжайнин билан Қозогистонга бориб қўй олиб келдик. Қўй машинада маърамайди, дейишар эди, ҳаром ўлгур, йўл бўйи шунаقا маърадики!.. Шаҳарга кирганимизда товуши яна ҳам очи-либ кетди. Икки жойда милиция менга хўмрайиб қаради.

Ёнимдан яна ўн беш літр бензин олдим.

Жума. Қўйни машинага босиб келинойим ва Пошшохон билан яна районга жўнадик. Келинойимнинг холаваччалари ўгай ўғлини уйлантираётган экан. Кечаси машинада ётдим. Қорин оч.

Шанба, якшанба, душанба, сешанба. Бирор кимсан демайди, машинага хўжайнин Пошшохон бўлиб қолди. Жонимдан безор бўлдим.

Чоршанба. Қайтиш келдик. Хўжайнин келинойим билан уришди, ишдан чиқиб бир ошнасикига борди. Кечаси соат уч яримгача машинада ўтиредим, ётдим, ухладим. Икки марта милиция уйғотди. Соат уч яримда хўжайнин чиқиб жавоб берди. Гаражга кетдим.

Пайшанба. Арафа. Қатта гўристондаги бир қорига бир лаган чалпак элтиб бердим.

Жума. Келинойим билан Пошшохонни ҳайит қилдириб шаҳар айлантиридим. Ёнимдан қирқ літр бензин олдим.

Шанба. Ҳайит қилиб яна шаҳар айландик.

Якшанба. Хўжайнин билан овга чиқдик. Текис жой бўлса, машина билан қуён овлаш ҳам қизиқ бўлар экан. Хўжайнин тўртта ўқ узиб ярадор қилгандан кейин қуён қалин буталар остига кириб кетди. Мен кириб олиб чиқдим. Ўқ қуённинг чап сонига теккан экан, кечгача юриб бошқа ҳеч бир жонивор учратмадик.

Қайтишда бензиндан гап очиб чақа тўғрисида шама қилган эдим, хўжайнин: «Қанақа нотавон шофферсан, мендан пул сўрагани уялмайсанми?» деб уришиб берди.

Бу ёғи қандоқ бўлди, киракашлик қиласманми?

Душанба. Эрталаб хўжайнини ишга олиб боргани кетаётib бутун шофферлик умримда биринчи марта одам олдим, бирорни вокзалга элтиб қўйдим. Бу одам битта уч сўмлик, иккита бир сўмлик бериб афтимга қаради. Бу қараш билан «шу басми» демоқчи экану, мен «қўлга тушдингми», дермикин деб юрагим шув этиб кетди. Пулни олиб чўнтағимга солдим,

лекин чўнтағимга пул эмас, янги туғилган кучукчани солгандай бўлдим: қўлим, чўнтағим, юзим, бутун вужудим алланечук нам, ёпишқоқ... Ҳаром!

Шу тахлитда бола-чақамнинг олдига борамани?

Сешанба. Куни бўйи худди ўғрига ўхшаб юрдим. Милициянинг афтига қаролмайман, йўловчига ҳуштак чалса ҳам, юрагим гуп-гуп уриб тўхтаб қоламан. Шу аҳволда бугун 140 километр йўл босдим.

Кечаси Пошшохонни ҳаммомга олиб бордим. Булар ҳаммомга нега алоҳида-алоҳида боради, ҳаммаси бирга борса бўлмайдими?

Эски хўжайнинг қадрига етмаган эканман.

Чоршанба. Келинойимга сомса олиб келгани бозорга тушган эдим, эшак арава орқага тисарилиб машинанинг чап қанотини пачақлади. Кечаси билан шуни тузатдим.

Пайшанба. Идорага кетаётуб хўжайнин «райондан бир-икки юз кило пиёз олиб келгин», деди. Жуда аччиғим келди: саксон километрга бориб олиб келинадиган пиёзнинг килоси, ниҳояти, йигирма тийиндан арzon тушар экан. Орамизда гап қочди. Хўжайнин у-бу деб ортиқча гап қилган эди, машинани шартта тўхтатдим, моторни ўчириб калитни қўлига бердиму, тушдим-кетдим. Хўжайнин ойнадан бошини чиқариб «бунақа қилгани ҳақинг йўқ», деганича қолаверди. Биламан, ҳақим йўқ, лекин ҳақ сурнштирилайдиган бўлса, мен ютқизмайман.

Эски хўжайнинг учрайман, қайтиб ишга олмаса, бирон жойга жойлаб қўяр-ку!

1959 йил